

perch/nap/iv per

91.24

217.0

1750





REGIA VIRTUTUM
SERENISSIMO, ET POTENTISSIMO
HUNGARIÆ REGI

JOSEPHO I.

 MAGNI CÆSARIS  400

LEOPOLDI I.

FILIO,
CÆSARIS PARENTIS
CONSENSU,

BONORUM OMNIUM
SENSU,

SEPTEM-VIRORUM SAC. ROM.
IMPERII UNANIMI SUFFRAGIO,
AUGUSTO ROMANORUM


R E G I

CORONATO

A B

ANTIQUISSIMA, AC CELE-
BERRIMA UNIVERSITATE
VIENNENSI

IN TRIUMPHUM FELICITER PERACTÆ INAUGURATIONIS,
PUBLICÆ FESTIVITATIS ARGUMENTUM,
ÆTERNÆ OBSERVANTIÆ MONUMENTUM
DEMISSISSIME OBLATA.



VIENNÆ AUSTRIÆ TYPIS LEOPOLDI VOIGT, UNIVERSITATIS TYPOGRAPHI.

JOSEPHO
PRIMO


AUGUSTO

GERMANIÆ, HUNGAR
IÆQUE

REGI,

ARCHIDUCI
AUSTRIÆ, &c.

DOMINO, DOMINO
CLEMENTISSIMO.



AUGUSTE REX.



Ost magnificas portas, quas Triumphanti de Germaniæ affectu festinantibus obsequijs communis Populorum ardor excitavit, Regiam postliminiò pandimus MAIESTATI Tuæ. Ingredere AUGUSTE REX. Non alibi di-

gniùs degit Bonus Princeps , quàm in virtutum confortio. Hæ aulam divinæ fimillimam exhibent. In ea fulgeat, qui eminentiâ potestatis in terris Majestatem DEI repræsentat.

Sint, qui domos moliantur urbem complexas : qui montium strage de via cedere naturam cogant, ut pares sibi ædes fastus inveniat. Virtute se TUA gloria metiatur. Inhabitata leucæ fati granditatem Principum non ostendunt. Etiam sic Nerones habitârunt. Majestas Imperantis à magnitudine animi venit , animi magnitudo à virtute. Hæc supra homines homines tollit, id est, Principes facit DEO proximos. Hæc velut basi imperia eriguntur, hæc firmantur.

Circumspice atrium Augustæ Domûs : tot ista pro veritate ibidem testes , quot longa serie Cæsares stant. Omnes Maximi, quia Optimi. Gemina nempe inter Austriacos , una pietatis, dignitatis altera metempsychosis perennat. In sequentium mores Antecedentium exempla, & Horum coronæ in Illorum vertices migrant. Ita virtus honorem continuat. Nec ad hæc comprobanda argumentis, & eloquentiâ opus est , postquam tot sæculorum experimentum effecit ; ut synonyma jam evaserint Austriacus, & Pius Princeps. Pietatem equidem, licentiæ svasu, aulæ eijciunt ; sed quanto damno ad omnia utilem eijciant ;

cian; quid Regiarum Dux illa virtutum possit, luculentè in exornanda Austriacorum Domo ostendit. Tot sceptrâ, tot regna intulit, tam amplam effecit; ut sine adulantium hyperbola infra cælum UNA DOMUS minor orbe non sit. Id radijs suis sol ipse demonstrat, quos extra Austriaci Imperij limites nulla pernecitas rapit. Quam firmam, invictamque præstiterit; fractus tot adversantium, aut fatigatus, velut in rupe, procellarum impetus probat. Inter hostes, quemadmodum olim DEI templum, nata est; inter hostes crevit, & adhuc inter hostes assurgit. Sed quos? numero, furore, pertinaciâ sævissimos. Hostes nempe patitur, quos causa DEI, pro qua se murum opponit. Vim adversus illam confociant Ambitio, Tyrannis, Impietas. Illi totâ bellorum mole incumbunt. Simul impugnant, simul premunt, simul quatiunt, non expugnant tamen, non opprimunt, non labefactant. Succubuiſſet vel uni, si posset cadere; posset cadere, si à Pietate divelli. Vim ergo virtutis cuncti intelligant, quos tantæ Domûs tam sublimis, tam firma gloria tenet attonitos. Extra casum sunt, perennant imperia, quæ cælo fundata Pietas fulcit.

At cur MAIESTATIS TUE memoriam ad Avorum imagines, & vetusta tempora remittimus. Confidentis in folio formam felicitatemque virtutis quotidie experimento usurpat. Implet illa MAIESTATIS

TUÆ oculos, & in se rapit, quæ è vultu PATRIS, è vultu MATRIS Augustissima fulget. Quid quid enim præcedentium Cæsarum fama immortalitati commisit, in eorum legitur gestis, quorum vitam in Austriacæ historiæ epitomen Pietas contraxit. Agnoscit orbis, calamitati sæculi cælum providisse. Ambitio & furor Licinios, Maxentiosq; revocavit, illud Imperio Theodosios, ac Constantinos in Genitore Tuo dedit. Quantum regnandi sanctitas faciat, à mensura intelligimus, quam ab humani generis iudicio habet. Ab hoc verè itaque (nequè enim universim fallimur) MAGNI nomen accepit. MAGNUS verè est, qui fortunæ casibus altior fulmina pede calcat. MAGNUS est, infra quem Luna. MAGNUS sine exemplo est, qui TE, AUGUSTE REX, in hac annorum teneritudine Germanico folio virtutis suæ exemplo dignissimum præstitit. Ea siquidem specimina edidisti, ut convocata Germania mox TE viso adverterit, quod oculis imperandi artem addiscas.

Illam morum & oris Tui dignitas; illa maturitas sermonis, ille animi sublimis vigor ad imponendum diadema citra ætatem maturo vertici lenta aliàs suffragia incitarunt. Personantem priùs tanta cum laude Indolis TUÆ famam virtutum præsentiam superasti; conceptamque ex TE spem in securitatem mutasti. Nemo jam ambigit, quòd cuncta è præscripto virtutis, sive paterno more geres.

geres. AMOREM, TIMOREMQUE vadem habemus. Quantum enim se ille virtuti, quantum se illi Principi impendere virtus debet ! in quo, quid quid boni amant, quid quid improbi timent, ut emineat, necessarium est.

En quàm aptè TIBI è Regiarum duodenà virtutum Zodiacum, id est, solis Regiam construximus; jam per illum TE Serenissimum Europæ fides AMORIS, TIMORISQUE fortunatissimæ bigæ vehunt, à quo tramite nemo Principum deflectere debet, nemo bonorum vult, Austriacorum nullus potest. Raptas in dodecatemoria urbes adulatio illis effingat, qui ambitionis audacissimo impetu circumquaque feruntur, incendia radiorum vice spargunt. Tuum est, Rex Auguste, quod solis, cunctis serenitatem adferre. Illustrare mortales, orbem beneficijs peragrarè Tuum est. Bella equidem & Tu geres; ac quemadmodum pulsâ caligine radiorum suorum sol, ita Tu armorum Majestatem domitâ, fractâq; perfidiâ exhibebis. Victor tamen ultorq; ensis nunquam etiam virtutis fulgorem amittet; inter fulmina, quæ è folio TIMOR vibrabit, continuò intermicabit AMORIS blanda Lux. Parce humano generi; iniquo possessori, non excisas mundo urbes eripies. Fidelitati, Cæsari Occidentem, Humanitati, DEO Orientem restitues. Nunquam apud TE Dominationis libido hæc duo nomina dividet, quæ sum-


mam tuarum laudum conficiunt, REX VIRTUTUM, REX GLORIÆ.

Finem orationi facimus, non precibus. Descripta Regiarum virtutum, hoc est, Domûs Tuæ encomia ita suscipe, ut solet oblata sibi munera DEUS, apud quem hæc omne ab offerentium affectu pretium habent. Redde vicissim, quod DEUS, & Tu quoque libentissimè indulges, nobis verò pretiosissimum est, AFFECTUM Tuum. More Majorum, exemplo AUGUSTISSIMI GENITORIS Tui (plura desiderijs concipere non possumus) Viennensem Universitatem fove. Ita precatur

Augustæ Majestatis Tuæ.

*Demississimus cum tota Universitate
Servus,*

Franciscus Josephus Garzaroll à Garzarolshoff
p. t. Universitatis Rector.



RELIGIO.

*Quem toties volvit, toties Fortuna revolvit,
Austriaci firmant in crucis axe Globum.
Scilicet hoc primum fuerat Tibi magne Rudolphe
Quod Sceptrum Pietas ingeniosa dedit.
O! procul adversæ dolus, ira, superbia, fraudes
Hinc fugite, Augustam crux micat ante Domum.*



Uti de summis ima, & de imis summa facere, potest ex hominibus, pro potestate sua, Princeps Imperans, idem de Deo agere non tam potest, quàm debet necessitate, ut feliciter regnet. Apud rectè Imperantem infima agit Altissimus, quia fundamentum boni publici; summa tenet, quia principium & origo fortunæ, utrumq; factus bono Principi Religione. Nequeunt benè regere sæculi Principes, nisi apprimè religiosi, & regulares quidem, quorum actionibus semper fixa stat *prima regula* DEUS. *Regni basis Pietas erga DEUM.* (a) Hoc destitutus fundamento adeò vacillat thronus imperantium, ut casui proximus sit, quem cum ruere cœperit, si sustinere voles, non alio, firmabis, quàm unico *fulcro imperiorum Religione, & Pietate.* (b) Productio & conservatio ejusdem artificis est ad Philosophantium mentem, ut concludat Politica, quod, qui contulit, idem & conservet imperia, DEUS. *Regna super stat, qui regnare jubet.* (c) A & Q̄ Hebræus DEUM dixit, imò DEUS seipsum, principium & finem, nunquam luculentiùs, quàm in benè ordinata Republica. DEUS centrum est, à quo perfectio desumitur circuli Imperialium diadematum; apex, in quem sceptrum desinunt. Superlativo ampliùs aliquid non admittit Grammatica, docet necessarium bona Politica, dum mortalium Maximis majorem ponit DEUM; vel ideò maximis, quia illo minoribus. Nam *Imperator hic omnibus major, dum solo DEO minor est.* (d) Ut ut cæca Antiquitas, procul tamen bonæ gubernationis leges inspexit, oculata in cœlum usq; , dum Græcorum legibus primam imposuit *de Deorum cultu*, & leges Romuli primam notârunt, quæ diceret: *Deos patrios colunto.* Et benè, nam *in legum constitutione primum, & maximum de Dijs opinio.* (e) Bonus Princeps publicæ felicitatis magnes est, affinis Cælo gemma, quocunq; seu se vertat ipse, seu vertatur à fortuna, polum semper respiciat, affinis divinitati futurus, si non Deorum aliquis, dum *Principes pietate & justitia Dijsunt.* (f)

Omniū rerū magnarū à Dijs immortalibus principia ducuntur. (g) Et Lauri, & Palmæ Victricis Reipublicæ non in terra, sed in cælo radices suas agunt; illinc vegetantur, ut in terra floreat. Si Theodosius Persas jugulavit, debellavit Saracenos; DEUS metum incussit. Si Heraclius in tribus Cosrois Ducibus ter triumphavit, non armis, sed prece bellum absolvit. Vincebatur Clophæus, & vincebat Germanus; prosiliit Rex ad vota, Christianum se futurum, si vinceret, cum palino pugnam, & bellum explevit, & primus Francorum Regum Christianus factus est. Divinas literas consule, non dabis impium principem non infelicem, nec religiosum non fortunatum in hostes. *Quotquot ex illis Regibus cultu, & observantia, quæ DEO debetur, impiè contemptis, legibusq; justitiæ ministris pro nihilo ductis, suo fastui, suisq; libidinibus verè indulgendum esse putarunt, omnes hi mali, & miseri, male, & misere perierunt.* Contra verò, quicumq; se pios in illum declararunt, quæquæ illi placitura credebant, omni ope præstare elaboraverunt, citra sudorem, ac pulverem hoste devicto, debellatòque triumphum cecinerunt. (h) Suum, & Reipublicæ nudum latus hostili ferro objicit, cui pietate provocatus non militat æther. Ludit in humanis, non humana, sed divina potentia rebus. Ratio statûs solo DEO stat.

Carent fortunatis eventibus consilia, quæ vel sunt contra Dominum, vel non à Domino. Nullus omnia prævidet, & omnia providet, nisi qui omnia videt, DEUS. Nam *sunt in Politica necessarii quidam, & nullo consilio evitabiles errores, qui rerū humanarū conditionem nunquam sine exceptione felicem, & humani judicii imbecillem aciem evidentè arguunt.* (i) Hoc nequè vitat, nequè emendat, nisi ex Deo & à Deo consilium. Hinc sapiens Cyri monitum Cambysem instruentis: *Ut nihil publicum, aut privatum ageret, nisi prius ad Deum confugeret.* (k) Quæ magnum fecit Scipionem, Religio fuit. Hic ex quo togam virilem sumpsit, nullo die prius ullam publicam, privatamque rem egit, quàm in capitolium iret, ingressus adem, consideret, &c. (l) Hæc si potuit superstitio; dic, quid faciet vera Religio? *Aurelianum infantem fasciolâ vinctum, è cunis levatum, Aquila in aram imposuit, quæ juxta sacellum fortè sine ignibus erat.* (m) Ut scirent principes, cunas suas esse altaria, quando nascuntur ad victorias. Secus mobilibus in cunis nunquam firmi vicissitudine, nisi in DEI ara, quæ firma petra est, Religione quiescant. O magni Principes! *Nihil est, quod ita nequeat occasui subjacere, quàm vera Religio; Hæc est enim, quæ vestrum firmat imperium, hoc quod vestra regna conservat.* (n)

Quantum Numinis cultus extenditur, tantum Respublica propagatur. Sic semper fuit *Eorum Imperiis amplificata Respublica, qui Religionibus parvère.* (o) Reipublicæ cujuspiam fata divinare contendis Aruspex Politicus? Religionem inspicere, ex hoc signo certius, quàm victimæ visceribus rem collegisti. Si labescit pietas, non diu stabit bonum publicum. Tantæ molis Religio est, ut collapsa, maxima imperia conterat. *Peritura Troja perdidit primum Deos.* (p) Dubium, num stupidus magis, an impius Atheus, dum è Republica Religionem exulem voluit. Dic Sodes, quis tum Dominus? quis servus? quis unum omnes colere? quis dispendio rerum, & vitæ unum hominem integra imperia, aut docebit tueri, aut coget? Nemo hic amplius Princeps, quia nullus subditus, nemo subditus, quia nullus Princeps; siquidem *sine Religione nequè Princeps officium suum, nequè subditi facient.* (q) Nihil decedit Principis magnitudini, quod DEO accedit, imò si quid decederet, sic perdere lucrum est. *Quicumque glorificaverit me,*

me, glorificabo eum, qui autem contemnunt me, erunt ignobiles. (r) Magnum Magnis exemplum humilis Theodosius Junior Imperator, cujus aurea verba: Nam & nos, quia legitimi imperij armis non convenit, DEI templum ingressuri, foris armare relinquimus, & ipsum etiam diadema Regia Majestatis insigne deponimus, & sacra altaria munerum tantum offerendorum causâ accedimus, quibus quoq; oblati ad extimum, communeq; atrium mox nos recipimus. (s) Tam sublimi pietate adeo profundè se demittens Cæsar quid amisit? cujus

*Plena laurearum
Imperio fæta Domus
Vix numerat triumphos. (t)*

Qui gloriam sibi quærit Princeps, Divinam promoveat, & suam inveniet. Jura sua, si inconcussa cupit, Divina tueatur, & sic ubi læsa, restauret. Nunquam erit invictus Hercules, qui imperat, nisi & Cælum noverit succollare Religione. *Felices Principes, qui suam potestatem ad DEI cultum dilatandum Majestati ejus famulam faciunt. (u)* Regium est, Deos in terris tueri. Illa quantumvis lapidea Ethnicorum pietas, fundamentum posuit Romanæ magnitudinis, quia hæc omnia post Religionem ponenda semper duxit. (x) Quia vagam nimis Fortunam Romana novit sagacitas, ut eam vincularet in servitutem, non aliâ pedicâ usa est, quàm Religione, quando omnium magnarum rerum & principia Romani exorsi à Dijs sunt, & finem eum statuerunt. (y) Desumat Christiana Politica, quid sperare auit, si imperaverit Religiosa. *Est enim vinculum, & fundamentum Reipublicæ Religio. (z)* Intuemini horum annorum vel secundas res, vel adversas, invenietis omnia prosperè evenisse sequentibus Deos, adversa spernentibus. (aa) Ita Camillus ad Populum Romanum de suis, ego ad vos de nostris temporibus. Romanæ Magnitudini Christianam jungite, & majorem Austriacam, quæ ad amplianda imperia, cum verba nulla sufficiant, factis loquitur excellentiam Religionis. Primus, qui domum hanc Augustam reddidit Magnus Rudolphus Imperator, id pietate perfecit. Deum veneraturus ex equo descendit, ut thronum ascenderet Occidentis, nunquam venatus felicius, quàm dum Angelici panis escâ Aquilam cœpit Augustam. Equum donavit pro populo, minimè imprudens, quia Imperiali. Genu flexit ante Dominum, ut sibi, & posteris adgenicularentur Imperia. Adoravit sub rotundo pane DEUM Eucharisticum, ut Se, Suosq; Orbis totius dominos coleret terræ circulus. Sceptrum alienâ incuriâ in coronatione defuit, Ille pietate suâ pendentem è Cruce DEUM arripuit, ut cum Augusta posteritate nunquam sceptri pateretur defectum. Tribus Crucifixi clavis stitit volubilem, imò affixit Stirpi suæ immobilem, non jam Fortunæ rotam, sed DEUM Fortunæ.

Vestigia secuti Imperio Rudolphi Magni Posteriores non paria tantum, sed majora dederunt Religionis documenta, imò prodigia. Inspice Carolos, & Ferdinandos in superiori, Philippos in inferiori Germania, imò & Gallia, & quæ Austriaca sit in DEUM Religio, fare, si stupor finit. Nequis effari? scribe: *Fidem temporum testem appello, an non hodie, aut nulla, aut miserè afflicta in Europa esset Religio Catholica, si tanta Austriacarum opum vis non esset. (bb)* A Tumultuum principio ad annum usq; 1610. in Hollandicum bellum 180. Milliones impensi sunt. Ita Philippus ipse II. ep. ad Paulum Papam V. Quæris finem? audi Philippum, quamvis secreto in consilio loquentem, quem tamen intelliges, quia verè loquitur ferventer: *Sumptus quoscunq; præteritos, & quoscunq; impofterum Hispania facere potest, optime mihi collocati, & collocandi videntur, dum vel in uno subditorum meorum Religio Catholica conservari*

queat. (cc) Hæſere attonitiGrandes, loquentem excipientes; hæres & tu? Non ego, quia Philippum novi Austriacum, in quibus ſimilia nihil novi. Vis plura? imò majora? accipe; ſed aures præpara, imò animos. Ferdinandus II. loquitur, Magnus Pace, & Bello Imperator. *Si mea morte poſſem promovere Religionem Catholicam, oro Deum, ut publicè coram toto mundo ab infami carnifice capite plectar!* (dd) Amplius ne dici poteſt? amplius, ſi idem dicit. *Suis ſe Provinciis, regnisque renuntiaturum citius, ac libentius, quàm conſilio ullam amplificandæ Fidei occaſionem neglecturum.* (ee) *Malle ſe ſolo pane, & aquâ vitam trahere. Malle ſe cum conjuge, ac liberis ſolo Scipione inſtructum ire in exilium. Malle ſe oſtiatim panem mendicare. Malle ſe in fructa concidi, ac diſcerpi, quàm injuriam Deo, Eccleſiæq; ab hæreticis in ſubditis ſibi Provinciis hætenus illatam diutius perferre.* (ff) Hæc negas prodigia? ſi ita; prodigium eſt ſtipitis. Si quid impium de Principe audis, aut legis, cape regulam: Austriacus non fuit. Si vocem audis Philippi II. Hæſperiæ Monarchæ: *Si eveniret unquam, ut filius meus hæreſim amplexus, ab Eccleſia Romana deſiceret, ligna, quibus ille concremaretur, ultrò ipſe ſubminiſtrarem.* Admirare, venerare Philippum, aſt non ſolùm, ſed omnes in eo Austriacos, nam omnibus una mens. Jaſtantia fuit Hadriani Imperatoris, qui ſuis numiſmatibus inſculpi fecit aquilam evolantem, alâ unâ Jovem, alterâ Junonem in ſublime efferentem. Modèſta veritas eſt, Aquilam Austriacam alâ unâ Deum, altera Dei Matrem in ſublime efferre. Hic hætenus unus labor Magnæ hujus Avis, hæc cura. Quo emolumento? Incomparabili. Romana Imperii Majeſtas, quam tot ſæculis tenet, ſatis non erat, quamvis vaſtiſſima, vaſtior Monarchia addi debuit Hiſpana. Imò pro tam Auguſta Familia vetere orbe nimis anguſto, novus inveniri debuit, ut latiùs imperaret *Domus ad ſummum faſtigiũ genita.* (gg) Non alio circino quam ſolaris curſûs circulo Austriacâ amplitudinem metiri poteſ. *Ille temporum parens Sol, dum aliis occidit, in aliqua gentis Austriacæ provincia oritur, & diem facit, noctem nescit, tantum Imperium, quod alicubi ſemper diem habet.* (hh)

Obvia hac Austriacæ Religionis adumbratione TE TIBI depingo Auguſte NEO-REX JOSEPH, ut ſcires antequam eſſes, quid futurus ſis, dum es Austriacus. Majoribus tuis pietate nunquam minor, Auguſtæ earundem Religioni honorem cedes, non æmulationem. *Ægypti filias nobiles torquibus aureis exornabant, quibus virtutum puellarium ſymbola artifex manus impreſſerat, in his, ut Pietatem exprimerent, alaudas pingebant. Alaudæ nativa ſunt hæreditas TIBI Auguſte NEO-REX, ut ſcias in tam vaſta Imperiorum ſucceſſione primam tibi hæreditatem eſſe Pietatis. Inter innumeras glorias, quibus æternitati commendaberis, maxima erit, quiaveriſſima, Religio. Etenim Tria Principem glorioſum faciunt, Potentia, Sapientia, & Religioſa mens.* (ii) Tanta tibi Imperia, qui reſervavit, Magnus Deus, idem cum augmento conſervabit; Futurus non in TE modo, ſed in Deum injurius, quisquis ſeu vi, ſeu dolo tibi infeſtus. *Quod ſi non ab hominibus, ſed à Deo ſunt regna, & per eum Reges regnant, ut Divinum oraculum pronuntiavit, non poteſt non ab eodem eſſe tanta, quanta eſt Austriacorum Imperiorum magnitudo, cui obniti nihil aliud eſt, quàm æternæ Providentiæ reſiſtere.* (kk)

(a) Sines: ar. de Reg. (b) Lipſ. L. 1. Polit. (c) Sidoñ. carm. 2. (d) Tertul. ad Scapul. (e) Plut. adverſus Colat. (f) Sen. de morte Claud. (g) Cic. in Vatin. (h) S. Cyril. Alex. L. de recta in Chriſtum fide ad Theod. (i) Forſtnerus in cap. 10. ann. Tac. (k) Xenoph. L. 8. Cyriped. (l) Liv. L. 26. (m) Callicrates Tyr. apud Rad. in Mart. (n) Joann. Pap. Ep. ad Juſt. Imp. (o) Cic. de Natura 2. (p) Arbit. Satyr. (q) Lipſ. monit. Pol. (r) Reg. 2. (s) Tom. 5. Concil. c. 21. (t) Claud. in Nupt. Hon. & M. (u) Auguſtin. L. 24. de Civit. (x) Valer. Max. L. 1. C. 1. (y) Liv. L. 45. (z) Lipſ. monit. polit. L. 1. C. 1. (aa) Liv. (bb) Vernulæus in Apol. Gent. Auſt. C. 2. (cc) Claud. Clemens. Diſſert. Chriſtanopolit. §. 3. (dd) Idem ibid. §. 5. (ee) (ff) Idem in eadem Diſſert. (gg) Lipſ. Cent. 2. ep. 98. (hh) Vernulæus Apol. gent. Auſtri. C. 2. (ii) J. C. ſum. Anglic. (kk) Vernulæus Apol. pro gente Auſtriæ C. 2.

RELIGIO FAUTRICEM SUAM COMMENDANS AUSTRIACAM DOMUM, PRO ILLIUS PERENNITATE PERORAT.

AUSTRIA, Regnantum Genitrix, dominabere mundo,
Sceptrigera felix Jura datura manu.

Stabis; me Superi TIBI Firmamenta dederunt,

TU pia, quod dederint me tua fulcra, facis.

Fulta mihi, nutare nequis; *Divina tuentis*

Imperij, nunquam forsque, salusque ruunt.

Quò mare, quò tellus, quò Cœli sidera currunt,

Relligio omnigenas mensa, remensa vias.

Est vario (fateor) Divorum cultus in orbe :

Vidi ego thuricremos igne micare focos.

Una tamen reliquis, O AUSTRIA! charior oris,

Es mihi delictum, TU decus esque meum.

TU pretiosa Parens, sacris fecunda Monarchis,

Quos pius in Superos, ardor, amorque regit.

Illis Cura Deo famulantia corda litare,

Primus & his Cœlo, sacrificare labor.

Si memoro AUGUSTOS (HABSPURGI Nomina) Reges.

Tot mihi Cœlicolas Nomina magna dabunt.

Conditor AUSTRIADUM Pietate RUDOLPHUS inardet,

Astra, pius Princeps, MAXMILIANE colis.

Novi FERNANDOS zelo, cultive valentes,

Et magè Pellæo sacra parasse duce.

Non cessasse Numæ, plus sed coluisse PHILIPPOS

Cœlum, est Hesperijs Gloria prima plagis.

AUSTRIA semper habes divinæ laudis ALAUDAS.

Quæis recreent Numen, carmina blanda canunt.

Hinc flores, hinc Regna domas, hinc laurea ferta

Circumfers, hinc TE Sors DEA mira fovet.

Hinc crescis, pleno hinc te ditat Gratia cornu,

Hinc Charites largæ maxima dona ferunt.

Hinc fulges, hinc Regificis redimita Coronis,

Prodigium mundo, faustior una regis.

Regna fovet Pietas. Superos coluisse, beatos

Efficit, atque fovet prosperitate Thronos.

Regibus Astra favent zelantibus Axis honores,

Quique colit Superos, ille Monarcha viget.

Non sinit involvi vicibus DEUS illa sinistris

Sceptra, Poli quorum est instituisse decus.

AUSTRIA tu nosti, Divorum experta favores,

Panchæo venerans Thuris odore DEOS :

Quid profit dio Reges succendier æstu,

Utque Polo sacros Numina prona juvent.

Ottocari dum Marte videt sua castra RUDOLPHUS

Diripienda, genu supplice vota facit.

Vota facit, revocatq; suas Victoria pennas,
 Imponitq; pijs laurea ferta comis.
 MAXMILIANUS ovat, fuso hoste refertq; triumphos,
 Victorem Pietas, Relligioq; facit.
 AUSTRIACUS Macedo CAROLUS duce praelia Christo,
 Piscaia in portu fausta fuisse docet.
 Tempora FERNANDUS vixitq; secunda secundus,
 Armigerum pro se dignus habere Polum.
 Tota RUDOLPHIADUM Divis devota Propago,
 Divorum stabili tuta perennat ope.
 Sic HABSPURGA meas virtus dum nutrit acerras,
 Imponitq; sacris dona Sabæa focis.
 Devincit Coelos, & vinci nescia floret;
 Glorior! hoc nostræ est Relligionis opus.
 AUSTRIA fide meis cultrix innixa columnis,
 Ut stes, ut nunquam commoveâre, precor.
 Ut fortunatas semper modereris habenas,
 Sic oro æternos voce rogante Polos.
 Numina! Relligio supplex vos Thure salutat,
 Jungit & orantes, vos meritura, manus.
 Cor servate Orbis, cor custodite fidele,
 AUSTRIACA est nostrum cor, mea vita, DOMUS.
 Este Aquilis Aquilæ, Superis defensa sub alis,
 Hæc sacra progenies Regia sceptrâ rotet.
 Me fovet, Illa parata suis cessisse Coronis,
 Pro me sollicito Facta labore movet.
 Me cupit Illa omni sanctè dominarier orbi:
 Me cupit omnigenis Hæc habitare plagis.
 Promovet, exaltat, zelans dilatat, & auget:
 Custos, servatrix Hæc mihi fida manet.
 Exilium haud metuo, quod si illa superstes, Olympi
 Filia non rabidas horreo tuta minas.
 Tartareo quoties fueram consumpta furore,
 Heû Erebi quoties dente petenda fui!
 Dextra RUDOLPHIADUM si non zelosa juvamen,
 Instantiq; malo suppeditasset opem.
 Sæpius Andromedæ gemuissem tristis imago,
 Pabula monstrosæ certa datura feræ.
 Perseus AUSTRIADES ni libertate cupita
 Soluisset nimio membra ligata metu.
 Extimui lapsus flendas sensura ruinas,
 Fulcrum ni AUSTRIACUS me tenuisset Atlas.
 Desinet hic nunquam mihi se dare fulcra basimq;
 Nec metuo Cauros, nec feritate Notos.
 Ut mihi substernit tentatæ brachia fulcrum
 AUSTRIACO Atlanti sim quoq; fortis Atlas.
 Atlas fortis ero, nam vos pia Numina vultis,
 Cui Pietas cordi est, stet Pietate Regens.

PRU-

INGENIO REGITUR.



PRUDENTIA.

*Quam vis non potuit , deducit in æquora molem
Arte Syracusij machina facta senis.*

*Ingenio regitur. Vastum Prudentia regni
Promovet, & potior viribus urget onus.*

*Austriaco fausti populi gaudete Monarchâ.
Consilium junctum robore Cæsar habet.*



Ruētus honos oneris , fructus honoris onus
nunquam veriùs , quàm in Principatu. Factus non fictus
Reipublicæ Atlas gravissimam molem humeris suis impo-
suit ; quisquis cum Principatùs honore in se recepit *ardu-
um, & sujectum Fortuna cuncta regendi onus.* (a) Gra-
vissimarum rerum pondere pressus succumbet ; si valida
desit par ferendæ moli virtus , non humeris , sed capite.
Regnantium Corona uni vertici imponitur , Politico indi-
cio ; Boni publici magnitudinem non valido sustineri lacerto , neq; robusta ossi-
um , & nervorum compage , sed capite , uno ferendæ Reipublicæ instrumento ,
non cranij firmitate , sed cerebri vastitate. Hujus magnitudo mensura est ma-
gnitudinis Imperantium ; quia inde *rectaratio agibilium* , Prudentia. Quando
indissolubili nexu felici Principi nubit Fortuna , unam Prudentiam affert in dotem
summum boni publici thesaurum. Cum publicum ærarium aut exhaustum , aut te-
nue , privatæ opes accisæ , belli nervus , & cum eo robur Reipublicæ , remissum ;
nihil amisit , qui regnat , si Prudentiam retinuit , sat dives modò recuperandi amif-
sa. Secus omnia perdidit , etiam dum habet , jam amisit , Prudentiâ destitutus. In-
de *Regium quidem ornamentum virtutum omnium concursus est ; Prudentia tamen
præ cæteris maximè Regi convenit* , (b) quia maximè necessaria. Quacunque vir-
tute neglecta durare potest in Solio , aut lege Rex , aut vi Tyrannus ; sine Prudentia
neutrum. Si in privata familia , quantò minùs in publica Fortuna *non potest esse
bonum aliquod propriè sine Prudentia.* (c) Rudolphus I. Imperator Magnus pace , &
bello Princeps , quod multâ experienciâ imperando didicit , ut alios doceret ; symbo-
lo suo verba præfixit : *Regni Prudentia Custos*. Ad publicam beatitudinem Fortuna
donat media , usum Prudentia. Non acinaci , sed brachio pugnae victoria adscribi-
tur ; quia hoc ille regitur ; neq; armis , & opibus salus Reipublicæ attribuenda , sed Pru-
dentia , quæ utrumq; moderatur. *Plura in summa Fortuna auspicijs , & consilijs ,
quàm telis , & navibus geruntur.* (d) Plus mentis , quàm ferri acie in bello decerta-
tur. Neq; manus , & tela , sed caput præcipuum est victoriæ instrumentum. Magis
semper ingenium Principis , quàm militum gladius in hostium vulnera acuendum est
ad victoriæ triumphum. *Vis consilij expers ruit mole sua.* (e) Nunquam securiùs
Cælum punit corpus Reipublicæ , quàm cum illi Caput præposuit sine capite. *Ine-
luctabilis fatorum vis , cujus fortunam mutare statuit , consilia corrumpit.* (f)

Prima illi sit prudentis consilij cura , qui Rempublicam curat. Paucis compen-
dio

dio verbis , ingenti sensu , difficillima omnium , & vix assequibili operis executione munus Imperantis describitur. Circumspectus etiam in minima , omnia videat , prævideat,provideat, temporis,& occasionis nundinator : Argus in suorum,& exterorum intinia,ignoret nihil,nihil sibi casu evenire patiatur. Ah grande molis negotium! Profectò vel hinc *arumnosum* , & *curarum innumerabilium videtur esse , alicujus officij Principem fieri.* (g) Fortissimus bestiarum Leo , etiam dum dormit , non claudit oculos , semper vigil , quia ferarum Rex. Quodlibet Reipublicæ munus curâ quandoq; solvitur , sibi indulget ; Regnantium nunquam. Ut bene regat , perpetuò scrutetur necesse est futurorum dispositiones , præsentium difficultates , præteritorum exempla ; ut ex his remedium ponat prioribus sapienti consilio. Majorum exempla paribus Regum casibus magnum sunt magni consilij compendium. *Certissima conjectatio colligere gerenda gestis.* (h) Antequam agere cœperint , jam norunt rei eventum Regnantes , Majorum exemplo. *Exempla plurimum in consilijs possunt.* (i) Dubiarum rerum exitus historia Principem doceat,non experientia. Malè sapit , qui ut saperet , prius desipuit , factus prudens aut damno suo , aut periculo. *Misera ex periculis facta Prudentia.* (k) Ne periculum subeat , cernat ; num adsint apta fini media ; discernat optima , priusquàm negotium decernat.

Belli , & pacis Arbiter Princeps Reipublicæ Janus est , sed bifrons ; ut in omnem partem intentus omnia agat providè , & circumspectè. Neq; malè dixerit politicus : ideo bifrontem Reipublicæ Janum ; ut unâ eâq; tota mente in ærarium , altera in ministrorum munia respiciat. Ærarium , & Minister duo poli sunt , quibus totû , quantum est , semper vertitur cælum civilis beatitudinis. Ut utrumq; firmum servet Imperans ; utrumq; accuratus observet. Sciat , num veniant , & quo abeant reditus , atq; ut uberius redeant , modum habeat prudens Oeconomus. Non dedecet magnos Imperantes publicæ œconomix studium ; siquidem munere suo *non dominationem , & servos , sed rectorem , & cives Princeps cogitet.* Sine hac leve semper , quia vacuum est Principis ærarium : & cum eo nequè Suis , nequè Exteris Princeps magni ponderis. Aurum nunquam veriùs , quàm in Reipublicæ ærario metallorum gravissimum : quia graviozem Principem , quàm ærarium reddit.

Ut uterq; gravis sit , gravandi moderato tributo subditi : Verùm ut dent , daru prior modum , unde accipiant , artibus , & commercijs. Natura comparatum est , imò Numinis altâ Providentiâ ; ut pars orbis una alterius ope indigeat ; mutuo sibi respondeant beneficio ; hinc humana coaluit societas. Grandi pretio ingens damnum emit , qui Regionum amplitudinem bello comparavit Princeps , si malus œconomus ; quia non accipere , sed dare acquisitis tributum debet de suo , ut servet. Vel in hoc *qui regnat , si sapit , beatus est.* (m) Tum enim verò , quod ignoravit antea , primùm intelliget , quid sit esse Imperatorem : Doctus æstimare se , & sua , idem docebit etiam Exteros , divite ærario , Ministrorum solertiâ cunctis formidabilis.

Nunquam tamen insolescat potentiâ , memor veritatis :

*Nunquam placidam Regna quietem ,
Certumve sui tenere diem.* (n)

Nullus hostis adeò debilis , ut contemnendus. Etiam musculus elephanto sufficit ad interitum. *Brevibus momentis summa verti possunt.* (o) Si vel minimus adverteretur , non temerè rejiciendus , sed consilio ; quia temeritas nunquam sine dispendio. *Consilia callida , & audacia prima specie læta , tractatu dura , eventu tristia.* (p) Ex adverso : *Ille sunt robusta , illa diuturna , quæ Prudentia incipit , cura custodit.* (q)

Nun-

Nunquam uno in negotio uni fidat consilio, pluribus semper in plures eventus paratus: si non cedat unum, succedat alterum; præsertim, si cum callido hoste negotium, qui uti facile animadvertere, ita avertere, imò in damnum tuum invertere consilia potest. Callidè cum callidis, vel tum maximè tibi suspectis, cum videntur simplicissimi. Est sanè, & recens, sæculi nostri genus Politicæ, negotia sine ambagibus, sine mysterijs, palàm & apertè parare, bello præsertim, ut aggressurus vincas facilius, dum fraudibus assueti longè alia te meditari credunt, parati ad resistendum alibi, imparati in id, quod apertè divulgâsti. *Sic Sapientia & Consilio magis quàm armis tuantur Respublica.* (r)

Hæc Imperantium magna negotia, magnis adjutoribus egent: (s) siquidem humana imbecillitate *non potest scientiâ suâ Princeps cuncta complecti.* (t) Manus manum lavat, & alterius auxilio vivit alter, etiam Imperans. Plures oculi plura vident, in Politia etiam plurimi non omnia. Plures habeat, qui sapienter regnat; ut *discat à peritis, sequatur optimos.* (u) Quos ut aptos seligat, inspiciat peritiam & ingenium, sed omnium maximè animi genium. Consilia semper cognitione quadam occultâ sequuntur genium. Sciat, *nullum virum impium prudentem esse posse.* (x) Hinc sapientes Principes arcanis etiam negotijs Ecclesiasticæ dignitatis viros miscuerunt, tutiores horum consilio, quo illi probiores animo: Hos *Princeps ore libero loquentes amet, blandientes odio habeat.* (y) Nulli enim magis, quàm Imperantibus *peßimum genus hominum, qui verba gestant.* (z) Verùm sic agat, ut omnia eorundem sensa sibi, non sua ipsis pateant, quantumvis fidissimis; nam ad rerum agenda- rum securitatem eos *tam nescire quadam, quàm scire oportet.* (aa) Semper armatus meliùs in perfidiam stat Imperans, qui occultum sibi telum reservavit.

Cum ad operis executionem medijs eget Ministris, *Non uni omnia deferenda, plures faciliùs munia Reipublicæ sociatis laboribus exequuntur.* (bb) Nunquam admittit prudens Politica, ut in unum subditum nimia conferatur potentia. Suspectus regnanti Minister, quia omnia unus ministrare prensat; multùm obsequiosus famulandi titulo petit imperare Princeps alter: sed *nil salutare agi potest, ubi qui parere debebant, imperare volunt.* (cc) Si cælum Reipublicæ secundum Solem non patitur Dominum, quomodo famulum Principem? Monstrum est Politicum biceps, Reipublicæ præsertim, si capitis locum etiam pes obtinet. *Non multùm fiducia in corona ponendum, ubi supra caput calceos cernis.* (dd) Quantum extra subditi sphæram crevit potestate Minister, tantùm Princeps decrevit dignitate. *Præcipuum indicium non magni Principis, magni liberti.* (ee)

Tam magnus quisquè est, quantum alij erga se minores; tunc maximus, si solus magnus; tunc solus, si ipse rebus adsit. Quod magnum reddidit Trajanum, illud erat, quòd *velocissimi syderis more omnia inuisere, omnia audire, & undecunquè invocatum velut Numen adesse, & assistere solitus sit.* (ff) Quid immortale illud decus Austriæ Quintum Carolum incomparabilem sæculis triumphatorem effecit? præsentia. Verè belli fulmen, jam in Africa, mox in Europa, modò in Germania, iterum in Hispania, non tam tonabat fulminis more bellicis facinoribus, quàm fulgurabat victoriarum & gloriæ splendoribus; quia prior ipse rebus præsens, quàm adesse posse crederetur. Idoli Aulici consilium est: *Principibus adeunda sæpius longinqua imperia.* (gg) Si non corpore, saltem mente per mappas geographicas peregrinentur quotidie, propria inspiciant, extera considerent; videant aliorum vires, mensurent suas, & commensurent; sic prosperè regnabunt. Philippus II. Hispaniarum Rex, Maximus Orbis Monarcha, quem nec sol integrum vidit, nisi orbem totum

circumiret; perspicaci sedulitate se tantum fecit, dum domi sedens politica lance librabat continuò non suam modò, sed terrarum orbis, bello & pace, fortunam. Apud sapientem Principem, *opes publicæ contineantur, quantum civium sociorumque in armis, quot classes, provincia, tributa, aut vectigalia, aut necessitates, aut largitiones.* (hh) *Multi enim ignorant vires suas, & dum se tam magnos, quam audiunt (ab adulatoribus & parasytis) credunt, attrahunt supervacua, & in discrimen rerum omnium superventura bella.* (ii) Magnorum error nunquam parvus, quia nunquam de parvis, quantumvis parvâ negligentia.

Nihil negligendum Imperantibus, tempus minimè. Momenta rerum summa momentum tenet. Quod prudens parturit consilium, non tumulet inutilis mora. *Cunctando senescunt consilia.* (kk) uti senes invalidi corpore, ita consilia cunctatione sine viribus. *Cunctatio servilis: statim exequi Regium est.* (ll) Præcipitancia quidem semper Principi cavenda, quia indivisa comes periculosi discriminis: Princeps autem *non omittere caput rerum debet, neq; se, remq; publicam in casum dare.* (mm) Verùm Politico hic opus perspicillio, gnaviter lustrante, ne *quod segnitie est, sapientia vocetur.* (nn) In dubijs & periculosis negotijs

Graziorum turba malorum

Texitur, ignavis trahimus dum tempora votis. (oo)

Si tamen ita fert rerum inconstantia, & mutatae vices: Tempora Tempore Tempora. Cede tempori etiam recedendo à consilio. *Honestè cedit, qui tempori cedit.* (pp) *Non putabam* vox probrosa antiquis in omni viro, præsertim Principe, sed quamdiu homines sumus, quandoquè necessaria. Melior est consilij mutatio, quam error. *Non est levitas à cognito, & damnato errore discedere; sed ingenuè fatendum est: aliud putavi, deceptus sum. Hæc verò superba stultitia perseverantia est.* (qq) Paucis multa; Tota publica fortuna, prudens Imperans, et tum beata Respublica, si aut docti aut sapientes homines eas regere cæperint, aut qui regerent, omne studium in doctrina & Sapientia collocarent. (rr)

Atq; hinc beatam dicent Germaniam omnes Generationes, etiam exteræ, quæ sapientissimo consilio de sapienti sibi Principe providit in TE, Auguste NEO-REX JOSEPH. Ex Juventute Drusus prævidit inflexibilem gravitatem Catonis, Scipio Politicam Marij prudentiam, Pompeius constantem libertatem Cassij, Sylla incomparabilem magnanimitatem Pompeij. Etiam in tenerioribus annis tuis, quia Prudentiam moderando Orbi parem non levibus indicijs collegit serenissimum Electorum Collegium, TE Magne Princeps, in suum sibi caput delegit. Collecta ex Augusta Tua Indole Prudentia vota collegit Principum, ut de Te ad supremum Orbis fastigium evehendo non tam suis, quam Orbis universi votis conspirarent. Non mirum; siquidem

Cæsaribus virtus contigit ante diem. (ss)

Cæsar dignitate, Cæsar sapientiâ, æmulus primi Cæsarum, cui in moderanda Republica *nihil incognitum, consilia, loca; prompta, occulta noverat, astusq; hostium in perniciem ipsis vertebat.* (tt) Ita sanè in hostium perniciem nullum aliquando lethalius telum Prudentiâ Tuâ. Hæc justissima Tua cœpta triumphali exitu coronabit, dum

aliàs sæpe honestas rerum causas, nî judicium adhibeas, perniciosi exitus consequuntur. (uu)

(a) Tacit. 1. an. (b) Sines: ar. de regno. (c) Arist. 6. Eth. c. 5. (d) Tacit. 13 an. (e) Horat ode. 3. (f) Velleius l. 2. (g) Apuleius de mundo. (h) Pac. Paneg. (i) Fab. 3. c. 10. (k) Plin. Paneg. (l) Tacit 13. an. (m) Apuleius de Syll. categ. (n) Senec. in Agam. (o) Tac. 2. an. (p) Liv. l. 35. (q) Cassiod. i. 25. (r) Plato (s) Velleius l. 2. (t) Tac. 3. an. (u) Tacit. vita Agr. (x) Arist. in Ethic. (y) Dio l. 56. (z) Sen. ep. 123. (aa) Tacit. 1. hist. (bb) Tacit. an. 1. (cc) Dio l. 41. (dd) Plut. de geren. rep. (ee) Plin. Paneg. (ff) Plin. Paneg. (gg) Tacit. 3. an. (hh) Tacit. 1. an. (ii) Sen. 6. de benef. c. 30. (kk) (ll) Tacit. 6. an. (mm) Tacit. 1. an. (nn) Tacit. 1. hist. (oo) Claud. 2. Eutrop. (pp) Lips. l. de vera Relig. (qq) Sen. de benef. c. 38. (rr) Plato. Cic. ad Q. Fr. (ss) Rigard. 159. (tt) Tac. 2. an. (uu) Tacit. 6. an.

PR U-

PRUDENTIA IMPERATORIARUM VIRTUTUM PRÆSES.

Everte fractis Roma marmoribus feri
Everte Regis atria:
Everte Memphis, quas tuis quondam Dijs
Perennè stare jufferas
Pyramidas. Ister nempe non aliam sacræ
Adorat Ædis Præsidentem,
Nisi AUSTRIORUM Regiâ natam Arbitram
Te Diva, Te Prudentia!
Miraris ætas prisca? posthumæ lege,
Vide, stupefice tempora.
Est DOMUS ab Aquilis celebris, & laudem quoq;
Traxit ab ALAUDIS. Sanctius
Regina spirans Numen hîc sceptrum rotat
Vigiliq; pensat lumine
Momenta Regni. Num ense felici arbitro
Gradivus arma provehat?
Civesq; justâ lance moderetur Themis?
Num Res-avitis-publicæ
Pronum renatæ legibus tollant caput?
Sic Regna cautè despicit,
Partesq; in omnes Præses excubias agens,
Consilia Regum temperat,
Legesq; dictat. Hoc ab Augusto Lare
Tot prodijisse maxima
Mavortis hodie Fulmina Heroës liquet,
Quot nostra magni nominis
Austria remensis Cæsares ceris legit,
Quæis ulla vix *Felicitas*,
Innumera sed *Prudentia* elâpsis retrò
Trophæa lustris contulit,
Et ad triumphos regiam domito viam
Niveas quadrigas præparans
Aperuit hoste. Scilicet non tam viri,
Reges, sagacis ingenii
Mucrone, quàm *Ratione* confundi sui
Hostes sciebant Imperiû.
Hinc Cæsar etsi nomen *Invicti* tulit,
Aut *Gloriosus* audijt?
Aut *Magnus* ipsis interuit Astris caput?
Respondit omen nomini,
Si pulchra *Sapiens* facta consilijs probet.
LEOPOLDE prime Cæsarum!
Hoc jure Primum vendicas tibi decus;
Nam prima dos Prudentia

Ut debet esse Principum, & Regum Nota :
 Devota sic Prudentia,
 Et sola Primo debuit fieri nota,
 Quâ terminaret Arbitrâ,
 Quoscunq; lentis seu domi motus diu
 Armata coxit fraudibus
 Perfidia; seu quas patrijs pleno impetu
 Regnis procellas Thracicus
 Infudit æstus. Ipsa Lætitiæ suo
 Vena aruisset alveo
 Vienna, nuper quando Threjcia æneâm
 Bis mille foeta Barbaris
 Depluit in ipsum grandinem nubes sinum;
 Ni vel per ipsa Bistonum
 Calcata præceps funera gradiens viam
 Certæ ad salutis anchoram
 Prudentia Tua, Magne LEOPOLDE! invia
 Fecisset urbi. Scilicet
 Nullo Viennæ Marte jam venit Salus,
 Spes nulla ab armis fulserat.
 Quid enim salutis Marte sperâsses, ubi
 Solis sub unda piscibus,
 Avibus in aura liberum solis iter
 Relictum ad urbem cerneret?
 Sed quam negârunt arma, LEOPOLDI dedit
 Prudentia urbi semitam.
 Prudentis Hæres Indolis, & alter Patris
 Rex Gnatus audit Æmulus,
 Qui majus annis ingeniû robur parat,
 Dignosq; Rege spiritus
 Cum lacte sugens, audet in teneris ea,
 Quæ vix labore consequi
 Herculeus ausit animus. Integram AUSTRIA,
 Jam spem resume, & fraudibus,
 Liquidisq; dudum cocta consilia dolis
 Sub laureato vertice
 Ruitura crede, quando JOSEPHUM alterâ
 Clarum Coronâ Patriæ
 Plaudentis inter vota Romani novum
 Regem salutas Imperiû.
 Sic ominari certus eventus jubet,
 Hac lege dum Prudentia
 Teneris ab annis imbuit Regem, ut suos
 Clemens Amore subditos
 Regere, severus sed jugum vindex pati
 Hostes Timore disceret.



JUSTITIA.

Cuiq. suus speculi datur hac sub imagine vultus:

Justitiæ quis non dixerit esse typum?

*Nomine Justitiæ quidquid venit, omnia Magni
Cæsaris, & virtus omnia Matris habet.*

Exprimis Augustos animo JOSEPH Parentes;

Justitiæ speculum es, quis neget? AUSTRIACÆ.



Ulla virtus, quæ non deceat Principem, nulla quæ non ornet, sola Justitia facit. Nequè ullo vitio citiùs Princeps desijt esse Dominus, quàm iniquitate. A regendo Reges dicti juxta nominis etymon non sibi, sed alijs facti sunt; ut per illos alij invicem, ipsi omnibus, reddant *cuiq. suum.*

Hoc uno Reges olim sunt sine creati,

Dicere jus populis, injustaq. tollere facta.

Propria Regum virtus, quâ Purpura à centone secernitur; sine qua quisquis imperat personatus in scena Princeps est, & cum eo Respublica præter inane nomen, nihil. Ad Plutarchi mentem, *ne Jupiter quidem rectè imperare potest sine Justitia.* (a) Non mirum; siquidem anima Reipublicæ æquitas est, quæ si exspiraverit, pulcherrima quæq; communitas deforme cadaver est. Bellè Augustinus: *Remota Justitiâ, quid sunt regna, nisi magna Latrocinia?* (b)

Ultima Cælestium terras Astræa reliquit, (c)

Principes sui loco terris imposuit terrestria Numina, quibus suam commisit bilancem, unicum regnantium instrumentum, quo se perpetuò occupent; *ut constanti, & perpetua voluntate jus suum cuiq. tribuant.* (d) Hinc Jovis Alumnos Antiquitas dixit, quorum servare bonos, plectere sceleratòs, universos legibus moderari unicum negotium. Sanè magna pars Deitatis est Princeps justus; naturâ inferior, par officio, in se minor, in alios cum Dijs idem. Quem omnes super terram respiciunt, unum extra terram Numen suspicit se majus; cui nunquam aptiùs licat, imò gratiùs, quàm ad Themidis altare thura bonarum legum.

Provida severitate curet Princeps, ne fundata legibus eversa videantur. (e) Nequè honori, nequè utilitati suæ consulit Novator. *Veteribus, nisi quæ usus evidenter arguit, standum.* (f) Prima boni Regnantis sollicitudo legum observantia. Omnium Dominus, solius legis servus est. Omnes uni serviunt, ut unus legi serviat. *Publicæ utilitatis minister, & æquitatis servus, nec supra leges est; sed leges supra Principem.* (g) Infelix Respublica, ubi legum sanctitas Regnantis voluntas est; quæ si publicam salutem fragilitate sua circumferat, cum sæpius cespitet; quid mirum, si casum secum trahat universorum. Monet Tullius pro Cluent. *Judex cogites tantum sibi permissum esse, quantum commissum, & creditum sit;* ut non quod lubet, liceat; sed quod per leges licet; lubeat; secùs, lege excussâ, facilè Princeps ipse excutitur, cum sola lex sit modificatio Politica, quæ Principem Throno affigit.

Non semper perfidorum malitia, sæpe imperantium injustitia seditionum mater est. Qui Deorum immortalium favores Principi & precari, & expetere debet subditus, sæpe ultores invocat Rhadamantos. Nesciunt sæpe Coronata Capita, unde Regnorum infortunia, suorum clades, & ruinæ; dum est, qui latens in angulo amarus animus Nemesein à cælo provocat injuriæ ulticem. Pauperum querelæ cælos penetrant, dum alteri succumbunt, quia potentiori. Maximi Principes pro minimis maximè facti sunt, ut à præpotentibus tueantur. Inæqualia Reipublicæ membra in Justitiæ libra æqualem sedem obtinent, imò quia minora, in balance faciliùs locum inveniunt sub bono Imperante. Malè audit, qui regit, si non infimos promptus audit. Viduæ desolatæ, pauperes pupilli Justitiæ pupilla sunt, quos quisquis læsit, offendit Justitiam, ubi delicatissima est. Magnus Rudolphus Austriaci Imperij phosphorus Magni Principis punctum tulit, quando tenuiores ad se volentes à satellitio submoveri cernens cum stomacho dixit: *Per Deum! sinite homines ad me venire, non enim ideò ad Imperium sum vocatus, ut in arcula includar.* (h) Si pari in officio, etsi impar dignitate, paria & dixisset, & fecisset Philippus Macedonius, à repulsa vili anu non sensisset aculeum objurgatus, dum audijt: *Si Rex: audi, & judica: si nolis; alium præesse sine.* (i) Audacula non parum anus, & senili in corpore nimium vegeti spiritus. Verùm nihil æquè effrontes, & cultus in Principem oblitos reddit subditos, quàm negata Justitia.

Rerum in Regno arbiter, uti bilancis, ita & oculorum fasciæ ab Astræa acceptæ nunquam obliviscatur; ut obligatis oculis, dum judicat, nullum respiciat. Ut æquum tangat Justitia, nūquam meliùs videt, quàm cum cæca est. Nequè meliorē inter litigantes partem eligit, quàm cum nullius personam aspicit: imò, si ita opus, nequè suam. Nihil fere majus ad Trajani sui laudes ferre poterat encomiastes, quam ubi dixit: *Gloria tua est præcipua, sæpe vincitur fiscus, cujus mala causa nunquam est, nisi sub bono Principe.* (k) Gratulor tibi fortunata ætas, cui Trajani contigerunt Principes, aut Trajano pares. Quàm pulchrum facinus, dignum Trajano Imperante, fuit, qui dum Prætorio Præfectum in omnium conspectu gladio præcingeret, palàm edixit: *Accipe ferrum hoc, & siquidem rectè Imperium gesserò, pro me; sin aliter, contra me hoc utere.* (l) Non nosse seipsum, in cæteris omnibus vitio est, in sola Justitia virtutis.

Quamdiù hominem nosti, nulli sic fide; ut superioris oculo se liberum sciat. Cui nimium fiditur, sæpe præfidit. *Quis erubescit dicere? quid mihi dabis, ut tibi justitiam faciam? nam ut per se ipsa exhibeatur, frustra exspectas.* (m) Prima Imperantis cura ministrorum selectus: quos non affectus, minùs pecunia munijs aptet, sed virtus. Opto falsum dixerit Glaber. 2. *Reges, qui idonearum decretores personarum esse debuerant, munerum largitione corrupti, potiorē ad regimen judicant, à quo ampliora sperant.* (n) Opto inquam, non scio. *Certè malè se res habet: quod, cum virtute effici debet, id tentatur pecuniâ.* (o) Hinc confusio rerum, hinc patens porta sceleribus, hinc ilias malorum. Nequè opus longiùs causam inquirere, siquidem *necesse est, ut qui emit, vendat.* (p) Ah ferrea tempora! quibus in Justitiæ libra non jura, sed aurum ponderatur. Utinam solus fuerit Octavianus Augustus, cujus gubernium usuris, & violentiâ Publicani infamârunt. Majori imputatur, quod minor facit: si ille, cum potest, & debet, non impedit. *Principis invidiâ ab Officiarijs peccatur,* (q) Idoli Politici oraculum est; si dissimulat, si parcat, cum iniquum videt.

Quilibet sui erroris reus est minister; Princeps omnium; si dum publico providit de judice, non prævidit ex ejus moribus vitia; pessimè autem omnium, si dum malè acta scivit, non revidit ad correctionem. Non abeat impunè, qui publicæ injurius fuit fortunæ. Remittere injuriam Principis vix est, nisi suam. Uni quando-

quandoq; parcens, plures ferit: & dum unum plectit, multis prodest gubernator. Maximæ laudis Alphonso est Palentini Episcopi testimonium: quod in ejus regimine non opus erat Hispaniæ lictoribus; quia omnis injuria exulabat Principis justitiâ. Sic unius interitu plures servantur: & unica sæpe nocentis mors multos vivificat. Uti physico hominis, sic morali Reipublicæ corpori, ut à putredine & curetur, & præservetur, salutaris est moderata phlebotomia. Consulum Securis maxima regnorum securitas est. Natura non inducit subjectis formas, ubi nulla proportio: nec ratio statûs magistratibus viros, quibus nulla habilitas. Qui Bucephalum suum ad Romani Consulis dignitatem evexit Caligula, ut ut ridiculus posteris, Politicæ tamen moralitati dubium reliquit; num solus fuerit. Parum interest infelicitati Reipublicæ, seu hominis, seu equi vitio intereat.

Qui muneri publico Ministrum sui loco substituit, non tam potestate, quàm virtute statuatur alterum se. Non ætas, non patria, non conditio obstat, si adest virtus. Quis, quid, & undecunq; sit, ultrò accersendus à bono Principe, quia bonus. Cum aliquem rerum magnarum capacem audit, imò vel suspicatur; captet, qui sollicitè regit, notitiam: vocet: applicet salubre malis Reipublicæ cataplasma. Qui aptos ad munia approbat, aptum se imperio probat: indignum, si indignos. O quot latent sæpe in obscuro noctis perspicaces aquilæ, dum noctuæ supra candela-brum positæ diei præsent! verè noctuæ Reipublicæ, quia fatales. Quoties magnas indoles ad altissima quæq; velut ad cælum natas ingeminare cogit justus dolor æmulam Junonis vocem:

*Soror Tonantis (hoc enim solum mihi
Nomen relictum est) semper alienum Jovem,
Ac templa summi vidua deserui atheris,
Locumq; cælo pulsa pellicibus dedi:
Tellus colenda est, pellices cælum tenent. (r)*

Jacent nimirum in terra abjecti, quia *hominem non habent*, (s) qui elevet. Merita subditorum boni Principis regula sunt, ad cujus amissim non arithmeticè, sed geometricè favores suos conformet.

In honore, & in onere servanda proportio: minùs habentes in capite, non nimis efferendi dignitate: minùs possidentes in facultate non nimis deprimendi oneribus. Iniquum est gravare omnes, ut unus sublevetur. Iniquissimum, pauperum sanguine unius vitam alere parasiti. Tot titulis laudabilis Octavianus Augustus, iniqui notam non subterfugit, qui ad tributum onera uno in libro omnium nomina conscripsit, sed non divitias. Arare cum bove, & asello, vetitum est; ne idem jugum, quod robustior tulit, ferat debilius. Suum cuiq; jus, suus cuiq; honos, suum cuiq; onus. Non omnibus æqualia jura, nec æqualia onera; quia non æquales facultates. Hæc gubernantium ars maxima honore, & onere congruo præesse: In hoc à Principe imprimis justitiæ cura flagitatur. (t)

Hoc agat, hoc exigat, & si opus, vi cogat. Gladium portat & potestatis, & potentiae insigne. Si negat subjectus, poena Magistratûs; si exterius, belli vis extorqueat. Jus, & vis ipsædem literis, velut una prognati origine fratres sunt, quantumvis discordes. Caveat qui imperat; ne solitaria vis sine fratre procedat: hominum, Deorumq; præda exponatur, ad vindictæ aras victima indignationi immolanda. Vis, quando Juri sociata procedit, facile viæ comitem nanciscitur Fortunam. Hæc Juris constans amasia, undiq; post illud currit. Populus Romanus contra Pyrrhum bella gerens,
C 2 dum


dum pecuniæ passus inopiam, Junonem consuluit, responsum tulit: *ut Justitia armis bellaret: tunc pecuniam, & victoriam habiturum.* (u) Cum æqua est, & non alia, suum cuiq; tribuendi via, gladium Princeps exerat, acuat, ut partes dividat, optimam sibi reservaturus Justî nomine immortalitatem. Continuo magnorum animus recolat: *Optimum quemq; niti, & contendere debere, ut post se quoq; Reipublicæ profît, moderationis scilicet, Justitiæq; monumentis.* (x) Nunquam justius perennabit, quam justî famâ, qui regnat.

Æquus fuit Justitiæ æstimator sapiens Pericles; cum adulatrices Athenæ multis, & splendidis titulis illum posteritati commendare meditarentur: unam elegit antonomasiam, quâ dici voluit *Pericles Justus*. Uno hoc vocabulo non unam periodum, sed totam absolvi credidit boni Principis panegyrim. Nec immerito, quia *nullum aequè convenit regi, quàm justitiæ munus.* (y) Quid antiquis opus, recentiora habe, imò domestica. Fridericus Imperator Austriacus, dum non tam impia, quàm rustica, quia crassa quorundam Politica ei inconsultè suggereret, ut duo potentissima Hungariæ, & Bohemiæ regna, ad ingens Principatûs sui incrementum, unico intoxicatæ aquæ haustu emeret, quam regnorum hæres legitimus, impubes Ladislaus fidei Imperatoriæ creditus, ebiberet: indignatus erubescere fecit susurriones, dū diceret: *Quid ergò? divitem potius, quàm justum regem vultis?* O Vox digna Magno Principe, digna Austriaco! *Digna vox est Majestate regnantis legibus alligatum se profiteri.* (z) Digna vox regnante, imò quæ regnet; siquidem *Principis Legitimi est jus æquabile, honorabile, incorruptè judicare, semper meditari justitiâ.* (aa) Plusquàm verum est: *sine justitia nec Respublica, nec exiguus hominum cætus, imò ne domus quidem parva constabit.* (bb)

Et hoc erat, cur TE Magne Princeps, POTENTISSIME NEO-REX, tot Regnorum vota, populorum suspiria, subditorum unita lachrymis desideria adeò ferventi prece è cœlo sibi donari efflagitarunt; quia probè norant, si Principem obtineant AUSTRIACUM, Politico-morali synonymo habebunt JUSTUM. Astræa Justitiæ Præses DEA, cujus stellatis lancibus sit magna illa Justitia dierum, & noctium, in ipso cœlo primum AUSTRALIUM signorum est: Ut Politicus Astrologus morali oculo sidus intuens sciat, Justitiâ non Cæsaream tantum, & Augustam, sed AUSTRIACAM virtutem. Nunquam tulit orbis majora, quàm à Majoribus Tuis justitiæ documenta, seu Aquilis Augustis, seu Leone insignibus Monarchis. Ab His POTENTISSIME NEO-Rex cum avito sanguine, uti maximi Principis dignitatem, ita Justissimi virtutem traxisti hæreditariam. In Urbe natus, cui Libræ sidus dominatur, Justitiæ sede: ut scires solam Tibi à prima luce imperâsse Æquitatem, ut omnibus Imperares Æquitate. Seu pace tuos moderaberis, seu bello, Jus tuum aut tuta-beris, aut repetes; ibis felicibus Aquilis, quia Justis. Dum fortis requires, quæ tua sunt, Dignam Te Imperatorum Phœnicis CAROLI QUINTI progeniem probabis, quando Te Victorem orbis audiet similia CAROLO verba ingeminantem, qui dum Franciscum Regem bello repelleret, dignam tanto Principe usurpavit vocem: *Et si totum Franciæ Regnum debellassem; redderem illud Regi; modò id, quod jure meum esse contendo; mihi relinqueret.*

(a) Plutarch. ad Princ. indoct. (b) Aug. l. 2 de civit. Dei. (c) Ovid. 1 metam. (d) Ulpianus l. de Just. §. de Just. & jure. Liv. l. 34. (e) Plin. Paneg. (f) Liv. l. 34. (g) Plin. Paneg. (h) Lip. monit. Polit. l. 2. c. 6. (i) Idem. ibid. (k) Plin. Paneg. (l) Niceph. l. 3. Eccl. hist. c. 33. (m) Sareft. 5. 16. (n) Glaber 2. (o) Cic. de off. 2. (p) Lampr. in Alex. Seu. (q) Tacit. Annal. 3. (r) Seneca in Herc. fur. (s) Joan. 5. (t) Valentin. apud Zonar. tom. 3. (u) Suidas de Moneta Roman. (x) Plin. Paneg. (y) Plutarch. in Demetr. (z) L. 4. de legibus. (aa) Philo de Creat. Princip. (bb) Bachroch.

*DE JUSTITIA CAROLI V. NUN-
QUAM SUA, SEMPER ALIENA VOLUN-
TATE ARMA CORRIPIENTIS.*

Uæ vena Vatum, CAROLE Maxime,
Plenis honorum muneribus Tuas
Jus, Fasq; Virtutes ad unguem
Per lituos, & acuta belli
Effingat ? ô ! quem sol habitabilem
Vidit per oram, Æquissime Cæsarum,
Quem Fama, palmaresq; laudes,
Et famulô volucris triumphô
Latè per orbes gloria subditos
Duxit, secutis Principibus procul,
Quos Roma, Græcorumq; fastus
Indigetes, Superosq; dixit.
Te Peruanô Rex Atabalida
Captivus aurô, & divite Mexicô,
Qui sceptrâ Motezuma flexit,
Depositus didicêre, vindex
Quid Marte posses. Te gemini leves
Indi Pharetræ plûs vice simplici
Sensêre victorem, ac remissos
Brasilie tibi stravit arcus.
Te qui rapinâ victitat Armenus,
Maurusq; & Afer, Te profugus Nomas,
Chilique Regnator potentis
Compositis veneratus armis.
Te militaris mænia Belgicæ,
Hetrusca tellus, Te genibus minor
Gallus, supinatusq; plagis
Pacificum pepigit Sicamber.
Te non paventes funera Teutones,
Bojusq;, & Anglus, Te Pelopis Domus
Audivit, invictisq; Pyrrho
Chaonie tibi cessit Argis.
Quid fracta Thraci tela satelliti,
Cæcamq; dicam Bistonidum fugam,
Aut ter fatigatos ruinis
Odrysijs memorem Tyrannos ?
Te pronâ adoravêre crepidine
Ararq;, & Albis, Te famulus tulit
Garumna, & immensum receptis
Danubius tibi crevit undis.
Te victus arsit flumine supplici
Cum Scalde Rhenus, Te Rhodanus celer,
Visurgis, & Mosa, & superbô
Eridanus coluêre fluctu.

Te belluosi littora Caspij ,
 Audaxq; nigri navita Bosphori ,
 Te Xanthus , Eurotasq; fortis ,
 Te Tanais procul unda pavit.
 Audimur ? an me fausta frementium
 Illudit Echo sæcula gentium ?
 Justumq; , Victoremq; in ævo
 Te CAROLI LEOPOLDE ferri
 Gratatur orbis : Martis in arduo
 Fulges triumpho , Te tituli Ducum
 Subter , coronatoq; Regum
 Exuviæ sonuere planctu ,
 Et scuta , truncis & Rhodopeiæ
 Telis pharetræ ; Te Getici volant
 Arcus adorare , ac ovanti
 Edomitum advoluisse cornu.
 Sed major æri , major euntibus
 In vincla Scepbris , laurigerum super
 Astræa se fundit Gradivum
 Cæsaris , æthereoq; Justi
 Serenat auro ; nam Tibi barbarus
 Seu deprecatis fluctibus accidit
 Pontus , supinatîve latè
 Lilia detumuerè thyrsis ;
 Astræa vicit : Fas lituis sacras
 Afflavit iras , Fas galeas super
 Scutiq; inardebat severum
 Fulgur , & intrepidus sarissis
 Accendit ignes : Ipse frementibus
 Torvum chelydri quin didicit furor
 Leges , anhelantesq; jussam
 Ad Themis assiliere parinæ.
 Et Te feroci Gloria carmine
 JOSEPH dicet , quem super aureas
 Astræa demirata cunas
 Per Patrium dedit ire passu
 Gemmante Justum : Jam procul obvias
 Palmas Idume , jam dominas Geta
 Triumphus insternit curules
 Per domiti capita alta mundi.
 O perge Victor ! quò Themidis viam
 Scribit volanti mucro , librataq;
 Virtute Majestas Paterna ,
 Austriacoq; Pium sereno ,
 Cælumq; jussit : perge per arduos
 Regum pyropos : donec in Imperi
 Stent orbe debellatus Ortus
 Solis , & Hesperium cubile.

CLE-



CLEMENTIA.

Trux, & ad arma ferox alieno robore fultus

Imperat, at suavis Principis est sua vis.

Hæc Orphêi similis cytharæ Vis erigit urbes:

Hæc cicurat Gentes; Hæc fera corda trahit.

*AUSTRIADUM capit hæc geminum Clementia mundū,
Quàm bene blanda Aquilis jungitur ergò Fides.*



Ulla fortuna adeò tenuis, quæ non Maximis Principibus par esse possit virtute, imò major: solâ Clementiâ Princeps solus est, cui nemo similis. Cum enim Clementia sit *lenitas superioris in inferiorem in constituendis pœnis*; (a) nemo clementior esse potest magno Imperante, quia nemo superior. Nobilissima inter virtutes gemma natalium splendore non nascitur, nisi ad diademata, & coronas. Hinc illi valor, hinc pretium.

Cœteræ virtutes dant Imperantibus pretium, vix accipiunt; hæc dat, & accipit; quia dum in coronis lucet, eò ampliùs splendet, quò Augustior est vertex, quem præcinxit. Non ingrata ob beneficium Principi, quia splendorem, quem recipit, ita refundit; ut eum præ cæteris terrarum orbi reddat conspicuum. Hoc fulgentem splendore Principem diceres quoddam redimitum radijs cœlestibus Numen; quoniam *nihil est tam peculiare Imperialis Majestatis, quàm Clementia, & Humanitas, per quam solam Dei servatur imitatio.* (b)

Bono Reipublicæ nati Principes tales non sunt, nisi boni. Si nubila semper cœli facies quemlibet malignum terræ vaporem cuderet in fulmina; non conservaret, sed perderet universum. Serena aëris Clementia, mitior Phœbus, malignum sæpe humorem, mitiores resolvit in auras; sic mundo præest, sic prodest. *Ut sol, quibus affulget, calorem suum impertit; ita ab Imperatore Clementia jis tribuenda, quos aspexerit.* (c) Carnificina est Respublica, in qua perpetuæ fontium cœdes, & funera. Cum natura innatam dederit mortalibus errandi fragilitatem; qui omnes tollere voluerit severitate, naturam tollat necesse est. Pœna bonum est Reipublicæ, si rara: aliquos quandoq; corripit, ut plures servet; omnibus pessima, si semper delinquentibus severa; quia omnes delinquimus humana imbecillitate.

Facile amittitur, quod obviè ostentatur. Qui perpetua severitate ostentat potentiam suam Princeps; caveat, ne perdat,

*Si quoties peccant homines, sua fulmina mittat
Iupiter, exiguo tempore inermis erit.*

Arma Principis manus sunt subditorum, quas si severitatē nimia aut fregerit, aut abalienaverit; nunquid inermis erit? Qui semper, ubi potest, officit; nunquam proficit. Apis pungendo amittit aculeum, Imperans authoritatem. Paucis multa

complexus Politicus, qui pungenti apiculæ inscripsit : *sibi magis*. Sanè plurimùm acceleravit Imperantium finem multa severitas, etiam tragicum; cujus sæpe Roma lugubre theatrum. *Misericordia, & veritas custodiunt Regem; & roboratur Clementiâ thronus ejus*. (d) Non mirùm: siquidem *remissiùs imperanti faciliùs paretur*. (c) Nero felix fuit imperio, quamdiù placidus Clementiâ. Quod famam ejus feræ posteritati commendabilem divulgavit; vox fuit, quâ dum à Burrho Præfecto sub Imperij initium urgeretur; ut sententiæ mortis subscriberet; exclamavit: *Vellem nescire literas!* (f) Ubi hæc primùm perijt, Neronem secum perdidit, ferali Romæ spectaculo, crudelibus exemplo. *Clementia non tam honestiores, sed tutiores præstat; ornamentumq; imperiorum est simul, & certissima salus*. (g) Maxima Politicorum est: *Potentiam cautis, quàm acrioribus consilijs tutius haberi*. (h) Cùm in spurios ramusculos protuberavit nobilis Reipublicæ arbor; si ferox nimium putaveris, fructum arida negabit, culpâ tuâ; succum abstulisti sanguinis profusione. *Leniter qui sæviunt, sapiunt magis*; (i) quia sapiunt ad utilitatem. Plurima efficies Clementiâ, quæ severitate vix sperabis. Scipio rebellibus legionibus in discrimen positus, clementi consilio & se, & Rempublicâ exitij periculo exemit; ita rebellium militum animos clementiâ lucratus; ut puduerit defecisse: devinxit fortiùs, quando nefas suum erubescens abolitâ præteritorum memoriâ dixit: *Utinam tam facile vos obliviscamini, quàm ego obliviscar*. (k) Ferrea militum pectora, severo justitiæ gladio vix pervia, lenis Clementia emollivit, penetravit, fregit. Sic Princeps *omnia scire debet, non omnia persequi: parvis peccatis veniam, magnis severitatem accommodare, nec pæna semper, sed sæpius pœnitentiâ contentus esse*. (l)

Non semper, cùm tonat, & fulgurat, etiam fulminat. Intentanda ab Imperantibus sæpius justitia, plùs ostentatione ad timorem, quàm severitate ad supplicium. Stellæ alioqui benignissimæ sub ferarum nominibus in cœlo fulgent; ut terreant, non ut noceant. Sic, qui velut sidus prælucet in Republica Princeps, vindicis Astrææ figurâ magis terreat, quàm feriat. Cœlestis ira priùs cometarum linguâ reum orbem increpat, quàm puniat; sirmate flagellum ostentat, priusquàm percutiat: sic cœli in terris Vicarij priùs emendare delicta quærant verbo, quàm verberare. Cùm nullum invenirent Athenæ seditionis componendæ medium ob reorum civium multitudinem; opportunum malo remedium, & quidem unicû, invenerant Clementiam; dum Amnestiæ legem tulerunt. (m) Sic reos servando, conservarunt Rempublicam: quos si perdidissent, cum ijs periissent. Princeps motrix est intelligentia solis Justitiæ, quæ vitalem dispensat calorem Reipublicæ; huic, si nimis sol appropinquaverit; non calefacit, sed comburet. Cœlum est, qui imperat, à cujus influxu virtutum viget bonum publicum. Non semper rigido Aquilonis turbine scœviat; ne exurat florem Reipublicæ. Sæpius clementi Favonio mulceat; ut floreat:

Pars eadem Cœli Zephyros emittat, & Euros. (n)

Ultimum remediorum malis Reipublicæ sit severitas justitiæ; quia non tam dubium, quàm periculosum. *Nemo ad supplicia exigenda pervenit; nisi qui remedia consumpsit*. (o) Bonus medicus leniori pharmaco ægritudinem tentat, priusquàm acrioribus aggrediatur. Extremi conatus sunt morientium. Si tamen aliud non superest malis remedium, quàm acerbitas Justitiæ; dulcescat moderamine, vulnus mollior tractetur. *Remedia, quæ alioqui natura sunt aspera, molli manu, & levi leniantur*. (p) Cùm feriendum, non impetu, sed lentè vibretur ictus; ut trahi, non abripi videaris. Irascatur delicto, non delinquenti. Doleat ipse prior, quàm imperet dolenda, augusto exemplo: *Augustum dare pœnas apparebat, quoties exigebat*. (q) Ex-

git tamen : quia etiam perpetua Clementia species crudelitatis est. Justus Princeps bonorum lucratur amorem, Clementia pessimorum ; dignus amore omnium, quia omnibus bonus, & malis. Alphonsus Neapolis Rex causam Clementiæ suæ rogatus, sapienter reposuit : *Bonos Iustitia conciliat, malos Clementia.* (r) Et quidem non suos modò, sed alienos ; non domesticos tantùm, sed externos : siquidem *nihil est, quod magis Principem Gentibus commendet, quàm Clementia.* (s)

*Romanum semper in armis
Horribilem, placidum gentes sensere subacta : (t)*

Hinc magnitudo Imperij. *Romani plus pene parcendo victis, quàm vincendo imperium auxerunt.* (u) Sunt enim *ad pariendum honorem potentissima Liberalitas, & Clementia.* (x) Magnus bello Hannibal, ut Italiam vinceret, imò penè victam retineret ; id agendum censuit ; *ut fama Clementia principio rerum colligeretur.* (y) Novit apprimè peritus bellator, *Novum Imperium inchoantibus utilem esse Clementia famâ.* (z) Nec solidè, nec tutè vicit, qui corpora, non animos devinxit. Vi subactis nocendi occasio, non animus deest : quam si humanarum rerum vicissitudo vel levem obtulerit ; novissima erunt peiora prioribus. Maximilianus II. regendi peritiâ celebris Imperator Henrico III. Galliæ Regi ad se Viennæ divertenti pro sedandis Reipublicæ turbis non aliud consilium tulit, quàm Clementiam. Invisus est Princeps subditis, cujus purpura plus reorum sanguine, quàm croco erubescit. Ipso cœlo exulant Numina reorum pœnis semper intenta. Deorum consortio extrusus, & infra terram intrusus Pluto : qui nescit nisi plectere, quantumvis reos. Tam magnus Princeps est, quantus Clementiâ est. *Magnam fortunam magnus animus decet, magni autem animi est proprium, placidum esse, tranquillumq̃.* (aa)

Timidi notam non effugit, qui omnia ulciscitur. Dissimulare una de primis legum est Imperantibus, præsertim in injurijs, etiam suis. Tum maximè Reges : quia moderantur non tantùm subditos, sed seipsos. *Clementia magis, quàm Ira decet Reges, & Lenitas animi magis, quàm Celsitudo.* (bb) Sub Mithridatis protectione publicum se Populi Romani hostem Tigranes profitebatur, & singularem Pompeij inimicum, spretâ per contemptum frequentius Magni personâ ; in bello dubium, an à Pompeij fortuna victus, an magis proditus suâ, non sine fastu arma, & coronam ad pedes victoris abjecit. Verùm noluit publicam, privatamq̃ injuriam vindicare victor : sed repositâ capiti coronâ donavit regnum, atq̃ injuriam : bis victor, & hostis, & sui. Hoc, si non alio magnus, & dignus, qui imperaret : dum imperantibus *quantâ pervicaciâ in hostem, tantâ beneficentiâ adversus supplices utendum est.* (cc) Pulchrum est vicisse seipsum ; pulcherrimum in Regibus : ubi eò major est plausus victoriæ, quò major victus. *Ita Clemens victor Alexander, ut acerbus bellator* (dd) duplicem meritis laurum ; qui curru triumphali Patriam ingressus victor, bello Imperator, seipsum etiam clementiâ ducit in triumphum. Sapiens gloriæ æstimator Trajanus, qui *Optimi cognomine magis, quàm ceteri gloriari videbatur.* (ee) Nec immeritò : siquidem *Pietatis tituli sunt omnibus honoribus pulchriores.* (ff)

In hoc discipuli omnes sint Alphonsi Neapolitani Regis, qui à suis clementiæ rationem rogatus, cum stomacho dixit : *Quid ergò, vultis urfos, ac leones regnare ? nam hominum clementia, belluarum feritas est.* (gg) Nulla decet oblivio Regnantes, nisi injuriæ. Ut ab ultione curetur animus, nepenthes herba medicina est præsentissima ; quam uxor Ægypti regis Helenæ dono obtulit, quæ rerum omnium molestiarum oblivionem inducebat. Qui non recordatur injuriæ, non ulciscitur ; sic nequè alijs

supplicio, nec sibi iracundiâ nocens. *Tutiùs est chordas remitti intensiùs, quàm pro-
tendi.* (hh) Rudolphus I. Imperator, dum quærentes audiret, cur clementior esset,
quàm Imperij initio fuisset? reposuit: *severum, & immitem fuisse me aliquando pæ-
nituit; lenem, & placabilem nunquam.* (ii) Audite Principes Theodosij verba, qui-
bus Honorium filium Magno Imperio parem parabat:

*Sis pius in cunctos, nam cum vincamur in omni
Munere, sola Deos aequat Clementia nobis.* (kk)

Sed non opus erat verbis Theodosio, se vel tacendo proposuisset, & in tacente
Patre legisset filius grande Clementiæ documentum. Fac Claudiane, poetico penicil-
lo, Virum depinge:

*Mitis precibus, pietatis abundans,
Pœna parcus erat; paci non intulit iram:
Post acies odijs idem, qui terminus armis.
Profuit hoc vincente capi, multosq; subactos
Aspera latura commendavere catena.*

O iconem præcellam Magni Principis! O ideam Imperantium! Bellè, &
bene; sed nondum optimè. Vivaciùs exprimunt Theodosium Codices; nam ani-
mam adijciunt, dum loquentem inducunt: *Si quis modestia nescius, & pudoris igna-
rus improbo, petulantiq; maledicto nomina nostra crediderit laceffenda, ac temu-
lantiâ turbulentus obtrektor temporum nostrorum fuerit: eum pœna nolumus subju-
gari, nequè durum aliquid, vel asperum volumus sustinere, quod jam, si id ex levi ta-
te processerit, contemnendum sit; si ex insania, miseratione dignissimum; si ab inju-
ria, remittendum.* (ll)

Habeat sibi suam in Theodosio Patre ideam Clementiæ Honorius: honoratus
recenti Romanorum coronâ Auguste Neo-Rex JOSEPH, accipe in Patre Tuo
Augustissimo TUAM, imò majorem. Non illam hinc depinxisse juvat, ne duxisse
penicillum credatur adulatio. A Clementissimo Patre non degener Filius, quia sapi-
enti consilio, non TIMORE solùm Justitiæ, sed AMORE pariter Clementiæ terrarum
orbi præesse statuisti; Vel hoc uno cum centenis alijs dignus Imperio, quoniam
Clementia Imperatorum prima dos. (mm)

*Flentibus aram,
Et proprium miseris Numen statuistis Athena.* (nn)

Misericordiæ videlicet, cujus templum ita clausum erat; ut sine Senatûs consen-
su nemini ingredi fas esset: quippe ibi tantùm Principum benigniorum statuæ collo-
cabantur. Augustissimam Domum Tuam, Auguste NEO-REX, Clementiæ aram cœ-
lum voluit, dum posuit: in qua tot Clementium Statuæ Principum venerationi mor-
taliū exponerentur; quot ex ea imperarent. Pace Regnantium dictum sit; quia ve-
rum: Quantùm Austria supra cœteros fulget imperiali fastigio, tantùm superat Clemē-
tiâ. Jure optimo: si enim *nullum Clementiâ ex omnibus magis, quam Reges, aut
Principes decet:* (oo) par est Regum maximos, & Augustissimos esse, & Clementissimos.

(a) Sen. l. 2. de Clem. c. 3. (b) Justin. l. vel Cod. de dom. (c) Zonar. Tom. 3. (d) Prov. 20. (e)
Sen. de Clem. l. 1. c. 24. (f) Senec. de Clem. l. 2. c. 1. (g) Sen. l. de Clem. (h) Tacit. ii. ann. (i) Plaut. Ba-
chid. (k) Liv. l. 38. (l) Tacit. in Agricol. (m) Plutarch. Polit. (n) Ovid. in Ibin. (o) Sen. de Clem. l. 1. c. 14.
(p) Fab. 2. c. 4. (q) Sen. l. de Clem. c. 10. (r) Lipf. Monit. Polit. l. 2. c. 12. (s) M. Anton. Phil. (t) Claud.
bell. Gild. 98. (u) Liv. l. 30. (x) Valer. max. l. 5. c. 3. (y) Liv. l. 21. (z) Tacit. 4. hist. (aa) Senec. l. 1. c. 3
de Clem. (bb) Joseph. 9. arch. 7. (cc) Tacit. 12. ann. (dd) Plut. in vit. (ee) Dio. l. 68. (ff) Plin. 3. ep. 8. (gg)
Lip. mo. Polit. l. 2. c. 12. (hh) Sar. 48. (ii) Syll. l. 7. de ejus gestis. (kk) Claud. (ll) Theod. lege unica c. si
quis Imp. maled. (mm) Vopiscus in Aureliano. (nn) Claud. bell. Gild. 465. (oo) Sen. l. 1. c. 3.

RUDOLPHUSI. ALBERTO FILIO,
DUM EUM AUSTRIÆ PRÆFECIT,
CLEMENTIAM COMMENDAT.

I, quo Vota Patris Gnatum, Septémque Virorum
Legant : habenas dirige
AUSTRIACÆ Gentis. Populos es nactus amicos :
Amorem amorì consecrant.
Sic rege : Non metuant Te , sed fac Dux, ut ameris.
Vultus sereni Principem ,
Innubésque animi commendant. Fronte severus
Exosus omnibus. Timor
Nusquàm corda sibi strinxit. Fortissima amoris
Sunt vincla ; nexu subditos
Conjungunt Domino. Sæpe obsunt frœna Timoris ,
Laxantq̃ ; , quando comprimunt.
Namq̃ ; Timor dominari animis haud calluit unquam.
Humana mens fruitur sua
Libertate. Ultrò vinclum patietur amoris
Benignius. Princeps miser
Quem metuunt unum multi : quos ipse timebit ,
Plures. In odia proruet ,
Vindictamq̃ ; querens vulgus sua funera. Cives
Crudelitate Regia
Adversis telis glomerantur. Atrocia Regna
Non sustinent. Atrocior
Pausaniæ vultus cives cumulavit Achæis,
Hos milites. Clementiæ
Sæpe illud suavis peragit tranquilla potestas ,
Violenta quod facere nequit.
Principis imperiosa quies vehementiùs urget
Mandata. Devium gregem
Panos suave melos mulcet : sylvestris arundo
Et evagantes convocat.
Alliciet facilis porrecta fronde , sequacem
Et umbra sola virgulæ
Quadrupedem reddet medijs in cursibus : illum
Ærata calx non urgeat ;
Vulneris impatiens disrumpet frœna, furetq̃ ;
Campo potitus obvio.
Ingemit omne nemus , completq̃ ; ululatibus auras ,
Boreæ impetus si sæviat.
Hispidior ventus nudabit lintea malo ,
Arborq̃ ; planget naufraga.
Mitior aura veni , leviori flamine spira ;
Tranquilla maria rideant.
Fœcundo Zephyro plenæ vibrantur aristæ ,
Et vela fausta mercibus

Æquore sulcato littus famulare salutant.
 Cumulata fuscant funera
 Chironem. Cumulare genus miserabile poenæ
 Est turpe multum Principi.
 Sola hæc digna manus sceptris, quæ sanguinis experts.
 Calcare quid cadavera
 Profuerat? Non Rex, sed (nomen turpe) Tyrannus.
 Audit, ferire crimina
 Si repetat. Meritis sit semper parcior ira.
 Quæ vindicantur sæpius,
 Sæpe ea committi cernes. Sæpe herba medetur,
 succusq; lenior malo,
 Non potuit sævum quod ferrum. Languida membra
 Non exseca; sed adjuva.
 Morbo peccantium vix urens herba medetur,
 Sed molle sanat balsamum
 Subjectos. Oleum populus non spernit, aceti
 Exulceratur moribus.
 Trux vultus mores, quos emendare piandos
 Nescit; benigna frons potest.
 Non subito plectat Nemesis: qui parcere novit,
 Clemens gubernat tutior.
 Divinæ est mentis lapsis ignoscere. Poenæ
 Satis videre supplicem.
 Fulmina rara jacet Numen: nec tergora poenis
 Peccantium aguntur illic.
 Alitis arma Jovi ferienti læva ministrat,
 Ut fulminare rariùs
 Erudiat Regem: doleat, si cogitur esse
 Ferox. Negaret dextera
 O utinam officium! si saucia poena notanda.
 Et suscitare mortuos
 Effet, si posset, Regis, non perdere vivos.
 Errare nequeunt Præsides,
 Dum clementer agunt. Errant si Regula Regum
 Dimittitur Clementia.
 Una dies poterat praegrandem perdere Olynthum,
 Quam nullus annus eriget.
Augusto crescebat honor, nomenq; perenne,
 Quousq; vixit redditus
 Cinna sibi. Princeps Clemens sua Nomina cælat
 Æternitati florida.
 Gentis amor, populiq; salus, quàm dulcia Regum
 Sunt sola digna Nomina!
 Poenituit nunquam Clementem ALBERTE RUDOLPHUM,
 Severiorem poenitet.



DAT OMNIBUS AFFLUENT.

MUNIFICENTIA.

Testor ego, quotquot sors improba fecit egentes:

Undiquè quàm largas AUSTRIA fundat opes.

Non tamen hæc pelagus, Fons est, qui dividit undas

Omnibus, & patulo sublevat amne sitim.

Hic mare sit Princeps, cujus rapit omnia Livor,

Ambitio metas transilit, Ira modum.



Uti liberalem in Rege vultum exegit; humanitate timori subditorum, qui liberalem manum, munificentiam consultum voluit egestati. Unde sibi Augustus ex accepto Romani Imperij fastigio gratulabatur; quod cum nempe statum consecutus esset, in quo omnibus benefacere posset. (a) Ut enim Rex Deo Ter Maximo inter mortales maiestate quàm proximè accedit; sic æquissimum est; ut eundem Ter Optimum benefaciendi studio præ cæteris imitetur. Nam

servare non est commune omnibus, sed proprium excellentis fortunæ; quæ nunquam magis suspici debet; quàm cum illi contigit idem posse, quod Dijs, quorum beneficio in lucem edimur. (b) Id solum autem videtur inter utrumq; discrimen: ut Deus ex suo, Rex conferat ex acceptis; quasi hunc in finem acciperet, ut haheat, unde largiatur. Quod ipsum Certanus Abbas per fontem expressit: qui aquas, & copiose recipit, & liberaliter refundit. Quemadmodum ergo aqua, quæ influit, nec effluit, stagnando putrescit; sic sordida est Principum imprimis avaritia: ut patuit in Dionysio siculorum non Rege, sed Tyranno. Divites econtra viri imitantur puteos; qui continuo exhausti minimè deficiunt, sed duplo copiosiores evadunt. (c) Etenim in lucrum cedunt, quæ bene meritis conceduntur: (d) & de ipso munere magis acquiritur, cum optimis præstantur.

Quare cùm tribuendum sit, multum interest, cui tribuatur: quæ enim bene meritis præmia largitur supra debitum, beneficentia est; sed quæ ad indignos dona transeunt, jactura sunt. Præterquam enim quod beneficium sic collatum, nullum sit; insuper quod sine discrimine conferatur uni, animantur plures: ut in ipsa officiorum desidia sperent, quod mereri oportet; & ausint vel inter ignaviam. Propositi nostri est, inquit disertissimus apud Romanos Consul, *honestos labores palmâ remunerationis ornare; ut vicissitudine, quâ profecti gaudent, desides mordeantur, sibi què imputare possint, quod clementissimis temporibus judicij nostri præmia non mereantur.* (e) Injurius est virtuti; qui illud cum vitio componit, & laboris præmium otio facit commune. Non est munificus, qui sic munificus: nam *benefacta malè locata, malefacta arbitror inquit Romanus Orator.* (f)

Prodest tamen nonnunquam donare immerentibus, sed merituris; beneficium enim gratis dandum est, sed non frustra. Carolus V. cùm ex itinere ad Franciscum Galliarum Regem divertisset: advertit se ibi degere, ubi cum libertate sua tum data

fides, tum hospitalitatis jura in summum discrimen adducebantur. Quare ad demerendam Estampiam Regi peramicam, animum applicuit Imperator; & inter comitatus alloquia annulum à raro adamante pretiosum ex industria dimittit à digito; inclinata actutum illa annulum levat, & officioso honoratum osculo refert Cæsari: at subridens Carolus: Tibi, inquit, esto deinceps hic annulus; non enim solent Cæsares, quod dilapsum à manibus est, repetere. Liberalitatem venerata fœmina vulgatis Caroli laudibus tantum effecit; ut ejus intercipiendi, detinendiq; consilium evanuerit. (g) Antiocho Asiæ Regi obsessa Jerosolyma pertinaciter restiterat; petière tamen ab eo, cui nihil concedere volebant obstinati cives septem dierum inducias ad celebrandum paschatis festum: flagitantibus indulsit benignissimus Princeps: & ut majorem ostenderet in dante Liberalitatem, quàm in petentibus esset fiducia: addidit tauros auratis cornibus insignes, thymiamatum, aromatumq; vim magnam in sacrificiũ ad portas urbis cum pompa solenni deduci jussit. Judæi protinus à festivitate peractâ in Fidem Regis concessere, & cui restiterant armato, jam ultro se subjecerant munifico. (h) *Nunquam parcendum est muneribus, nunquam nummis, cum nummis res confici justè possunt: quorum parsimonia plerumq; publicæ rei obfuit. Quod sæpe jus sine tumultu & sanguine vix obtinuit, cum pace victoris Liberalitas sibi vidit accedere.* (i)

Proprium est Regum munus de omnibus bene mereri, ut omnes sibi reddant obligatos. Is verè Princeps est, qui nulli debet, cui debent omnes, qui ipsum, quod debet stipendiaria Nobilitas obsequium, remuneratione compensat. Regi, non domino servit: qui dum quod soluitur, servitium exhibet, ipsa exhibitione meretur. *Emolumenta deesse laborantibus non oportet; ut & bonæ spei aditus aperiatur; & desudantium querela justâ compensatione claudantur.* (k) Solerti animo nihil durius contingit, quàm hære, cum ad altiores dignitates pergunt ignavi; nec difficilius est nobili meminisse, quàm sui oblitum esse Principem. *Durum est; si quis, ut promoveatur, meritis addere cogatur preces. Qui hoc tormentum remittit, multiplicat munus.* (l) Oportet tamen subinde, ut Regum gravata publicis curis memoria ad privatos se demittat: meritorum suorum modestam mentionem ingerere, non autem importunam. Affirmavit mihi Rex, inquit Cominæus: fieri aliquando, ut egregiæ operæ minùs liberaliter remunerentur non tam ingratitude Principum, quàm eorum, qui operam præstiterunt, vitio: dum quadam elati confidentiâ ob rem bene administratam multa insolenter petunt. (m) Dignitas ex dignitate collata quæritur, & post pensionem recompensâ; ac dum merita prætendunt, exigunt velut à Justitia mercedem, quod est munus Liberalitatis. Negandum est beneficium, quod exigitur: ut distinguatur gratuitum à debito. Demaratus dum, quod Xerxi sapientissimum dedisset consilium, impudenter plausum postulat, risum excitavit; de quo Seneca agebat: *dignus fuerat premio, nisi petiisset.* (n) *Adeo qui meliora laborum premia, aut honorum augmenta extorquere volunt, sæpe spe suâ exciderunt.* (a) Donare volunt Reges, non debere, qui donant, ne debeant. *Quid est,* inquebat Alexander Severus cuidam è fidelioribus ministris: *quod nihil à me petas: an me tibi fieri vis debitorum?* (p) Pulchrum certamen inter Liberalitatem Principis ad remunerationem propensi, & modestiam ministri solo stipendio contenti.

Imitabitur autem Rex Affuerum; qui suorum in se merita referebat in librum: quo & recentior, & certior esset obsequiorum memoria, quæ munificâ, regiâq; manu compensaret. (q) Imitari quisquis Affuerum voluerit: Mardochæos inveniet, qui tam munifico largitori adhæreant. Ingentes dona sunt compedes, in quas ut libenter se immittunt accipientium manus: sic suaviter irretitur animus. Semper possidebit Rex, quem sibi sic comparavit: pudet nimirum ingratum esse, & munerum memo-

ria gravis justissimæ gratitudinis est testis. Etiam in posteris vivet obligatio, si duret Liberalitas. Perpetuus unius beneficij fructus perpetuum est beneficium: quem ut consequuntur hæredes; sic primam hæreditant obligationem. Qui nobilitate Majoribus collatâ gaudent, qui feuda, qui officia hæreditario jure Familijs concessa possident: se Regi suo obstrictos nôrunt: quia dum fruuntur, accipiunt. Hinc libenter vitam regijs Nobilitas impendit obsequijs: quam scit in successorum sanguine compensandam. Sic est; beneficijs venalis est vita, etiam quibus vix frui licet in vita. Quod apud Belliduces præsertim verum est. Unde Agesilaus, *sibi multò jucundius esse dicebat, si milites suos ditaret, quàm si ditesceretur ipse.* (r) Et quod ab illo audiverat antiquitas, hoc vidit ætas nostra in Augustissimo Imperatore LEOPOLDO, cum gemina ad Viennam, & Dardam spolia, superbas Orientis opes, ac tot expugnataram urbium thesauros sic exercitui reliquerat: (donat autem, qui, quod retinere posset, dimittit) ut ipse victoriâ contentus suis victoriæ fructum Munificentiam planè Regiâ largiretur. Nempe animantium princeps leo post confectum ferocientem taurum, ipsâ confectione satur, hostiles exuvias cadaver animantibus indulget in epulum liberale. (s)

Cæterum cum hoc uno (ut vetus proverbium habet) *beata sint regna, benefacere quòd semper possint*; (t) nunquam apud Reges arctabitur donorum mensura, quibus nunquam arctatur donandi materia. Si enim regalius est, ut voluit Artaxerxes Longimanus, addere, quàm adimere: regalius erit etiam conferre largiter, quàm parcè. Princeps obsequium non ex pari, ut inter pares, sed duplâ remuneratione reponit. Ut longæ sunt Regibus manus, quæ scelus etiam remotum castigant: sic Augusta manus non est, cum aperitur merentibus, angusta. Regi Alphonso à pertusa manu cognomentum erat. (u) ab insigni liberalitate ingens gloria, & amor subditorum. Ab Antigono Cynicus talentum petijt. Respondit: *plus esse, quàm Cynicum deceret petere*; repulsus petijt denarium. Respondit, *minus esse, quàm Regem deceret dare.* (x) Rustica planè avaritia invênit in utroq; , quomodo neutrum daret; in talento Cynicum, in Denario Regem respiciens; cum potuerit & denarium Cynico dare, & talentum tanquam Rex. Econtra Alexander jusserat à quæstore Anaxarcho dari, quantum ille postulâset: consternatus quæstor refert centum peti talenta; cui Alexander: *Rectè facit, sciens se beneficium in me Regem habere, qui tantum dare, & possit, & velit.* (y) Regia certè Munificentia, quam & donantis magnanimitas, & petentis fiducia commendant. Alphonfus, cum ei decem aureorum millia deferrentur, dixissetq; qui aderat, Aulicus eam sibi summam sufficere, ut beatus foret. Accipe, inquit, eam quantacunq; est, & deinceps per me beatus esto.

Nolim tamen familiarem esse hanc largitionum pompam: ne, quod Munificentia est, cum rarò fit, Munificentia esse desinat, cum fit sæpe. Non est facilis, qui sic dedit, sed levis: nec opes donat, sed projicit. Promus est, non condus; quod in eum ab Ausonio torquetur, *qui sic est liberalis, ut liberalis esse non possit, accidit; ut benignitate tollatur benignitas, quâ quò in plures usus sit, eò minus in multos uti possit.* (z) *Turpe est Principi benefacere non posse.* (aa) Cum enim Dei in terris personam sustineat, sic erogabit liberaliter, ut dare semper possit; non quod semper imbres, semperq; decidant pluvix; satis est, si solo rore fecundentur interdum prata. Unde *non ita claudenda est res familiaris; ut eam benignitas aperire non possit; sed nec ita referanda, ut pateat omnibus: cum enim dando egere ceperint, alienis bonis manum asferre coguntur; nec tanta studia assequuntur eorum, quibus dederunt; quanta illorum odia, quibus ademunt.* (bb) Quod expertus est,

Ludovicus XI. Galliarum Rex: qui spoliabat tenues viros, ut eos, qui alioquin abundabant, locupletaret, (cc) Magis egisset regiè: si, quod Aristotelis ad Alexandrum erat monitum, suum fecisset: *Avaritiæ fuga, & Liberalitatis gratia*, inquiebat, *est Regum gloria, & Regnorum fundamentum*; quod potissimum assequitur, si à rebus subditorum absteineat.

Major quippe est Liberalitas, quam omnes sentiunt, quàm quæ paucos obruit: nec minor illa Regum est beneficentia: quæ à subditis accipit moderatè, quàm quæ palatinis donat copiosè. Benignus Rex civibus largitur opes, quas relinquit: tantum donat, quantum non exigit. Utilis hæc est Munificentia: quæ tum dives est, cum exactiones remittit; cum alioquin liberalis, quantum confert, tantum amittat. Sapienter Jacobus Angliæ Rex ad filium Henricum: *Noli te locupletare nova, & gravia tributa populo imponendo; sed eorum opes, & facultates certissimas tuas divitias, existimato.* (dd) Constantinus plus habuit tondendo oves, quàm alij deglubendo. (ee) Tam habebat optimus Princeps, quod illi erat in ærario reconditum; quàm quod deerat apud subditos relictum. Dives Rex est, qui subditis imperat opulentis: nôrunt illi inaurare labores, multiplicare argentum, opes augere feliciori quæsturâ, quàm regij quæstores. Unde Henricus III. Castellæ Rex præstantius sibi (ajebat) *esse ærarium per Rempublicam diffusum, quàm quod parietinis quatuor clausum possidebat; nec se Regem divitis populi unquam futurum pauperem.* (ff) Non potest in liberalem Principem subditus non esse liberalis. Non postrema est ea Liberalitatis in Rege species, quam Pietas, & Misericordia comitantur. Valentiniani, & Marciani Cæsarum hæc vox erat: *Humanitatis nostra est egenis prospicere, ac dare operam: ut pauperibus alimenta non desint.* (gg) Philippi II. Hispaniarum Regis imperium erat, ut, qui in Indijs Orientalibus ob quinquennalem famem è gentibus in servitutem erant venditi, si ad Christiana sacra transirent, emanciparentur. (hh) *Nihil habet fortuna majus, quàm ut possit; nec natura melius, quàm ut velit servare.* (ii) *Nullam (inquit Paratus) majorem crediderim esse Principibus felicitatem, quàm fecisse felicem: ut Imperatori propriam majestatem, ac famam æstimanti non tam illud suum videri debeat, quod abstulit, quàm quod dedit.* (kk) *Redimere à servitute captivos, locupletare tenuiores est hominum gravium, atq; magnorum. Hanc ego benignitatis consuetudinem largitioni munerum longè antepono;* (ll) Nam egentibus est securiùs, quàm divitibus subvenire: effundit potiùs, qui mittit in plenum; cum illud potiùs reconditur, quod vasis vacuis congregatur. Sapienter Albertus Belgarum princeps ærarium, quod pijs largitionibus exhauriri querebantur aulici, impleri probaverat; cùm ostendit se non magnæ possessorem Provinciæ Gallica, Anglica, Germanica, Batavica uno tempore sustinuisse arma; suffecisse tot sumptibus, tot urbes occupasse. (mm) Non potest meliori manu dives regnorum victoria comprehendi, quàm quæ miseris aperitur.

(a) Dio l. 54. (b) Sen. l. 1. clem. c. 5. (c) Basil. hom. 3. in divit. (d) Cassiod. 4. var. 3. (e) Idem 9. var. 8. (f) Cic. l. 1. de off. (g) Nieremb. virt. coron. pag. 163. (h) Plut. in reg. apopht. (i) Forstn. in not. ad l. 16. Tac. (k) Cassiod. 4. var. 3. (l) Sen. l. 2. benef. cap. 1. (m) L. 3. pag. 154. (n) L. 6. benef. c. 11. (o) Forstn. in l. 14. Tac. (p) Lamprid. (q) Esth. c. 2. & 6. (r) Alciat in embl. (s) apud Scrib. in Polit. Christ. (t) Nierem. virt. cor. p. 1. §. 14. (u) Sen. de benef. (x) Plut. in. apopht. (y) Car. Scrib. in pol. Chr. (z) Cic. l. 2. off. (aa) Scrib. Polit. l. 2. c. 5. (bb) Cic. l. 2. off. (cc) Comin. l. 10. pag. 360. (dd) in instit. ad fil. l. 2. (ee) Caus. in aul. san. (ff) Nier. virt. cor. c. 3. §. 19. (gg) L. priv. l. 2. c. de sa. cros. Eccl. (hh) Vit. coron. Nier. (ii) Cic. pro Ligar. (kk) In paneg. Theod. (ll) Cic. de off. (mm) Car. Scrib. polit. Chr. l. 2. c. 5.

MUNIFICENTIÆ AUSTRIACÆ FRUCTUS ADMIRANDA IMPE- RANDI FELICITAS.

AUSTRIA, cura *Deum*, largæ genuina Parentis
Filia, munificas inter habenda Deas.
AUSTRIA, gemma soli, pereuntis & anchora mundi,
Spes populi, vindex Numinis, orbis amor.
Tu Pandora Deorum, opus & mirabile cæli,
Diva potens cunctis nobilitata Dijs.
An fortè insolitos pudibunda vereris honores?
Et quòd non meritas prodigat Axis opes?
Regna renata stupes, illis Regesq; renatos;
Et tua quòd solùm tempora laurus amet?
Cælica ne dubiam tibi reddant munera mentem;
Sunt ea, sunt meritis munera digna Tuis.
*Multa capit, qui multa dedit: Non vincitur ullo
Largiter effuso largior ære DEUS.*
Te Tua dextra beat, Tua Te dispendia ditant;
Estq; seges sparsi seminis ista Tui.
Augusti Effusis Implorant Omnia Votis,
Augusti Exemplis Imperium Omne Viget.
Aræ tot Divum, veri tot Numinis ædes,
Sacraq; sacrorum plurima claustra virum;
Augustæ dotes, regalia symbola templis,
Clamant munificas Cæsaris esse manus.
Pro Te Virginei pullantes astra colossi,
Pro Te promotus Virginis orat honos.
Pauperies fœcunda Tuo Tibi munere palmas
Has parit, & pro Te bella secunda gerit.
Immortale Tibi nomen per tela, per enses,
Quæ ditat Martem dextera larga facit.
Sic magè sis locuples, bene si sic prodigis aurum;
Et dare cuiq; suum, si Tua lucra putes.
Nam *quicunq; DEI plùs debita, quàm sua curat;
Debitor illius cogitur esse DEUS.*
Hoc pretio Superi vendunt diademata Magnis;
Hâc surgunt summi Regibus arte throni.
Hostes Mars ferro vincit, vincitur ab auro:
Marte potens dux est; Mars ducis ære potens.
Dona creant fortes, nec murus æbeneus obstat
Donis; hæc duos plùs adamante trahunt.
Ambit & insolitos generosa Minerva labores,
Ambiat auratum si sua colla decus.
Sic age; prodiga sis, nunquam, mihi crede, nocebit,
Auro lucrosas sic vacuasse manus.
Unus pro multo ditescat paupere Princeps,
Se multus gaza ut principe pauper alat.

*Quid juvat, Hesperijs si fors fluat aurea rivis
 Regibus, & lacrymis plebs natet uda suis?
 Si grex tristis eget, cito Rex quoq; tristis egebit:
 Regna Ducem, non Dux ditia Regna facit.
 Quod populo tribuis, populus tibi reddet adauctum:
 Quodque penus condit publica, semper habes.
 Adde, quod in folio sit, sol velut æthere, Princeps;
 Utq; Jovis, regnat, suppleat orbe vices.
 Ut juvet, astra Jovi dant prima gubernia mundi;
 Jupiter & terris, ut juvet, ergo præest.
 Nî sua dispenset subiecto lumina mundo
 Sol, erit æthereis sidus inane plagis.
 Mutuat à Phœbo tellus mendica vigorem,
 A Phœbo vitam germina cuncta trahunt.
 Frigida fraterno Dytinna calefcit ab igne;
 Accenduntq; suas astra minora faces.
 Cumq; rosis pariter, fabrorum prandia, betas
 Irrorat largis Jupiter udus aquis.
 Tu quoque si parili moderamine regna gubernes,
 Jure orbis Rectrix AUSTRIA semper eris.
 Larga manus remex, virtus si prodiga puppis;
 Ter felix, Jason quò tuus ibit, erit.
 Hac rate Bosphoricum tanges tutissima portum;
 Optatosq; trahes in tua vela Notos.
 AUSTRIA pande Tuæ felicia carbasa cymbæ!
 Quò fors, quò virtus te jubet ire, vola!
 Regna Tibi Pietas, Regnorum fulcra parabunt
 Et Deus, & largæ, vincula grata, manus.
 Bosphorus en calcanda Tibi jam tergora Nereûs
 Subijcit, & famulas Pontica Tethys aquas.
 Et cûi Trajanum poteras imponere frœnum,
 Te vehet Euxinas Ister adusq; plagas.
 Castriotum sibi Troja novum, sibi Grajus Achillem,
 Et vocat Æmonium terra Pelasga Ducem.
 Sunt superata pericla solo, superanda soloq;,
 Ultima Pellæus vult monumenta labor.
 Nec Thrax Scylla latrat, nec hiat Rhenana Charybdis,
 Æolus inq; ratim, qui fremit, omnis abest.
 Cymba veni, sortemq; vehas cum Casare Graijs;
 Byzantina vocant mœnia, cymba veni!
 Hellespontiaco & postquàm requiescere portu
 Fas fuerit, monitis hoc superadde meis.
 Vidi ego, qui nuper Floræ pius exijt amnis,
 Regio adoratis flore redivit aquis.
 Alter alit parcas, nec erat, qui redderet, undas,
 Dûmque suus mansit, desijt esse suus.
 AUSTRIA subiecto faustè dominaberis orbi;
 Si faveas populis ipsa benigna tuis.*

FOR-



FORTITUDO.

Aspice Cæsareo stratum mucrone gigantem:

AUSTRIADUM tantum dextera robur habet.

Dextera robur habet debellatura superbos,

Et quidquid Pietas, vel Bona Causa timet.

Pone minas, Scythicum modò quæ caput erigis, Hydra:

Brachium adhuc, & adhuc Herculis ensis adest.



Orti danda est apta virtuti materia, ut, quid possit, prodat. Leo, qui in crates ferreas robur exerit, catenam ligneam contemnit; quasi mallet captivam in vinculis vitam, quàm imbellem certamen. Nec aquilæ charius est prælium, quàm quod periculosius: dignum congenitâ fortitudine hostem, cum quo configat, non eligit nisi colubrum. Ut, quid possit Rudolphi I. Rom. Imp. virtus, orbis nôset: giganteum esse oportuit monstrum, quod à Cæsare prosterneretur. Erat in Ottocari Boëmorum Regis acie Herbutus, natione Polonus, staturâ præminens, lacertis validus, & promptus audaciâ: hunc pactâ mercede animaverat Rex ad necem Cæsari intentandam. Jamq; incaluerat Imperatorijs vocibus Germanorum exercitus, & prælium utrinquè fervebat; cùm adest magnitudinis portentum Herbutus, pugnantem (a) Rudolphum aggreditur, prægrandi acinace plagam intentat lethalẽ. At Cæsar major animo, quàm alter mole corporis, hostiles elusit ictus; gladium adegit in viscera, postratumq; humili gigantem victrici manu confecit. Nec satis, qui adversus magnitudinem hostis victor erat, à multitudine vinci posse credebatur: convolat igitur Boëmorum manipulus, equum confodiunt; ut vel peditem equites opprimerent. Stetit tamen ut in pedes, sic animo Rudolphus, & irruentem undiquè mortem tam diu invictus sustinuit, donec adesset Germanicus miles. Sic offensivo, ac defensivo certamine victor Cæsar prælium integrat; imò victorias continuat, totoq; hostium quâ cæso, quâ fugato exercitu Ottocarum omnibus exuit, præterquam campo, quem retinuit occisus.

Fortes creantur fortibus, nec imbellem feroces aquilæ progenerant columbam. Albertus I. ut parentis in Imperio successor, sic paternæ fortitudinis hæres Adolphum Imperatoriâ dignitate exutum impactâ fronti hastâ prosternit, postratumque obtruncat. Adeò dignum non potuit habere hostem Cæsar, nisi Cæsarem, quem prosterneret. Maximilianus I. in altero adversus Gallos suscepto prælio cum adverteret (b) peditum inclinare; ab equitatu, quem ducebat, avolat, se in pedes conijcit: ductor trepidantium magnanimus aciem erigit, pugnat, vincit invictissimus non tam Imperij, quàm belli Imperator. In altero, cùm equitatus jam fugam respiceret, trepidantes sistit, in fronte dimicat, Alexandrum Peritonium adversæ partis ductorem hastâ conficit, promotisq; suorum animis operosam refert victoriam. *Rectè Chabrias exercitum cervorum leone duce, quàm leonum duce cervo formidabiliorem* (c) dixit. Tota Caroli V. vita quid erat, nisi militia super terram? imò militaris Fortitudo. Adhuc puer irrepebat juxta leonum carceres, obvio, qui occurrerat, stimulo belluas

belluas laceffens; ut auditis irarum rugitibus martiales spiritus recrearet. Ab octenni eam, quam optarat, pictor compositionem obtinere non potuit; donec lancea conclavi illata parieti applicaretur: è vestigio in eam partem defixus Juvenis vultus dum optatum chalybem sollicitè concupiscit; simul pictori & formam oris, & animi inclinationem exhibuit. (d) Ita primæ ætatis spiritibus secuturæ fortitudini prælusit, quæ postmodum vir in 70. præliis victor exitit, & centum castrorum millia, civitatum innumerabilem vim, navium immensam copiam expugnavit.

Nempe summorum Principum domestica semper est Fortitudo, ut eam una cum Regnis nascendi beneficio accepisse videant hæreditariam. Nequè enim congruit, ut terrarum Dominus tueri nesciat, quos gubernat. Hinc sapienter Albertus II. Imperator, cum, exercitu in Boëmos conscripto, rogaretur à Proceribus, quem copiis ducem præficeret? respondit: *si alium imperare militi oportet, cur me Archiducem Austria censeatis, non video.* Quia tamen dubij sunt bellorum eventus, & fortissimum etiam, quem sæpe casus transijt, aliquando apprehendit, non est à regnorum salute; ut præsentem Principis Fortitudinem legiones habeant. David, qui adhuc juvenis, & vix militiæ tyro carneam turrin Goliath prostraverat, postmodum veteranus militiæ heros fuerat sub ictu Philistæi Jesbibenob. Unde juraverunt viri David dicentes: *jam non egredieris nobiscum in bellum, ne extinguas lucernam Israël.* (f) Et verò constat Ferdinandum II. gloriosissimæ memoriæ Cæsarem (ut hodierna tempora silendo præteream) castris licet absentem, animi infracti consilio, & auxilio tanta in exercitibus suis præstitisse; quanta aliorum Regum præsentia sustinere non potuit. *Qui verà virtute fortis est, nec impudenter audet; ut in se uno omnes periculo exponat: nec ignavè metuit, dum non sibi, sed suis cavet.* (g)

Cæterum distinguenda est Fortitudo à Fortitudinis opinione. *Fortitudo est, quæ bello tuetur à barbaris patriam, & domi defendit infirmos: sed quæ ultro arma infert hostilia, seu ambitione dominandi, seu regnandi avaritiâ, crudelitas est.* (h) Quàm verè Ludovicus Vicus: *sunt nonnulli homines docti (inquit) qui Principibus probati, cum de bello consuluntur, ita de justis, ac injustis armis differunt; ut facile ex eorum oratione ansam Principes in suos affectus precipites arripiant existimandi, quodlibet bellum, modo placeat, justum esse.* (i) Nempe prætextus nunquam desunt, dum non desit facultas. Quin, ut idem gravissimè asserit: *hoc demum videtur verè ac germanè militare: arbitrari nihil aequi, ac boni propter se sancitum; nulli se juri esse subditum, se leges omnes in vagina gestare.* (k) Aliter Agesilaus, vel ob hoc inter ethnicos christianus, quæsitus, utra potior esset, Fortitudo, an Justitia? graviter respondit: *Fortitudinis nullum usum esse, nisi adsit justitia.* (l) Malè de Fortitudine sentit, qui heroem, & prædonem non distinguit. Non ineptè Pompeio navali prælio ad Ciliciam victori Pyratarum ductor reposuit: *quod in me privato latrocinium vocas, hoc tibi, qui Princeps es, bellum videtur, cum majus sit latrocinium tot provincias armorum violentiâ diripere, quàm naves aliquot expilare, aut molestare littora.* (m)

In rep. maximè conservanda sunt belli jura: nam cum duo sint genera decertandi: unum per disceputationem, alterum per vim; cumq; illud proprium sit hominis, hoc belluarum; confugiendum est ad posterius, si uti non licet superiore. Quare generosæ indolis exempla in bello necessario laudantur, non in libero: accipienda enim est, non quærenda bellicæ fortitudinis occasio. Carolus V. ut fortissimus erat in gerendo, ad quod coge batur, bello; ita strenuissimus, ne bellum gereret, nisi coactus. (o) Nec enim minorem dixerim Fortitudinem animi, quæ nimium præfervidum militaris gloriæ appetitum moderatur; quam quæ militiam gloriose administrat.

Hinc

Hinc vox ejus magnifica, & generosæ moderationis plena audiebatur: *Etiam si expugnatum haberem universum regnum Gallicum, redderem illud Regi, dum illo exiguo, quod meum esse contendo, me frui patiatur.* (p) Nempe constare voluit orbi, bella non lucri, sed æquitatis causâ hæcenus à se gesta fuisse. Caroli contra Burgundi pugnax animus, non fortis, sed audacis cognomentum accepit, ferocis meruit; victorijs an clade famosior? alij judicent. Ita qui sæpe hostem quærit, victorem invenit. Sapienter Theopompus Rex, *non laboro*, inquiebat, *quàm amplum filijs regnum relinquam, sed quàm paratum, ac stabile.* (q)

Quòd si porrò bellandum erit, cùm militia sit publicus virtutis campus, non insidijs nitetur bellidux. Germanorum ea semper fuit virtus, aperto Marte decertare: nec datus est stratagemati laudabilis locus, nisi ut humano sanguini parceretur; ut ex utròque victores, in illo essent fortitudine heroës, in hoc humanitate homines. Laudaverat Julius Cæsar tam Helvetios, quàm sui temporis Gallos, affirmans, eos apertos homines, & minimè insidiosos, qui virtute non dolo, contra armatos, non imparatos decernant; Afros autem execratus vituperaverat, quòd, ut clam odissent, sic non animi magnitudine bella gererent, sed fallacijs. (r) Dulcis est victoriæ fructus Regum appetitui: sed *cùm enerves animos odisse virtus soleat; quæritur nonnunquam apud perfidiam, quod inveniendum esset in animo forti.* (s) Plena est Machabæorum historia, quòd cum fortissimi Judæorum duces armis superiores essent, hostilibus fallacijs ceciderint gloriosius victi, quàm alij essent victores. Admirationem meruit vel apud Barbaros Germana Caroli V. Fortitudo: quater repressus, ac tandem in fugam ab Hispano exercitu conjectus Barbarosa Tuneti mænibus sese abdidit: adest interea Maurus ad arcanum alloquium admissus, spondet clandestinam Regis necem, recludendas urbis fores, & certam irruente afforis Hispano milite, intus Christianis captivis incolas cedentibus victoriam. At rejecit ingloriam prodicionis operam Carolus, affirmans: *malle se cum hoste suo armis decertare, quàm fraudibus: ne imbellem bellicæ Fortitudinis ministrum adhiberet*; simulquè Barbarosam periculi admonuit: dissimulato tamen meditati facinoris authore. (t)

Est & illud præclarum Fortitudinis opus, tentare ardua, &, quæ ignavus animus desperata putat, aggredi. *Non enim quia difficilia sunt, multa non audemus; sed quia non audemus, difficilia sunt.* (u) Frustra Scanderbegi gladium postulas, si desit brachium, si pectus. *Ut enim cervis incassum sunt ingentia cornua, cùm animus absit; ita non satis est opibus bellicis pollere, nisi Fortitudo, quæ ausit, accesserit.* (x) Sæpe fortiora præstitit, qui multa tentavit, quàm qui potuit. Major fuit gloria Cynegiri, cum hostilem navim retinere conatus est, quàm cæterorum Atheniensium, qui retinuerunt. Cum Medos pugnâ Marathonicâ victos classis excepisset, fugitivos ad uberiores cædem ut retraheret Cynegirus, dexterâ hostilem navim apprehendit, eâ ferro resectâ extendit sinistram; hæc pariter amissâ dentibus puppim arripuit, non prius hostem dimissurus, quàm vitam. (y) Sic gloriosæ Fortitudinis opera sunt conatus, successus autem sunt eventuum. Unde magnanimiter Carolus V. cum ei non semel à magnis viris, ne Hispaniam præpropere Romani Imperij cogitatione perditum iret, suaderetur, reposuit: *infra virtutem semper fuere terrores, & gloriosius cum periculo summa, quàm tutò humilia sequimur; nam ut ut non respondebunt cogitatis eventus, conatus tamen apud posteros erit in laude.* (z)

Rursus nunquàm est tam sinistra belli alea; ut desit generoso pectori Fortitudinis locus, & Fortitudini victoria. Callimachus in Marathonia pugna cæsus, non victus est,

plurimis trajectus jaculis seu stans cecidit, seu cadens stetit, vel ab ipsis sagittis, quibus casurus putabatur, sustentatus. (aa) Victorem quis neget, qui, dum cecidit, hostes stetit, ne progredierentur victores: nobilius ille trophæum victoriæ statuit, quod hostilibus armis corpus suum erexerit; quàm qui hostium spolia ex columnis appendere. Ita sæpe hostem, qui cecidit, cecidit; magisq; nocuit adversæ parti vulnus, quod miles in fronte accepit, quàm quod in tergo. Hinc providè Alphonfus dixit: *summam belli laudem mereri eum, qui fugienti hosti argentum struxisset pontem.* (bb) Ferocius pugnat miles, & ignavus, cui nulla spes est fugæ; & fortis, cui nulla placet. Cum Demostheni, quod ex prælio ad Chæroneam fugisset, probro verteretur, factum excusavit dicens: *me patria servavi*: tum alius: *servasses patriam non fugiendo.* (cc) Nequè id à vero alienum est, cum sæpe utiliùs patriæ moriatur miles, quàm superstes vivat. Eleazarus, dum se suorum saluti devovet, sua unicus morte plurimorum vitam servavit, ab elephante, quem occiderat oppressus, sepulchrum simul nactus, & trophæum victoriæ. (dd)

Fortitudinis contrarium timor est. (ee) Tantùm imbellis est quisque, quantum meticulosus. Brachium Hispanicum, Germanum pectus in milite exiguntur; non ignavi, & celeres ad fugam pedes. Rectè dixit Euripides. (ff) *Viri timidi nullum habent in pugna numerum, sed præsentés absunt.* Nam quod pridem adverterat Themistocles: (gg) *ut pisces, gladioli dicuntur, arma quidem habent, quibus tamen non utuntur: sic timidi, instructa licet, & armata sit acies, hostem non aggrediuntur.* Sed ut nihil probrosius est belliduci, quàm metus; sic periculosius nihil, quàm audacia. Ne quid temerè: & quod supra, & quod infra Fortitudinem est, atquè heroum genuinæ virtuti repugnat. Par enim crimen dixerim, seu timidus te servando patriam perdas, seu temerarius te perdendo patriam non serves. Sapienter eos, qui contra rationem se periculis objiciunt, similes aiebat Augustus Cæsar (hh) aureo piscantibus hamo, qui plus damni amisso semel hamo acciperent, quàm multarum capturarum lucro posset reparari.

Cunctator Fabius Romanam restituit rem, vicit, quia non pugnavit. Audaces quidem fortuna juvat, *sed multò magis ratio.* (ii) Gloriosa magis est ea victoria, quæ consilio, quàm quæ calu viro forti obtigit. Hoc inter ferarum, & hominum generositatē interest, quod illæ cæco impetu, circumspectâ magnanimitate isti congregiantur. Damnavit seu impudentiam, seu tam audaciam, vel utrâmq; potiùs in Terentio Varrone, & Cajo Flaminio Roma, quod ad Cannas ille, hic ad Thrasimenum, dum Hannibalem contempserant suis viribus præfidentes, Rempublicam penè funditùs subvertissent. (kk) Audacter magis, quàm fortiter Agis, cum intellexisset quosdam è suis ob hostium multitudinem perculsos, dixit: *non percontandum est, quot sint hostes, sed ubi sint, ut alacriter aggrediamur.* (ll) Creditum sibi exercitum ad lanienam potiùs educit proditor, quàm ad pugnam bellidux, qui plus audet, quàm sapit. Archidamus, cum filium conspiceret cum Atheniensibus præfervidè congregari, *aut viribus, inquebat, adde, aut animis deme.* (mm) Nemo fortis, qui imprudens, differunt enim, *magni facere virtutem, & vitam nihili facere.* (nn)

(a) Nicremb. vir. coron. pag. 89. (b) ibid. pag. 183. (c) apud Beyerl. de fort. ducibus. (d) Car. scrib. pol. Chr. l. 2 c. 2. (e) virt. coron. pag. 122. (f) 2. Reg. 21. v. 17. (g) Aug. ad Hier. (h) Ambr. l. 1. de off. (i) epist. ad Adrian. pont. (k) ep. ad Henr. VIII. Ang. Regem. (l) Plut. in apop. Lacon. (m) Appi. & Diod. (n) Cic. de offic. (o) Zenocarus. in vit. (p) ibid. (q) apud Ludov. Vices. (r) Patrit. 7. de regno. (s) Valer Max. l. 2. (t) Vir. coron. Nicremb. pag. 147. (u) Sen. ad Lucil. (x) Plut. in apophth. (y) Plut. de glor. Athen. (z) Scrib. in pol. Christ. l. 2. c. 2. (aa) Plut. in paral. (bb) Panorm. l. 4. de gestis Alph. (cc) Gellius l. 17. (dd) 1. Machab. 6. (ee) l. 1. Rhet. ad Theodect. (ff) in Meleagro. (gg) apud Plut. in apophth. Græc. Imper. (hh) Fulgos. l. 7. c. 2. (ii) Cicer. 2. Tuscul. (kk) Pant. l. 1. c. 10. (l) Plut. in Lacon. (mm) Bruf. l. 2. c. 43. (nn) Aratus apud Stob. term. 51.

FOR-

FORTITUDO HÆREDITARIA AUSTRIACORUM VIRTUS.

Errorum Domitor, plus quovis CÆSARE CÆSAR,
Mundi Terror, Amor Patriæ, invictissimus Heros;
Tu Rectórq; Ducum, Regúmque, & Sceptrafer orbis,
Consilio, dextraq; potens, LEOPOLDE Getarum
Victor, qui Scythicam ferro succidis Echidnam.
Hæc *Tibi* laudis habe, satis est: Cui maxima cedant
Nomina: *Magnus* ALEXANDER, *Magnúsq;* PHILIPPUS,
Et FABIJ, centúmque suo cum MARTE CAMILLI.
Plus ultra Atlanti cedant navortia facta
Herculeo, cunctis LEOPOLDUS *fortior* unus.
Tantus nempè audis Regum dignissime Mundi
Imperio, superas qui prisca ingentibus ausis
Majestatem ævi, cui clausa potentia metis
Est nullis, invicta Deum stirps, gratulor Uni
Majorum Titulos, totámque incumbere Gentem.
Omnia si solers veterum monumenta revolve,
Et quod in AUSTRIACIS mirantur sæcula *Divis*:
Tantò major eris, quantò plus incipis esse.
Et minimum hoc in laude *Tua* est laudata *Tuorum*
Progenies, à *Te* stirpem numeramus Avorum,
Quos dedit HABSPURGUM, genuitque vel AUSTRIA Mater:
Tu LEOPOLDE orbi præstas plus omnibus Unus;
Sufficiens pariter *Gemino Hosti* terribilis Rex.
Non habitura modum crescet *Tibi* Gloria, Nomen
Ibit in Astra *Tuum*, atquè Asiâ potiùs *Secundus*,
Non nisi deleta ponens Solymannde ferrum.
Jam partas etenim fœcundat Dacia lauros,
Europæ Æthiopes, Macedonia, Bosnia, Servi,
Et Transylvani, Transalpiniq; Cumani;
Cum Valachis Thraces per utramque Borysthenis oram,
Sarmata, Bessus, Arabs, & fracto Bistone Tellus
Moldava, & Hungaricæ famulantia Regna Coronæ
Sunt subjecta *Tuo*, CÆSAR FORTISSIME, Marti.
Vim senilere altam dominatorésque lacertos,
Quid superest ultra, quod Nomina CÆSARIS æquet?
Vos immane genus Thraces, telisque superbos
Ad Pelagus Bessos, tumidasque Propontidis oras,
Usquè pruinosos Istri glacialis ad amnes,
Arctat ubi salsas cornutus Bosphorus undas,
Europaque Asiam metis distinguit utramque,
Depulit; ac per Hyperboreos ad mortua saltus
Æquora, barbaries est præcipitata sub ima
Tartara, non rediens Mahomet genus inde nefandi.
Hæc nova, sed ventura dabit Victoria major.
Teutonij! quæis pulchra jocus per bella cruorem

Fundere Threicium, lunatâque sternere castra :
 Vos bellatores, vos murus aheneus orbis
 Germani Martes, tanti & pars magna Gradivi
 Pannonidæ fortes, per quos bene Maximus armis
 CÆSAR ovat lituos inter fractâsque secures,
 Hoc gaudete die, qui vincit sæcula centum
 JOSEPHI meritò, *Magno* gaudete *Nepote*.
 Hinc in *Te* Urbs *Flaviana* triplex Thaumantias Iris
 Exoritur, nuper depicta cruore Getarum;
 Affurguntque Arcus, veteris miracula mundi,
 Atque Triumphales rutilant, ceu fulgura Portæ;
 CÆSAREIQUE vehunt SOLIS fulgore Quadrigæ
Auroram Regum, lauro, gemmîsque coruscam.
 Hoc Mahomet construxit opus, fixîsque trophæis,
 Mausolæa sui erexit pro funere Regni.
 Sed quid adhuc superest, quod Nomina CÆSARIS æquet?
 Unde illi æternæ flagrent incendia famæ?
Gloria tercentum minùs est, si *tanta* Colossos
 Sculpserit, & quicumque locus vel bella gerentem,
 Vincentemque tulit, pario vestigia saxo
 Signâvit; vel ubi jam millia Pyramidum stant,
 Marmora tot figat, quot ubivis prælia vidit.
 O utinam! me *Parca* dies concedat in illos
 Vivere, & haud visos orbi spectare Triumphos!
 Cùm *Te* victorem *Bizantia* capta stupebit,
 Victâque suffossis succumbet Græcia muris.
 Dum *Tibi* præfago sic auguror omine Vates,
 De Nabathæorum, lachrymant ubi balsama, sylvis,
 Trans Nilum, fulvis ubi labitur Hermus arenis,
 Pendere vectigal, pretiosa tributa Sabæos,
 Cappadoces, Cilices, Phrygiósque afferre videbo.
 Cùm *Tibi* fumabunt Panchæo altaria thure,
 Posteritâsque *sacrum* facient, & habebere *Primus*
Divos inter *Cæsareos*, cûi supplicet Orbis.
 Fortis Alexander, Pompeius, & Hannibal acres,
 Augustus, Felix, LEOPOLDUS & omnia CÆSAR;
 Ut dignus Solio, sic longè dignior Astris,
 Post fata æternùm tamen ore, & pectore vives.
 Hercule major eris, major *Tua* Gloria mundo,
 Et *Carolo* major, Te ipso quoque CÆSARE major.
 Lustrorum Cæsar bis quinque beatior annis,
 Et *Pius*, & *Sapiens*, & *Iustus*, *Fortis* es idem:
 Jam quinquaginta donâsti stragibus annos;
 Quem non sacra *Tui* perterreat ira *Gradivi*,
 Heroâsque, Ducésque ex sanguine Semi-Deorum.
 Non est, cur totidem pugnes, quia *vincere victor*
 Quid posses? est cûi totus *victoria mundus*.

MA-



IN TEMPESTATE SERENUS.

MAGNANIMITAS.

*AUSTRIACUS sortis sub tempestate serenum
Et vultum, ac animum solis ad instar habet.*

*Intrepidam CAROLI stupuit sic Africa mentem,
Dum paribus furerent Pænus, & unda minis.*

*Supra Fortunæ DOMUS eminet AUSTRIA nubes:
Num magis ulla potest, celsior esse Domus?*



Deò propria Regum virtus Magnanimitas est: ut quisquis eam non obtinuit, Imperio Princeps frustra imperaverit. Ad Templum Honoris, ubi unice magno Imperantium labori æqua merces rependitur, & viæ dux, & loci ostiaria sola Magnanimitas est: sine hac errant per humilia vallium Principes; nec unquam pertingunt ad gloriæ verticem, splendidæ suæ operæ pretium relaturi. In Principibus verissimè virtus sibi ipsa merces: dum Magnanimitas coronatæ virtutis corona est; (a) quia Mater gloriæ. *Mercedem nullam virtus præter hanc laudis, gloriæq; desiderat.* (b) Præsertim Principis, dum quidquid seu est, seu dicitur sub sole æstimabile, minus est; quàm ut Regalia æquet merita. Supra communem mortalium conditionem in altum elevatus Princeps, despicit, quæcunque communia sunt mortalibus: quia infra illum omnia. Ipse imago Deitatis in terra, Deorum more, nil quærit in omnibus, nisi gloriam suam. *Argentum quidem, & pecunia est communis omnium hominum possessio; at honestum, & ex eo laus, & gloria, Deorum est; aut eorum, qui à Dijs proximi censentur.* (c) Opes, & potentia Principatûs sunt decora: pares omnes, qui in eo regnant, fortuna facit, sola gloria impares, quæ Magnanimitate paratur. *Cætera Principi statim adsunt; unum insatiabiliter parandum, prospera sui memoria.* (d) Mortalium res evanidæ omnes: sola gloria æternum stat; quò senior, eò robustior: nec emoritur fato suo, sed interitu alieno; si nemo supersit, qui eam veneretur.

*Facta Ducis vivent, operosæque gloria rerum,
Hæc manet, hæc avidos effugit una rogos. (e)*

Mensura magni Principis non corporis proceritas est, sed animi cellitudo. Parvus corpore Alexander omnibus semper est Magnus, quia Magnanimus. Brevis urna parvum corpus inclusit, animi magnitudinem mundus capere non potuit. Cùm plures mundos recenseri audiret, quorum victoria deplorata esset; flevit: sed lachrymis Principum, qui non nisi honores sinistro fato sibi abreptos plorare possunt. Mori & perire vulgare est; mori, & superesse Principum, famæ immortalitate. *Mors omnibus æqualis, oblivione apud posteros, vel gloriâ distinguitur.* (f) Sic *Exiguum nobis vitæ curriculum natura circumscripsit, immensum gloria.* Magnus Princeps, ut omen nominis nanciscatur, semper major esse contendat: perpetuò parvus, imò semper minor seipso; si contentus obtentis non quærat majora. Natura terminum magnitudinis, & parvitatæ huic universo præscripsit, nunquam Principi; qui

supra reliquos eminens dignitate ab aliorum legibus exemptus est. Imperantibus nunquam metæ, semper plûs ultra gloriâ, & famâ. Plûs semper famæ, & gloriæ innata exigentia est naturæ Principum. Julius Cæsar visâ Gadibus Alexandri Imagine, quæ Herculis templum æmulâ facinorum, & gloriæ memoriâ honestabat, pro indolis suæ celsitudine profundissimum ex imo pectoris duxisse gemitum visus est: causam rogatus, reposuit, plûs supiria quàm verba: *Trigesimo ætatis anno, quem ego nunc ago, Alexander totum orbem terrarum subegerat; & Babylone se in otium collocaverat: Ego verò, ortu Romanus, nihil etiamnum ago memorabile, quo vivus gloriam merear, mortuus famam relinquam.* (h) Maçte Juvenis! indoles tua, digna, quæ imperet, quia Magnanima, te ad orbis universi supremum fastigium efferet, quod non fortunâ, sed virtute inscendes; ut, quam petis, assequaris famæ immortalitatem. *Præstantis viri, vivum placere velle, mortuum etiam laudari.* (i)

Si Magnanimus is videtur, qui, cum magnis sit dignus, magnis quoq; sese dignum esse existimat; (k) Dignitas autem ad externa bona dicitur, quorum maximum id esse statueremus, quod dijs attribuimus; quòdq; maximè appetunt, qui in dignitate constituti sunt, quod item ob præclarissimas res dari præmium consuevit; ab hujusmodi honor est; (l) Magnanimitas prærogativa est magni Principis. *Qui enim Nobiles sunt, & divites, & in Potestate constituti, honore digni habentur.* (m) Non sceptrum, & corona, sed animi magnitudo Principes facit. Sinistiore fortuna terris exutus Imperans, Principatus amisit, non Principem, qui Magnanimus. Mithridates ab Eunone Romano Duce bello captus, victorem accessit, sic intrepidè profatus: *Mithridates terrâ, mariq; Romanis per tot annos quasitus, sponte adsum; utere ut voles prole Magni Athenienis, quod mihi solùm hostes non ademerunt.* (n) Verè vir magne, nec te tibi ademerunt; quia animi magnitudine es semper idem. Vinciri poteris hostis, non princeps; quia illum potentia, hunc Magnanimitas facit, quæ tibi adeò libera. Sic extrema inter pericula, imò mortes, uti prima semper, sic extrema Magnanimitatis cura est vero Principi; ut si præfica illi sit Fortuna, ipse tumultus in perenne affurgat gloriæ trophæum. Julius Cæsar inter confodientium vulnera supremam curam habuit *honestè cadere.* Magnus Pompeius, quo viro nemo alia omnia minùs, aut gloriam magis concupivit, dum perfidiæ victima cederet, dum caderet, pallio caput obvoluit; ne gemitu, aut voce triumphos suos contaminaret. His verè fuit *Hortatrix animosi gloria lethi.* (o)

Inter rerum discrimina gloriæ periculum non subire Magnorum est; imò ultrò hoc quærendum; ut honorem inveniant. *Virtus durioribus negotijs enitescit, & aspernatur declivem facilitatem, maximòque sudore arduum laudis adnititur.* (p) Silex innatum sibi ignem non exerit, nisi chalybe percussus: nequè magna indoles virtutem explicat, nisi adversis exagitata; tum se aut Imperantem probat, aut dignam, quæ imperet. Mars ille Austriacus CAROLUS V. æterni nominis Princeps, cùm explicato ad Tunetum exercitu à fidioribus moneretur de hostium multitudine longè superiori, magnanimus excepit: *Plures vincemus.* Vicit plures, plûs animi magnitudine, quàm bellatorum robore; facili victoria: siquidem *facilia ex difficilimis animi magnitudo facit.* (q)

*Explorant adversa viros, pèrque aspera duro
Nititur ad laudem virtus interrita clivo.* (r)

Nihil est, cui natura suos non congenit appetitus, quibus avidè arripitur, quidquid sibi bonum creditur. Principi appetitum gloriæ innatum voluit; ut grandia semper expetat, semper quærat, & ubi ubi potest, velut propriam sibi escam avidissimus

mus arripiat, ut verè in Regnantibus fieret, *uberrimum virtutis alimentum honor.* (s) *Ut hominibus Reges, ita Regibus dominandi desideria dominantur;* (t) ut latè protensa dominatione latior crescat fama nominis immensitate. Elephas molle sua animalium maximus, in acie positus, conspecto sanguine excitatur ad generositatem, tum nec pericula curat, nec vulnera; Princeps magnitudine dignitatis mortalium summus, ubi Regij sylvæ purpuram, Honoris symbolum, respicit, ad ausus maximos, ad heroica quæque facinora contempto corporis, & vitæ discrimine generosus efferuescit. *Magnanimus parvi facit, & negligit omnia præter admodum pauca. Magnis, & gravibus se obijcit, in quibus nec vitæ parcat.* (u) Parcemia est: *Dij laboribus omnia vendunt,* honores periculis. Qui in stadio currit, nec laboris, nec viæ asperitatem sentit; quia bravium cogitat. Nec magnus animus objecta respicit pericula; quia gloriam pensat. Qui gloriæ avidus, etiam periculi appetens est. *Avida periculi est virtus, & quò tendat, non quid passura sit, cogitat.* (x)

Nunquam facilius Princeps è Dignitatis suæ fastigio decedit; quàm si periculis deijciatur. Quidquid eveniat rerum humanarum vicissitudine, *magna indolis est sperare semper.* (y) Feriunt altos fulmina montes; quia hos virtutis suæ digna credunt experimenta: humiles valles, & palustrium cannas dedignantur. Etiam Fortuna, rerum humanarum Dominam ludit: non humilem plebem, sed mortalium vertices fallax illudit. *Infirmi ingenij est, lapsu aliquo summa rei diffidere, cum exiguis momentis subito inclinentur omnia.* (z) Qui sub lauro, Honorum symbolo, est, à fulminibus tutus est; hæc illum discriminum tonitruis, & strepitu involvere, nunquam terrere possunt, quia nequeunt ferire. Virtus gloriam, adversa virtutem generant: ut sciat, qui ad honores aspirat, quod dum gloriam sperat, pericula non tam subeat, quàm amet.

Fax mentis honestæ gloria: (aa) si tamen vera, & non spuria. *Veris magna paratur fama bonis.* (bb) Verus non est Principi, si parvus, honor; cujus *Magnanimi etiam contemptores vocantur.* (cc) Magnanimi Principis idea Quintus Carolus Imperator *Maximi, & Fortissimi* gloriosum nomen vulgo acclamante non admittit, quia vulgare, spretâ gloriâ laudabilior. *Spreta in tempore gloria cumulatior reddit.* (dd) Vulgaris est, qui vulgaria amat; & vulgaria ea, quæ vulgi. Etiam Obrectationes minutiorum Magnanimus temnit, quia minutas. *Ille magnus, & nobilis est, qui more magna fera latratus minutiorum canum securus exaudit.* (ee) Elephas levia spicula mota cute discutit contemptim, nec dignatur ultione; cum puderet levia vel sensisse. *Proprium est Magnitudinis verè non se sentire percussum.* (ff) Etsi vel fortuna, vel obrectator gravius telum libret; Magnanimi Principis est dissimulare sensum; ne gloria vulnus patiat. Sic maxima etiam tela parva reddunt, ipsi famâ Maximi. Philippus II. Magnanimus Hesperix Monarcha, dum classem in Angliam destinatam, quæ *Invincibilis* nomine gaudebat, maris fortunâ verè sinistrâ contritam esse nuntiaretur; ut integram suam gloriam servaret; quasi non sentiret ictum, immotus reposuit: *Deo laus, quod nobis vires supersint aliam, imò majorem instruendi.* Majorem hac magnanimitate plausum meritis, quàm si Angliam vicisset. Ad infelix hoc nuncium omnes animi affectus movebantur; ut se patefacerent, gloriæ cupido omnes contextit. Verè *extrema reliquorum affectuum tunica gloriæ cupiditas.* (gg) Ita Magnis æstimabilior gloria, quàm classes, & potentia.

Fama optimo cuiq; pretiosa est. (hh) Vivi Principes dignitatis fastigio, mortui tumulorum sublimium monumentis, semper in alto mortalium oculis expositi sunt, imò censuræ, perpetuo sermonum argumento. Hinc non gesta modò, sed ne

cogitatio quidem humilis Magnos decet. *Non potest aliquid abjectum, & humile cogitare; qui sciet de se semper loquendum.* (ii) Famæ tuba non inanem auram, sed vitalem spiritum spirat; quo vivunt, & animantur Principes etiam mortui. Nec spiritus hic inanis est ventus, quo pascitur Imperans; sed est cibus Magnorum. *Regum cibus gloria, quam non pecuniâ, sed laboribus Dii vendunt.* (kk) Hoc pastus cibo Magnus Bellator Carolus V. inter tot belli dura validus semper duravit; qui suggerenti, ut cibum lautiozem caperet, levandis tot negotiorum gravaminibus opportunum, reposuit: *Lautè commessari vulgarium est.* (ll) Qui nempe implere cibo ventrem, quam orbem famâ mallunt. *Diuturnitatis amor, & cupido res homine dignissima.* (mm) Maximè Principe. Habent enim & folia ruinas suas: & purpuram ætas atterit. Ut ut magnum fortuna fecerit; rarò constat magnitudo non sua, & vix magnitudo, quam casus aut attingit, aut proterit fato communi. Quod uni inscripsit Seneca, transcribere licet omnibus: *Eminentis vitæ exitus cadere est:* quin quò altior est quisque, hoc acerbior non rarò tulit fortunam ex condicto sæpe furentem, & ipsa ob beneficia metuendam. Nec cinis Principe in vulgo discrevit, nisi ingentes spiret animos. Hic unus dum superstitione Regum nomina vix ex nomine cognoscuntur, & Roma in medio Romæ quæritur, Julios, Titos, Augustos, et si quæ fuerunt magnarum decora mentium, à necessitate omnia ad eundem finem revocante eximit, ruinaeque ipsi mundo imminenti subducit: idq; agit, ut meliori sui parte durent, dum communi lege intereunt. Cum hoc licet *vitæ brevis, gloriæ ijs cursus sempiternus est,* & inter ipsas fati umbras in memoria hominum, tanquam luce latentur: Hic efficit, ut *absentes absint, mortui vivant:* quin ut stellæ in cælo fulgent per tenebras serenius; nova illis à tumulo vita exoritur, quâ in posterorum cordibus vivant. Et beatiore vivant, quia multi. *Non enim vita dicenda est, quæ corpore, & spiritu continetur, illa vita est, quæ viget in memoria sæculorum omnium, quam posteritas alit, quam ipsa eternitas glorioso obtutu semper intuetur.*

Si magni animi magnis honoribus fiunt. (nn) Quid de Magnanimitate Tua loquar Auguste NEO-REX JOSEPHE; qui dum imperiali corona redimiris, ad eos honores sublimatus es, quibus majores non habet orbis. Sanè ex Maximis Tuis honoribus Maximam in orbe Magnanimitatem in TE veneror. *Miltiadis trophæum Themistocli somnum ademit.* (oo) Augusta Augustissimi Patris, & Maximorum Avorum Tuorum trophæa etiam TIBI Auguste NEO-REX, irrequietos pectore nutrient stimulos Magnanimitatis; ut ijs par dignitate, gloriâ non minor, imò superior evadas. Sequeris Majores Tuos tempore, non gloriâ; quia nulli secundus gestorum memoriâ. Eorum Gloria per TE non patietur labem in posteris: qui ad summa facinora, & Heroicos ausus à DEO, naturâ, & indole donis pulcherrimis abundè instructus es. Nihil inconveniens ages; cum gestorum gloria Majores Tuos non æmulari modò, sed excedere ambiveris: siquidem *honestus ambitus est, quos sequimur tempore, velle præconijs anteire.* (pp) Tum enim verò etymon nominis Tui implebis Princeps *Crescens*, Verus Augustissimæ Domûs Tuæ Primus Cæsar JOSEPHUS.

(a) Arist. Ethic. 4. (b) Cic. Philip. 2. (c) Polyt. (d) Tacit. 1. hist. (e) Ovid. Epist. ad Liviad. (f) Tacit. 1. annal. (g) Cic. (h) Suet. in Cæs. c. 7. (i) Spartianus Defun. Nig. (k) Arist. 4. Ethic. c. 3. (l) Idem ibidem. (m) Arist. 4. Ethic. c. 3. (n) Tacit. l. 12. ann. (o) Statius l. 9. (p) Sym. 9. 81. (q) Cæsar 2. Civ. (r) Sil. l. 4. (s) Valer. Max. 2. 1. (t) Sidon. 2. Epist. 13. (u) Arist. 4. Ethic. 3. (x) Sen. de Provid. (y) Flor. l. 4. c. 3. (z) Egesipp. l. 4. c. 11. (aa) Sil. l. 6. (bb) Luc. 6. (cc) Arist. 4. Eth. 3. (dd) Luc. (ee) Sen. l. 2. de ira c. 32. (ff) Sen. l. 3. de ira c. 25. (gg) Simpl. in Epiet. c. 48. (hh) Sim. 3. 69. (ii) Mamert. Paneg. (kk) Panorm. l. 1. (ll) Nieremb. Virtus Cor. pag. 2. c. 2. §. 8. (mm) Pl. 5. Ep. 8. (nn) Liv. l. 4. (oo) Plut. in Themist. (pp) Cass. g. 7.

ENCOMIUM CAROLI V. A MAGNANIMITATIS VIRTUTE CELEBERRIMI.

AH foetus cerebri somnia cedit,
Non vanas animo pingite imagines;
Laudes Herculeas promere desine
Inconsulta loquacitas.
Quos commenta suis è tenebris cient,
Et donant fatuo lumine fabulæ,
Confictisque creant prodigijs Deos
Gentes, Numinis indigos,
Heroum genitrix, progenies poli,
Europæque salus, vis Alemanniæ,
Virtus Imperij, maxima Cæsarum
Nutrix AUSTRIADUM DOMUS
Confundit, soboles veriùs educans
Stirpis magnanimæ, dissociabili
Nunquam qui socium fædere copulant
Veri nisibus Herculis.
Talem te video, CAROLE, Principum
Summorum specimen, diradantium
Factorum series dum Tua panditur,
Séque obtutibus obijcit.
Dum bello premeris, nescius es metûs;
Ac inter gladios cladibus invius
Transcendis dubiam Marspitris aleam
Magni robore pectoris.
Transisti medius fulminis ocyor
Alis per dubias Iliades mali:
Non diris poteras casibus atteri,
Nec formidine concuti.
Et quamvis feritas fortis, & in Tuam
Conjurata necem Tartara sæviant,
Et livor furias luctificas, suæ
Iræ concilium, vocet:
Tantò plùs meritum Martis adoream
Virtus perpetuis donat honoribus,
Ipsas ad vigilis lampadas ætheris,
Cælique excubias locans.
Quis non attonito cum validis notis
Certantem videat lumine CAROLUM,
Cingentem Lybies obsidionibus
Urbes Marte maritimo?
Hic Cæli subitò mixta serenitas
Missis Æolij carceris incolis
Disrupto gravium vellere nubium
Nimbis multiplicat mare:

Affurgit rabido murmure Nereus;
 Undas agglomerat sideribus pares,
 Intentans animos mergere naufragos
 Solo naufragij metu.
 Ardens Oceanus fluctibus opprimit
 Classes; ut pereant præda trifaucibus
 Scyllarum canibus, littoribus quoque
 Sint spectacula tristia.
 Mavors interea Cæsareus solo
 Hostili gelidis à pluvijis rigens,
 Nervis corporeis frigore languidis
 Inclementius aëra
 Grassantem, pariter sæva minacium
 Afrorum metuens agmina, nescius
 Succumbátne feris ensibus hostium,
 An conflictibus ætheris,
 In damnum cujus fræna licentiæ
 Laxat barbaries, obstrepat aëris
 Tempestas, pelagi sueta furoribus
 Cudit tela necessitas.
 Unus non quatitur, qui patet ictibus,
 Sed constans animo pro gladijs caput
 Tot discriminibus CAROLUS obijcit
 Non arce, unde pericula
 Rideret positus, non tenebris latens
 Cratis vimineæ, non Agamemnonis
 Munitus clypeo, non aciem cavens,
 Pugnas eminùs aspicit:
 Sed fortes, medijs morte ruentium
 Se fati socians, excubias obit,
 Et risisse monet semi-animes malis
 Tantæ sævitæ modum.
 Verùm te Dominum non Lybie modò,
 Sed quascunquè plagas sol habitabiles,
 Neptunúsque sinu continet, in quibus
 Laurus Martis acinace,
 Et sudore Tuo nobilis, aspicit.
 Moles Herculeo lemmate nobiles
 Ausu, ô Magne! Tuæ, non imitabili
 Dum bello subigis mare,
 Virtutis superas, non fragili tenens
 Clavo regna. Thronum contremuit Tuum
 Fortunæ levitas, quæ vice lubrica
 Illudit diademati.
 Sed cogor meritis ponere terminum
 Laudum proloquijs HERCULIS AUSTRIJ,
 Qui per magna sui fascibus Imperi
 Æternum tribuit decus.

CON-



CONSTANTIA.

En toties agitata suo tamen ordine constant,

En quoq̃ primævâ sydera luce micant.

*AUSTRIA Cæsaream, toties jactata, coronam
Servat, & antiquo fulget honore Domus.*

*Plus dedit AUSTRIACIS cælesti è semine virtus :
Nil adeò constans gignere terra valet.*



Constantia circulus est, sed minimè vitiosus, quâ in orbem dum circumeunt virtutes, stabiles quiescunt; quia dum quævis juvat aliam, omnes juvando perennat. *Bonus circuitus, si justitia quarit, prudentia invenit, fortitudo vindicat, temperantia possidet; ut justitia sit in affectu, prudentia in intellectu, fortitudo in effectu, temperantia in usu, omnes in nexu.* (a) Qui sibi constat Regiæ Majestatis animus, nec per ambitionem alienis inhiat injurius; nec per levitatem sua negligit improvidus, nec per ignaviam propria omittit timidus, nec per luxum domestica pessumdat prodigus. Constantiæ igitur peripheriâ terminandum est, quidquid virtutis laudem vult mereri. *Virtus enim, ut amicitia, quæ desinere potuit, nunquam fuit.* (b) Extra orbitam honesti errat, quod perseverantiæ ambitus non circumscribit: facile supra prudentiam fit suspiciosus, contra justitiam severus, supra fortitudinem audax, contra temperantiam magnificus, quem vaga levitas in varia torquet. Quædam ad septentrionem sidera in communi cælorum motu immotum servant ordinem, quo hæc illorum Constantia non tam coronetur, quàm ipsa sit corona. Sic dum Princeps eundem semper recti tenorem servat, continuatam virtutem, cui coronidem imponit, coronat. Digna profectò coronatis Regum capitibus corona virtutum Constantia!

Inconstantiam cælo exulem, terrarum inquilinam pictor Tempus (ut voluit fabulæ, veritatis latentis symbola) effigiaverat in tabula non aptiore, quàm vultu hominis: hîc irarum, amorum, gaudij, mærorisque sedes est, & viva inconstantia imago pro varia rerum, quas tempus affert, vicissitudine. *Nunquam in eodem statu permanet, qui multis miserijs repletur homo.* (c) Sed hæc mobilis vulgi natura est: non item Regis, qui ut dignitate cunctis eminet, sic à plebeijs vitijs est remotissimus. *Rex est, qui metuit nihil, & tuto positus loco infra se videt omnia.* (d) Scopulum præaltum dixerim, ad cujus, sed inconcussi, pedes inquieti fluctus alliduntur. Idem nempe ad omnes fortunæ vultus Regi servandus est vultus, nec in eventuum varietate à bene cæptis desistendum. Facilius durat inter jacula prævisa prudens, & æquitatis amator suâ contentus spartâ; nec bonis, dum affluunt, plus justo afficitur. Qui temperans est in prospera, facile fortis est in adversa fortuna, in utraque constans. His cardinalium virtutum cardinibus dum regius innititur animus, etiam cum varijs utriusque sortis rotatur casibus, Constantiæ circulum describit. Multum interest,

quo motu quis circumferatur, æquabili, an irregulari; moveatur, an agitetur. Stellæ ijsdem ad leges orbibus jam à sui primordio stabiles gyrantur: vel ideo dignæ, quæ non corrumpantur. Inane folium nunc vento rapitur, nunc non tam quiescit, quàm relinquitur.

Facilius est multa facere, quàm diu. (e) Illud quidem agilis est, hoc constantis. Sed nonnunquam *diversitas vitium est vacillantis animi, & nondum habentis vigorem suum.* (f) Vespasianus Imperator à gravi maturitate id virtutis obtinuit; ut nihil in eo arrogans, aut in rebus novis novum fuerit. (g) Levis e contra indoles tædio cæptarum rerum afficitur, in novas prona, nec tenax veterum: solâ constans in inconstantia, dum multa amplectitur, manutenebit nihil. *Frequens enim, ac mobilis transitus maximum perfecti operis est impedimentum.* (h) *Vituperium quippe generant, quæ in medijs conatibus agra deferuntur.* (i) Quilquis felicem exitum cæptis optat; ne cedat malis, sed contra audentior eat. *Nihil est, quod non expugnet pertinax opera, & diligens cura.* (k) Flectit se illi tandem victoria, contra quem se principio erexerat. Pertinaciam nemo, nisi Constantia vincet.

Carolus V. in Tunetano ad Guletam bello, ubi major resistantium barbarorum vis repellebat, ibi frequentior urgebat contemptâ adstantium morte. Accesserant Alvarus Barzanus, & comes Tendilla, negantes se terrâ, marive assultum facturos, nisi Cæsar ad tutiora se reciperet. Non cessit tamen ab occupata semel statione, nisi cùm alibi ob immanem missilium bellicorum vim Hispanicus, atquè Italicus miles in confusionem ageretur, quò se contulerat inter titubantium turmas inclamans: *Item milites mei, ite leones, & cum vestro Principe hostem urgete.* (l) Sic quæ forti Carolo diu restiterat Guleta, cessit constanti, & cæsa Turcarum duo millia, ereptæ balistarum ænearum trecentæ, naves quinquaginta occupatæ. Rudolphus I. cum geminam Burgundiam ad Imperij fidem armis revocaret; vario primùm Marte certanti aderant à Philippo Pulchro Gallici Legati, comminantes ipsius Regis cum copijs adventum, nisi quantocyùs ab ijs provincijs exercitum revocaret. Subridens reposuit Imperator: *veniat, inquit, Rex, præstò habet expectantem, intelligétque, quàm vanum sit legem ferre armatis.* (m) Suggestentibus porrò suis, non tutum illic locorum subsistere ob annonæ penuriam: objecit invictissimus Monarcha: acti in fugam hostes abundè relinquent, quod alendo exercitui sufficiat. Nec fefellit fiduciam eventus, quando fuis Roberti Burgundiæ Ducis, & Theoberti Ferrentani copijs Germanicus miles copiosa spolia in castra retulit, & territi Cæsareâ constantiâ Burgundi positis armis, nec expectatis Gallorum auxilijs, pacem rogavère: poterátque illud de Rudolpho jure dici; quod Hannibal dixerat de Marcello, sibi cum eo hoste negotium esse, *qui nec victus nôssset quiescere, nec victor, donec, quod voluisset, obtineret.* (n) Extorquenda nempe est victoria vel invita, & durando vincendi fortes.

Tolle perseverantiam, nec beneficium gratiam habet, nec laudem Fortitudo. (o) Quoties gloriosa bellorum initia excepit probrosus finis! *Debellatum fuisset cum Romanis, si ad Cannas bellatum uno adhuc die.* (o) Quod virtus expugnavit, sæpe inconstantia perdidit. Vicisset Cyrus Massagetæ, nisi victoriâ abusus, cùm fugientem hostem assequi oporteret, relicta spolia fuisset insecutus. Contra Helvetij, qui Novariâ egressi, factò in Gallica castra impetu, memorabile prælium, gravissimùmque bellum confecerunt: offerebant se Ducum pretiosa supellex, cæsorum copiosæ vestes, opulenti exercitûs varia impedimenta: patriæ tamen disciplinæ memores totum diem steterè immoti, ne ordinibus turbatis, dum in spolianda cadavera se effunderent, à collectis Gallorum reliquijs partâ spoliarentur victoriâ. (q) Nempe exercitus, dum

dum militem exuit, prædonem induit, etiam victoriam, quam arripuit, amittit. Petit id sibi victorijs Constantia obsequium, ut etiam, cum debellatum est, arma ferventur.

Habet hoc speciale constans, ut, quantam de se concepit fiduciam, tantum incutiat timorem hosti, & cedere cogat, dum non cedit. Agesilaus cum Macedonia finibus cum exercitu immineret, per legatos à Rege petijt, pacatam, an hostilem terram esset transiturus? is cum deliberaturum se respondisset, *deliberet*, inquebat Agesilaus, *nos interim transeamus*. (r) Territus eâ generositate Rex liberum, pacatumque transitum indulgit. Nec major illa Senatûs Romani constantia fuit, quando Popilius datâ Antiocho epistolâ jussit; ut exercitum Ægypto removeret; nec inhiaret regno Ptolomæi liberis debito. Lectâ Rex urbis voluntate cogitaturum se dixit, quid factû opus; tum Popilius virgâ ei circulum circumscribens asseverârat: *huic insistenti loco responsum dabis*. (s) Percussus Rex imperata se facturum spondit. Magna constantis securitas est, quæ etiam potenti periculum facit. Quæ caput, novit profecti conscia sibi virtus, vincitque adversam partem hoc ipso, quod insistat. Quod fortiter inchoatum est, non est ignavè deferendum, ne hostis audere incipiat, cum desinis.

Ipsa adeò Justitia, quæ manutenere solet, ut virtus sit, à Constantia debet manuteneri. Hinc non minùs justè, quàm constanter egit Ferdinandus Hispaniarum Rex, quando legem pœnalem, quam in Petrum Consalvi Magni nepotem tulerat, inviolatam defendit. Violatum Petrus officij publici hominem, vincitumque Mondelliam (urbs erat ab arce munitissima, & marmoreis ædificijs totius Patriæ princeps) perduxit: quod facinus cum Ferdinandus armis vindicare statuisset, Consalvi Magni precibus mitigatus Petrum ad decimum ab aula milliare relegavit, & Mondelliam funditus everti jussit; ut æquata solo perpetuus apud Proceres esset regiæ severitatis testis. Intercesserat Consalvus, ut paternæ virtutis monumento, natalique solo tot sumptibus ædificato parceretur: accesserant Legati Gallici deprecatores, æquum censentes; ut, qui centum urbes, innumerâque oppida pro Rege occupâisset; is mutuo munere paternum oppidum impetraret. Sed Rex invictus, quæ statuit, observari voluit, &, ne à Justitiæ constantia severior crederetur, pro Mondellia paucos intra dies everfa Loxam urbem Consalvo possidendam donavit. (t) Sic est: non est emendanda lex, quæ est, ut emendet. Iniqua est æquitatis conditio, si deficiat justa in reos pœna, & delinquentium duret reatus. Qui causam statuendi habuit, statuta urget, dum manet causa; ne fiat patronus criminis, qui fuerat vindex.

Pari ratione Prudentia sibi jus perennandi vendicat. Solon cum leges difficiles, sed necessarias Reipublicæ bono condidisset, abiit spontaneus exul; ne civium rogatu abrogare cogeretur aliquas idem, qui condidit; &, dum facilis videri vellet, inconstans esset. Sapienter Pausanias Plistonaëti, cur nullam ex priscis legibus apud Spartanos antiquare jus esset, quærenti, respondit: *Quod cives in potestate legum esse oporteat, non in civium leges*. (u) Qui multis lege conditâ consultum voluit, servatâ consulat: ne, dum legem abrogat, virtuti deroget. Si deliberandum est diu, quod statuendum est semel, retinendum est semper, quod statutum est semel: imbecille enim dixerim, quod diutiùs parturitur, quàm partum vivit. Recitatur lex, non promulgatur, quæ vix lata, jam sublata non amplius obligat. *Facilis legum, quæ extant, in novas commutatio, naturam legis infirmit*. (x) Lex quippe non est, quæ non corrigit, sed corrigitur. Erroris suspensionem facit, qui, etiam quod sapienter jussit, revocat; an enim emendes, an immutes, quis discernet? Prudentiæ proinde erit, non tam servanda præcipere, quàm præcepta conservare: nequè enim est virtus, quæ per inconstantiam elanguet, aut non tueretur ea, quæ aliquando prudenter fuerunt.

Verùm cùm & Princeps humani nihil à se alienum putare debeat; errare potest, cùm vult sapere. Nunquam labi inter optanda, non inter speranda reponi debet. Nolo Herodianam in dato semel imperio constantiam: *Neque enim prudens, nequè constans improbitatem primam secundâ signavit.* (y) Erravit Rex? non firmet errorem errore novo. Quid enim turpius? errare, ne videaris errâsse, & quod malè statutum est, pejùs tueri. Agesilaus, cùm audiisset perduellem quempiam in omnibus tormentis durâsse, *quàm miser, ajebat, hic homo est, qui in res tam flagitiosas constantiam collocat!* (z) Obstinatus est, qui sic est constans, & graviùs errat, dum non mutat errorem. Præclarè constantissimus in accepta semel æquitate Imperator, Carolus V. Hic cùm privilegium quoddam à se consignatum moneretur Justitiæ legibus repugnare, mox sibi reddi jussit, ac discerpendo dixit: *malo meam lacerare scripturam, quàm animam.* (aa) Id quod didicisse videtur gloriosissimus Ne-
pos Philippus, cujus symbolum erat: *quod malè captum est, ne pigeat immutare.* Incurabile malum est, quod pertinaciâ inveterascit, & depositis similes ij, qui eo laborant. *Nam deserendi sunt ab optimo consilio; donec tandem inde profecta incommoda sentiant.* (bb) Sed inquirunt: Regiæ authoritati derogat, qui legem emendat: quasi innocentius erretur, si pomposius. Magis Regium est, si errori gladium injicias tollendo, quàm si paludamentum tegendo. Sub aliena specie si placuit vitium, sub propria displiceat: & quæ primum conspectum fefellerant, non fallant secundum. Multa nudantur à tempore.

Ipsa mutatio consuetudinis, quamvis utilitate adjuvet, tamen novitate perturbat. (cc) Ideò ex Antisthenis consilio *tanquam peregrinum exulet, quidquid ex consuetudine perniciosum nascitur.* (dd) Antiquetur, quidquid malè antiquum est, *Consuetudo Principis authoritati cedat, pravum usum lex nova, ac ratio vincat.* (ee) *Malè enim recti locum tenet error: quia publicus est, & passim receptus.* (ff) Quasi honestius sit, quod frequentius. Nihil innovat velut varius, & inconstans Rex, qui antiquissimam legum honestatem lege novâ prosequitur. Mutavit diuturnus mos rationem boni? quid mirum, si eandem alibi quærat, & urgeat æqui bonique tenacissimus Princeps. *Constantia enim virtus est, quâ firmiter in proposito persistitur, quàm diu ratio dictabit.* (gg) Immensum quoddam eventuum mare mundus, varijs, & incognitis causis tanquam ventis agitatum. Ut ergò mutatur, & migrat bonum; sic mutetur etiam voluntas; ut ex ipsa hac mutatione semper insistat bono. Non vult diversa, qui eandem in diversis spectat honestatem. Non abs re Leothyichidas inconstantiæ taxatus reposuit: *mutor, sed pro temporum ratione, non ut vos: prudentis enim est, consilia pro re nata mutare: & sine causa alium fieri, inconstantis.* (hh) Hinc, ut sapientissimum habet Caroli V. effatum, *consilia, & sanctiones eadem perseverare non possunt, uti neque tempora, quæ quater per annum variant.* (ii)

(a) Ambr. de off. (b) Sen. ad Lucil. (c) Job. 2. (d) Sen. in Thyest. (e) Fab. l. c. 19. (f) Sen. in ep. (g) Tacit. l. 2. (h) Bell. l. 1. (i) Cassiod. l. 4. ep. 21. (k) Sen. ep. 1. ad Lucil. (l) Nieremb. virt. coron. pag. 147. (m) Ibid. pag. 105. (n) Plutar. (o) Bern. ep. 129. (p) Lucan. l. 7. (q) Jov. l. 11. hist. (r) Plut. in apophth. (s) Ibid. (t) Jovius in Confalvo. (u) Plut. in Apophth. (x) Arist. l. 2 de Rep. c. 71. (y) Carol. Scrib. in polit. l. 2. c. 15. (z) Erasmi. l. 1. apophth. (aa) Didac. Saaved symb. 65. (bb) Euseb. Philotoph. apud Stob. ser. 23. (cc) D. Aug. epist. ad Janu. (dd) Apud Laërt. l. 6. c. 1. (ee) Isidor. in synon. c. 2. (ff) Cic. ep. 58. (gg) D. Th. 2. 2. q. 173. (hh) Plut. in Lacon. (ii) Virt. coron. Nier. pag. 156.

*INVICTISSIMA AUGUSTISSI-
MÆ DOMUS AUSTRIACÆ INTER
PROSPERA, ET ADVERSA CON-
STANTIA.*

CRedámne posse concuti AUSTRIADUM fores,
Quas ante Numen excubat?
Credam, reverso gurgite ubi current freta,
Ferétque cælum gramina:
Credam, ubi nivosis Phœbus ardebit Scythis,
Thetísque flammæ nutrit.
Non, si resurgens primulâ Titan face
Rosâs coronet sydera:
Non, si diurnos balneo abluere maris,
Jubeat labores Hesperus.
AUSTRIACA possunt pectora extolli altiùs,
Angoribúsq; deprimi.
Rumpere silentis Tethyos pacem queunt
Phalanx duellans Æoli,
Fortuna fatum vertere, inimicâ manu
Si fortè jactet aleam:
At sede non evertere AUSTRIACOS suâ:
Adamante stat sempiterni,
Opere perenni structa RUDOLPHI DOMUS,
Æternitatis symbolum.
Exempla defunt? maximi exempli vices
LEOPOLDUS implet unicus.
Vidi furente turbine excussa in thronum
Volare nuper fulmina,
Quando frementis sæva tempestas Scythæ
Terrore cepit AUSTRIAM:
Vidi vicissim Cynthij impletum joci,
Zephyríque fœtum balis;
Dum vel secundo Marte depulsi solo
Probrum fuere Barbari;
Vel occupatis Aquila construxit novos
Nidos triumphans urbibus:
Sed fronte eâdem semper, & vultu sibi
Similis priori constitit.
Qualis tumentes inter Aquilonum minas
Jovis furentis impetus,
Ac svaviantes pariter astrorum jocos,
Amæna Phæbi basia,
Constans Olympus vertice sereno nitet,
Sortémque ridet Protheam.
Quoties sacratum petijt AUGUSTI caput
Emissa turba Tartaro?
Rebellionum turbinem enatum styge
Statione cedens Cerberus,

Erebiq̃ue partus Hæresis in aulam impulit
 Motura sede Cæsarem?
 Nîl ille motus, ardua ut cautes salo
 Risit procellas æquoris.
 Tolerare nempe fortiùs fortes decet,
 Et ferre fluctûs impetum.
 Haud est virile, dura si tollas, gradu
 Perstare firmo. Turbines
 Si non laceffant placida ventorum freta,
 Nullûsque surgens gurgite
 Permiscet æstus, puppe te portum integrâ
 Tenuisse non mirabere.
 Superare fluctus posse, nec vinci malis,
 Solius est Constantiæ.
 Ut tristiori Cæsaris Nostri fibras
 Bellona telo læderet;
 Accendit ipsa duplices nuper faces,
 Flagrûmque versans dexterâ,
 Et quâ jugales Phœbus accendens novos
 Monstrat juventam Memnoni;
 Lassatus & quâ properat Hesperio mari
 Axes rotarum mergere,
 Excivit hostes: Fausta sed posthac DEO
 Favente cecidit alea:
 Quando lupatos mandere edocti Scythæ,
 Calcata Lunæ cornua,
 Et occupato Lilia excedunt solo.
 Hinc quæ voluptas nascitur?
 Mæroris & quod inde se pandit mare?
 Sed stans moveri nescius
 LEOPOLDUS esse docuit AUSTRIADUM, Sibi
 Constare nunquam dispares.
 Nam sive molli Zephyrus afflatu beet,
 Pennîsque blandis provehat;
 Seu perstrepenste turbine armetur minax
 Boreas, feroci flamine
 Rapturus omne patriæ terræ decus;
 Astant serenis vultibus,
 Sortîsque semper mobilis calcant rotam.
 Fortuna fors *His* rideat?
 Suos faventi subtrahunt vultus Deæ:
 Fleat Illa? dulces explicant
 In ora risus. Semper, & quovis *Sui*
 Sunt in tumultu. Vivite
 Sic *magna mundi Sydera*, perenni Polos
 Ambite motu, & Arcticum
 Antarctico sic jungite: ut firma AUSTRIÆ,
 Orbiq̃ue Pax affulgeat.

LON-



LONGANIMITAS.

Flos Aloës seris quamvis, tamen advenit annis:

Longaminis nulla est sic mora longa nimis.

Flos Aloës quod habet, DOMUS hoc habet Austria tristem

Passa diu sortem, floret, & auget opes.

Longimanos alios bellis extensa Tyrannis;

Longaminos virtus efficit AUSTRIACOS.



Agnum imperij corpus, ut multis tuendum est manibus, ita magna Principis animandum est mente; cujus mensura Longanimis virtutis est decem peda; huic ni respondeat, pusillam crede, nec regno ferendo parem, licet cum Atlante humeris cælum tangat. Qui enim molli cum arundine ad quosvis eventustrepidat, aut contrariæ cujusvis est ludus auræ, labentem princeps vix fulciet orbem. Nec diademata Regum, sive aurea, sive gemmea dixeris, sine pondere sunt; caput erectum, ingentesque humeros, ærea pectora, dextramque Herculeam petunt, quæ adhuc in cunis anguium elidat animos. Ita dum pastoritiam tractabat arundinem, digna Rhetorum jam gessit calamo, olim è caula evocandus ad regnum Vates Regius; qui futurus aliquando superior gigante, nulla priùs calamitate se ipso factus est minor, donec quos ferro, & robore non potuit ad ruborem hostium longanimi patientia malorum insultus vicit. Nimirum: ut vix integro sæculo inter viscera terræ aureum partum natura excoquit: solidas quercus una vix ætas nutrit: sic magnas animas, totum quæ portent orbem, non una dies alit. Longa tempora requirit virtus, nec ad coronas maturescit: nisi frequens adversitatum rigor, & curarum æstus cum vere hyemem, æstatemque misceat, & fortuna sæpe non ultra herbam adulta rursus sub falce fatorum cadat.

Grande hoc, si quis unquam, certè Austriaci Heroës, quorum regia indoles rebus in laceris semper integra, in perditis semper sua, in desperatis semper DEO nixa, longanimis penetrârunt arcanum patientiæ; quæ illis instar est sigilli: dum sibi constant, quamcunque cupiunt figuram forti imprimunt, & quod intendunt bonum, effigiant. Austriacis siquidem Principibus jaculorum objectæ grandines sunt ora in portum gloriæ: Tanta illis fiducia sui, ut fortunæ ire obviam non dubitent; nec illi loco cedant, nec habeant, unde timeant; in pace divites oleis, in bello laureis. Atque ut ex urticis apes mella colligunt; faber peritus ex ensē format Clypeum; extoxico medicus alexipharmacum: sic longanimis Austriacorum Principum in adversis tolerantia hac arte pollet inclyta: ut, ad stuporem orbis, cuncta possit facere, quæ desiderat. Hinc tanta illis malatia mentis, ut Socratis imitatores, videantur nunquam tristari, mutari nunquam; iidem semper, semper beati. Et quamvis in Austriacæ virtutis solum livor, & invidia hostili manu malorum omnium jactent semina, malis tamen infracta Austriacorum virtus post aliquot aristas in regium epulum poema adolescit in aurea,

Huc oculos, si spectaculum amat orbis: huc animos, si miraculum. Magnis Majora Cæsarum Nomina, ni potius dixerim; Magni Nominis Cæsarum prodigia audiat RUDOLPHOS, ALBERTOS, CAROLOS, FERDINANDOS, LEOPOLDOS: Quod in pacis nostræ Signo cum RUDOLPHO primo felici augurio imperium sunt auspicati, eodem, quo DEUS regnat, Sceptro contra hostes DEI, & Imperij hucusque gloriosè sunt usi. Hinc laceratis licet Regnis integri tamen semper Cæsares nihil unquam perdidere Majestatis: quia sui imperium, externo quovis Augustius diuturna adversitatum tolerantia sine metu, & motu retinebant. Quin imò qui ultrò se ingerentem Fortunam non raro arridere dedignati, hostili tumultu territam, avolantemque irridere sæpe sunt visi: dum etiam reluctantem longaminis patientiæ in nassas involutam orbi spectandam evoluerunt: paucarumque ætatum lustro tam ampla, & Augusta Maiestatis sumpsere incrementa: ut totus Austriacis prope mundus in palatium cesserit, cujus extremos angulos cum Sampsonè complexi pro libitu orbem concuterent: nisi sustinere mallent Longanimitate facti Longimani, nemine non Majores, quorum animus etiam cælum transcendit. Latius profectò Augusta Regum Indole Sceptra propagare non volentes, quam mundus pateat. Qui tamen, licet sobriæ ipsorum regnandi potestati sufficiat; non tamen factis, & famæ, quâ plures mundos impleturi fuissent, si darentur.

Nequè est, quod in hoc miretur orbis. Adversitatum quippe pondere firmatur Austria, non gravatur, minùs opprimitur, sed contra naturam gravium ad cælum usque sublimatur. Hinc ut cedro dignam domesticam Virtutem multis adversitatum motibus exercitam, probet minimè sterilem, pluribusque regnis ferendis parem: illius quoque afforis exhibet ubertatem; ut grandes arbores solent: dum extra, Austriaca septa, Regalibus Sceptris congenita, avidæ orbis expectationi nova poma protendit. Nimirum, ut Romani Catonis effato: *Non est arbor solida, nec fortis, nisi in quam frequens ventus incurSAT: ipsa enim vexatione constringitur, & radices certius figit.* (a) Sic per non humilia formantur, qui ad magna sunt destinati. Nec enim Coronæ sunt sine spinis, nec Sceptra sine pondere, nec gladius sine cruce. Quos mundi Conditor publico bono dedit, & de virtute solis plurimum participant Cæsares, laborem quoque cum sole dividunt, ut nunquam quiescant. Quin imò quati subinde omnia necesse est: ut, à quo sustententur, fulcro ostendatur. *DEUS enim quos probat, quos amat, indurat, recognoscit, exercet.* (b) Castigata in multis alijs præfidentia, in pluribus superbia, in plurimis incuria, in reliquis severitas, in solis Austriacis exercita subinde patientia non in pœnam, sed in præmium, non ad supplicium, sed coronam; ut videat orbis pro hac Domo longanimi adversitatum tolerantia à DEO sæpe tentata, & probata, majorem potestatem vigilare, quàm humanā.

Sapienter Romanus politicus: *Nihil habere ad quod exciteris, cujus denunciatione, & incursu firmitatem animi tui tentes, sed in otio inconcusso jaceas, non est tranquillitas, malitia est.* Imò nihil infelicius eo, cui nihil unquam evenit adversi. (c) Enervis jacet sine adversario virtus. Ille, qui fudit sanguinem suum, cui dentes crepuerunt sub pugno: Ille, qui supplantatus, adversarium toto tulit corpore, nec projecit animum projectus: qui, quoties cecidit, resurrexit cum magna spe ad pugnam descendit. Nunquam siquidem molle virtutis documentum, calamitas virtutis occasio est. Vix enim quemquam orbis ad magna natum vidit, qui Fortunam ad tempus Novercam non habuit, quæ Spartanæ matris indole, quos à flagellis educat, Heroës nutrit, quos timeat simul, & amet orbis. Herculem monstra probant. Typhim maria, Achillem prælia, virtutem occasio; quæ sola ad solium nata, quæ ibi induratur, ubi cætera emollescunt, & ubi etiam emarcuit non unus Hercules, tamen ad
ardua

ardua efformatur Ferdinandi successu potius, quàm nomine Secundi, magis robore animi, quàm Imperatorio Titulo invictissimi Cæsaris Exemplo: (d) Contra quem inimicis sæpe quidem classicum intonabat Malitia, sed receptui cecinit Innocentia: persecutiones illi cessere in potentiam, adversa in gloriam. Inde hostibus factus terribilis, bonis amabilis, utrisque admirabilis. Hic decumanis procellis vapulans adeò longanimi induruit patientia, ut consuetudine tolerandi versa in naturam vincendi, præter virtutem nescias, quid amârit, præter DEUM, quid timuerit. Tam solidi pectoris erat, ut totius orbis suffragio: hunc sibi rerum natura delegisse sit visa, quo illius ætatis lustro metuenda collideret; qui cum viribus sibi stabilire Regna potuisset, longanimi virtute victor eligi maluit, quàm intrudi, quæri ad Regna, quàm quærere: Longamini meritorum Fiducia expectare honores, quàm provocare. Adeò verum est: eos celeriore impetu ad dignitatem ferri, quos gravat Heroicorum facinorum pondus, quàm quos alæ ambitionis deportant.

Nequè mirum: tot enim inter adversitates adulta Cæsarum patientia portentosa semper mater est gloriæ; gemino foecunda pignore, Clementiam, & Pietatem generat; illâ populorum affectû rapit; hâc ipsum DEUM, & Cælites in sui amorem, & defensionem trahit. *Divina quippe Dexterâ libens se adjungit longanimi supplicum pietati, præcipuè; ubi superborum impietas est vindicanda.* (e) Hinc ut vinceret olim in terris Imperator Theodosius, Martem in cælis induunt Superi; pro Carolo absente præsentibus cæli genij occupatas tuentur urbes, excubias pro mœnibus agunt, repentinos hostiû insultus depellunt; verbo: orbis suffragio Augusta Austriadum Sceptra rebellibus tentare signis, est velle Jovis solium movere cælo. Fulmen è cælo provocat, & suæ vicinus est ruinæ, qui illud impetit. DEO pro Austria stante nihil Austriaci hæcenus timuere, formidantibus omnibus, quibus non amati; quorum hostiles machinæ, & consilia hucusque solis votis stabant onusta, ut steriles arbores solent, quæ folia proferunt, fructu carent, versantur in herba diu, ac tandem uno sole decoquuntur. Vanæ scilicet sine viribus iræ, cassumque fulmen, quando hostes ferociunt, cælo reluctante, & tuentis DEI dextera diademata curat. Ut cos chalybem acuit: sic gloriæ aciem intendit sæpiùs versa volubilis Fortunæ rota, quæ fidem æquè frangere, ac dare prompta, per ipsa, quæ instruit fulcra, sæpe hostium ruinam parat, præcipuè; cùm cælorum lege sancitum sit: ut ad propriam ruinam festinato perveniant: qui impotentes gradiuntur ad alienam.

Sapientis proinde hæc nota Principis: non semper ire uno gradu, sed una via: nec se in aliquibus mutare, sed potius longanimi tolerantia aptare: nec pericula metu, nec calamitates luctu dignari: atquè infra se omnia, æmula cæli facie despicere. Nubili, & sereni vices inferior mundus patitur: incumbens desuper cælum nunquam mutatur. Hinc Mantuani Vatis monitum, *Tu ne cede malis*. Multos citiùs in portum tempestas devexit, quàm malatia. Inermis arenam fugit calamitas; in qua Longaminis patientia agonem parat. *Fortes enim, ac strenui contra Fortunam insistent spei, timidi, ac ignavi ad desperationem formidine properant.* (f) Unde lamentis, aut lachrymis calamitatis æstum temperare Majestatis vultum dedecet: nec his fata placari solent; sed sæpiùs irritari, ut ex aspersa flammis unda magis ardet ignis. Ita Imperator etiam Imperio exutus: *placidus ore, intrepidus verbis, intempestivas suorum lachrymas coarguit.* (g) vel hoc solo invictissimus: quod hanc, quæ tot invictos vicit, adversam sortem Heros pede calcando fregerit. Excelsi namque scopus est animi, non gemitu; sed factis Heroicis diuturnæ calamitati metas ponere, quibus sæpe evadit gratum, quod fuit invisum, & longa experientia facit acceptum, quod imaginatio descripsit formidandum. Accidit nimirum etiam nonnunquam viris, quod tenellæ ætati affolet, quæ quibus assueverit, cum quibus ludit, si personatos videt, expavescit. (h) Ast falli nequit, cui longanimis

ganimis virtus domestica est; hæc non hominibus tantum, sed & rebus larvam detrahit, videtque nudatum effrontis Fortunæ vultum, dum nil in ea timendum reperit præter ipsum timorem.

Unde natus Politicorum aphorismus: *Ferendum, non culpandum, quod evitari non potest.* Nam ut nullum violentum est diuturnum; brevique hora tempestatem abstergit, quæ in terram trifulca vibrabat fulmina: sic nullus minus formidandus malorum furor, quam qui impetu fertur. *Repentina enim irruptiones hostium vim omnem in impetu habent, eorumque, si non figitur mucro, retunditur.* (i) *Nam nondum me fefellit, canem timidum latrare vehementius, quam mordere.* (k) Et quamvis nihil tam firmum, cui etiam ab invalido non sit periculum: tamen ut *magna arbores diu crescunt, & sæpe una hora extirpantur.* (l) Sic magna hostium molimina non raro aggressu ipso terminantur. Verbo: Nulla adeo intractabilis calamitas est, cui suum manubrium non sit, quo tandem capi, teneri, ac vinci possit. Neque semper virium contentione res conficitur: est interdum ubi cedendo, atque obsecundando altius assurgatur. Expertus dux Albanus ab exilio ad Lusitani belli administrationem revocatus; hic dum enixè peteret: ut sibi liceret in itinere Regem adire, dextramque ejus osculari: veniam adhuc ambiguus non impetravit. Tantum homini Rex tribuebat, ut crederet posse & illum gratiæ incertum, & se fidei securum esse; cujus obsequij id meruisse præmium visus est: ut in summa regis gratia, inque ejus Regia, ad pedes inter amplexus ejusdem expiraret, belloque ex animi sententia confecto inter victoriæ plausus suo in Triumpho conderetur. (m) Sorti proinde, cui reniti non potes molliter ad tempus obsequendum regio Philippi monito: *Ego, & tempus contra Duos.* Tempus victores probat; qui Antæus est, vires colligit, etiam dum cadit. Nec in ipsa clade prostratus miles Laureæ jacturam fecit, cujus animus ingens victoriarum seminarium non est subactus; Hoc solo superstiti necdum periére instrumenta gloriæ. Sæpe qui victi recesserant à primo conflictu, victoriam retulere secundo.

Hoc eodem longanimis tolerantia stratagemate vicisti Magne Cæsar LEO-POLDE virtute, & victoriarum prodigijs famam. Longanimitate factus Longimanus,; quem pluribus annorum centurijs Mars emetiri non poterat Centimanus. Tu varijs adversitatum arctatus angustijs Orientem, & Occidentem uno velut stringis amplexu, major hucusque futurus, si orbis major fuisset. Sub Te namque curvantur, qui portant orbem; viginti & amplius prælijs victor, Fortunam duxisse videris, non secutus; & fata ad arbitrium ferro, & armis compulisse, ipsamque Martis Fortunam *Consilio, & Industriâ* superasse. Legent cum tempore feri Nepotes: mirabuntur invidæ sæculorum ætates: Te paucorum annorum impendio, Longanimi tamen adversitatum Tolerantiâ multarum ætatum compendia retulisse; victoriarum cumulis non tam calamum, quam plurium scriptorum memoriam fatigasse; qui si tacuerint, lapides loquentur, sub quibus hoc ævo stellarum numero, Ecclesiæ natos, non impares suscitasti filios Abrahæ, qui aliquando Beatorum relati inter sidera, Filio Tuo accrescenti JOSEPHO lacteam exhibebunt paternarum victoriarum semitam; quam dum æquis Regiarum virtutum emensus passibus, in plurium Regnorum purpuram natus Porphyrogenitus, testes paternæ appellare poterit Lumina gloriæ, quod etiamnum, ut olim Theodosio, totus Sibi militet æther, & conjurati veniant in classica DIVI.


(a) Seneca. (b) Idem. (c) Idem. (d) Lamorm. in vita Ferd. (e) Fam. strad. Dec. 2. (f) Chok. (g) Tacit. (h) Seneca. (i) Fam. strad. (k) Curt. l. 8. (l) Idem l. 7. (m) Strada Decad. i. l. 7.

GIGANTEA VIS ANIMI, SEU INVICTA LEOPOLDI CÆSARIS LONGANIMITAS.

DAnt Aquilæ pennas, quæis Te, LEOPOLDE, volanti
Perstringam veluti calamo; deque hoste cruorem
In tua manantem præconia pronus adopto.
Bellis pressa diu jam felix AUSTRIA surge,
Cui datur invicta LEOPOLDI stare sub umbra,
Cui victrici iterum datur aurea plectra movere.
Candescente nitent Insignia vestra pagellâ
AUSTRIACI! Felix, quem jussit scribere in illa;
(Quæ juncta est Domui vestræ) Sors aurea firmo
Fœdere. Margo nitet Tyrium simulante colore;
Charta decora mihi est, quæ sic maceratur ab hoste.
Cantantes igitur revehant ad sidera Alaudæ,
Quæ Tua Longanimis Virtus, O maxime Cæsar!
Ipsis attonitis, multumque stupentibus Astris
Exhibuit. Quando bellorum nube Tyrannis
Lunigera AUSTRIADUM placidas vitiaverat oras;
Eque suis campis timidas pellebat Alaudas.
Errantes, fatuosque diu sine viribus ignes,
Quasque minas genuit Fraus adstetricante Furore;
Disiectis procul hinc tenebris hebetaverat unus,
(Quem jam victorem geminus deprædicat orbis)
Longanimos Cæsar stringens in monstra lacertos.
Pressa diu exsolvit sese, rupitque catenas
Pannonia. Haud vobis ultro (spem ponite Turcæ)
Serviet. Immani tenuistis compede pressam;
Immani vinctam LEOPOLDUS compede solvit.
Qualis ubi Andromedam Perseus materna gementem
Crimina, & ad duras fabricatam in littore cautes
Exsolvit miserans Victor, sociamque reduxit.
Sic tua Longanimis Virtus, LEOPOLDE, triumphat;
Sic superos, hominesque rapit, sic Regna maritat;
Sic Paphio veluti phyltro, ceu compede longâ,
In famulos stringit nexus, disiectaque Regna
Jungit, & unanimes æterna in fœdera cogit;
Sic Geticas gentes, & vix de nomine notas
Vis Tua longanimis, posita feritate, trahebat;
Ut prius indomitæ, cicures jam Nomen adorent
Augustum, ac poplite affuso Tua jussa facestant.
Hæc Tua longanimis probitas immania adæquat
Brachia torrentis, qui magnas alluit urbes,
Qui centum populos, qui Euxinum flumine Pontum
Bis terno irrumpit, gelidos dum potat alumnos
Illyricis Regnator aquis: quin passibus amplis

Exsuperat: Numénque Tuas metitur ituras
Plus ultra longâ palmas virtute paratas.
Una hæc longanimis Pietas adversa subire
Te docilem erudit; sola hæc animavit anhelum,
Et palmam fessæ longa ob certamina dextræ
Inseruit. Sola hæc tacitè fodicabat in aurem:
Durate, & vosmet rebus servate secundis.
Continuos, LEOPOLDE, Tuos ex hoste Triumphos,
Quos longâ serie memoras, mirabitur omnis
Posteritas; sed nulla parem Tibi sæcla videbunt,
Vis animi cui tanta foret. Licet ipsa trophæa
Poplitibus flexis Othomanica Porta ministret,
Occiduos tamen haud poterit vis ulla triumphos
Sistere, cui juncta est Virtus, cui militat æther,
Cui conjurati veniunt in prælia Divi.
Tempora dum recolo, quæis æmula sceptrâ fatigas;
Si bene fors memini, cantatur fabula de Te:
Da veniam verbis; quantum mutatus ab illo es!
Erravi; culpam fateor, sed parce canenti:
Unus eras, idémque manes, ceu dulcia spirent
Flamina, ceu Boreas inimica volumina tentet.
Unus eras semper; non Tu, Fortuna novatur.
Dicere num poterit de Te LEOPOLDE vetustas?
Multa tulit, fecitque. Id dixit, & ampliùs orbis
Audiet immenso magnalia clara Gradivo.
Alternâ fatis inimicis conjuge raptâ,
Quod Tibi tum nemo audebat promittere Divùm;
Illud longaminis Virtus, en, attulit ultro.
Attulit Augusto Neoburgi Stemmâte Natam,
Attulit Augustâ Leonoram prole beatam,
Attulit & plures clarâ cum Conjuge Natos:
Qui sic Cæsaream stipant longo ordine mensam,
Sic cingunt, útque ore uno MATRISQUE, PATRISQUE
Augustis similes contendant reddere vultus:
Longanimémque unâ PATRIS jam voce loquantur
Virtutem viridi Parnassi vellere claram.
Longanimis mens, credo, parem Te fecit Olympo,
Vertice qui superat nubes, quem nulla laceffit
Ignea quantumvis rabies, inimicâque terris
Ingruat, & nimbis validis, & grandine fessa
Tempestas: Unus bella horrida, sæva pericla
Longanimi virtute Tuâ ceu sole micante,
Dispulsis tenebris, victrici luce serenas.
Ad nomen, LEOPOLDE, Tuum, quod Fama pavore
Buccinat, insolitò Tellus tremefacta per orbem
Concidit, & tristi Te murmure victa veretur.
Sic orbis titubat; sic sceptrâ inimica pavescent,
Quando laceffitur nimum Jovis Armiger Ales,
Quando Aquilæ Imperij justissima prælia cogunt.

ÆQUA-



QUD ISSERT 1801

ÆQUANIMITAS.

*Sors nulla Austriacum nec blanda, nec aspera mutat;
Accipit hanc vultu lætus utrâmq; pari.*

*Exemplum FERNANDUS adest. En Regia sponte
(Si Cælo placeat) ponere sceptrâ cupit.*

*Sed promptam Austriadum non miror ad ardua mentem:
AUSTRI-ACUS debet, quò Polus ire jubet.*



Augustum spectatæ virtutis Theatrum sunt aulæ Principum, in quibus non rarò in lucem dedit Heroum spectacula; qui nunquam sibi similis, quàm, dum Vertumnum indutus frontem exiit Fortunæ ludus; nunquam magis serius, quàm dum fabulam ludit. Et licet subinde conditionem mutet, non tamen animum exiit; malignantis naturæ est; hanc nunquam non prodit. Dum, quæ primo cum lacte hausit venena fraudium, non nisi in magnos animos evomit. *Fortissimos sibi pares quærit, quosdam fastidio transit, contumacissimum quemquè, & rectissimum aggreditur, adversus quem vim suam intendat.* (a)

Nequè omnis dat scena plausum, epinicia cantantur, & epicedia, pœana lessus excipit. Habet enim hoc intemperâtis fortunæ æstus: nimio sui usu interire; & quamvis excellenti bono agnatâ indole terræ ostenditur, non obstringitur. Vix ulla ingentis boni longa est possessio. Scilicet ut nimia malacia tempestatis est prodroma, serenior cæli oculus in lachrymas est pronior: sic summis negatum stare diu. Nam *res etiam secunda acrioribus stimulis animum explorant.* (b) Et adeò validè *sapientum quoque animos fatigant:* (c) ut haud paulò faciliùs sit ex adversa emergere fortuna, quàm conservare semet in prospera, Romani Catonis monito: *Noli huic tranquillitati confidere: momento enim mare evertitur, & eodem die, ubi luserant navigia, sorbentur.* (d)

Et quamvis summorum hæc maxima Principum, quæ sapientum: levis comici personam non induunt: malunt esse spectatores, quàm actores fabulæ. Quòd si tamen *DEUS, bonorum amantissimus, quos optimos, atq; excellentissimos esse vult, fortunam, cum qua exerceantur, assignat;* (e) varièque illos Fortuna induat: Regiæ nil minùs mentes hâc arte Personam sustinent: ut non tam vesteni, quàm animum cælo concolorem in omni scena præbeant: semper illic serenum est. Et licet integram ærumnarum tempestatem injuriæ effundant temporum; cum grandine tamen non nisi ima, quæ feriunt, onerant; Olympum ne tangunt quidem, vix magnum animum: cui ubi cætera suam mortem secum deferunt, hoc inter mortalia immortale accidit: Omnibus stat major casibus malorum Rector, bonorum Victor, cui ipsa calamitas virtutis est occasio.

Viro siquidem bono nihil mali potest accidere; miser dici, non esse potest. Stat rectus sub quolibet pondere, & nulla res illum minorem facit: non metu frangitur, non potestate mutatur, non exultatur prosperis, nec mergitur tristibus. Nunquam in alia

fortuna alius; qui ubicunque est, suus est. Rebus non se tradit, sed commodat, illisque tanquam depositis utitur, & abituris. Magni illius Austriacæ gloriæ Sideris Ferdinandi Secundi exemplo: Hic nunquam magis, quàm dum fortunis credebatur spoliandus omnibus, de Fortuna triumphavit, cui libenter cessit, quidquid illa rapere potuit; imò ne rapere posset, ultro majori virtutis robore in manus illius, à quo omnis potestas in Principes dimanat, projecit Imperij pomum, quàm hostium avidus livor, & invidia rapere potuisset. Nam cum probè nòsset: callidis hostium machinis novas indies coronis suis insidias strui, nil motus animo, *Tantíne, inquit, est diadema? Ego verò, si quem DEUS meliorem Imperio decrevit præficere, paratus sum spontè sceptrum manu, diadema capite deponere.* (f) O vocem auream Magni Cæsaris! vocem Austriaco dignam Principe! Hæc nempe Regiæ libella indolis; æquam in arduis servare mentem, ibique extolli, ubi omnes deprimuntur: ibi stare, ubi omnes jacent.

*Regium hoc ipsum reor
Adversa capere, quoq, sit dubius magis
Status, & cadentis Imperiû moles labat:
Hoc stare certo pressius fortem gradu.* (g)

Nam ut plebeia, aut levis est nota mentis, quolibet eventuum pondere in ima rapi: *magnum, DEOq, vicinum est non concuti,* (h) nec se alium in alia fortuna præbere. *Hanc stabilem animi sedem voco,* (i) qui quasi stella in orbe fixa fulgeat; quæ, licet orbis in gyrum agat, ipso tamen in motu stat immota. Sanè non hilariorem quisquam, non tristiores Socratem vidit: æqualis semper in tanta inæqualitate fortunæ. Nequè Regulo fortuna nocuit, quod illum documentum fidei, documentum patientiæ fecit. Figunt cutem clavi, & quacunque fatigatum corpus reclinavit, vulnere incumbit, & in perpetuam vigiliam suspenso sunt lumina. At quantò plùs tormenti, tantò plùs erit gloriæ. Vis scire, quàm non pœniteat, hoc pretio æstimasse virtutem? refice tu illum, & mitte in senatum; eandem sententiam dicet. Adeò nunquam molle virtutis documentum est, & vix magnum exemplum, nisi mala Fortuna, invenit. Prospera siquidem in plebem, ac vilia etiam ingenia deveniunt. Avida est periculi virtus, & quò tendat, non quid passura sit, cogitat: quoniam, & quod passum est, gloriæ pars est.

Ad hoc proinde sacramentum adaçti sumus: ferre mortalia, nec perturbari his, quæ nostra potestatis non sunt. (k) Nihil privatim, nihil publicè flebile est. Acerbitatibus enim, & æumnis cedere, est ad earum partes accedere; quin imò quod in humani corporis compage qualitatum temperamentum, hoc in unitis Regnorum, & Provinciarum membris est ad pondus rationis in qualibet fortuna compositus Principis animus. Illius perturbatio imminentis morbi est prodroma; hujus confusio mortem Imperij præfagit. Perturbatio enim, & confusio rerum omnium oritur, quoties è facie Principis, tanquam ex illa cæli, prospicere licet tempestates, quæ impendent Reipublicæ.

Hinc si quem candidæ sortis pullum blandioris cæli, & naturæ favor ad purpuram, & coronas in lucem edidit: Solis ad instar fulgeat necesse est. *Solis vis integra est, etiam inter opposita, non est sereno minor, nec tardior quidem in opere est, cursu suo fertur,* (l) & quosvis inter ventos semper idem. Nam ut frequentia malorum impatientis animi deliquia ruinam Imperij portendunt: sic æqualis in omni fortunæ casu Principis vultus subditos erigit, quin & hostes in admirationem rapit. Ita nimirum hæsit attonitus Victor Hannibalis gladius, aciemque plùs nimium audentis furoris ad Romanam hebetavit constantiam, quæ sibi tunc maximè constitit, dum etiam

vitæ

vitæ spes vacillavit: adeò virtus, quam nequè metus stringit, nec casus prostermit, etiam in hoste venerationi est. At verò ubi cum vultu Principis animus pro varia fortuna fluctuat; arundo Regnorum est felicitas, tranquilla nunquam, inquieta semper. Subditorum enim affectum vultus Principis exprimit. Hoc solo turbato, ut in eclypsi Solis assolet, turbatur orbis. Ita Othonis vultum intuebantur, quotquot cum eo convivio accumbebant: *utq; evenit inclinatis ad suspicionem mentibus, cum timeret Otho, timebatur*: (m) haud fecus, ac dum ex Naucleri oculis ij, qui in eadem navi, sunt, colligunt, num tempestas grandis sit.

Hinc Tiberius tristissima quæquè occultare laborabat Maronis monito: *spem vultus simulat, premit altum corde dolorem*. Ferreum nimirum indutus animus vitreæ Fortunæ insultus dum fregit, risit. *Miser est, qui se non beatissimum judicat, licet mundo imperet*. (n) Unde summarum hæc dos, & cos est mentium: posse læto animo adversa tolerare, & quidquid tibi acciderit, sic ferre, quasi tibi voveris accidere. (o) Sanè nemo Principum hoc solo beatus vivit; quòd supra cæteros emineat; nemo enim hucusquè sub tam benigna sideratione primam vitæ lucem est auspicatus, cujus horoscopum sinistrum aliquod astrum non attemperâisset. Gravia sunt Cæsarum diademata, in quibus curæ, bella, & metus nidificant: atquè ut summi montes tempestatibus subjacent; sic magna regna magnas turbas patiuntur, sæpèque dum hostes foris desunt, nascuntur domi: ferrumque quandoq; timendum est Principi, quo latus tegitur, & ipsa timoris arma sunt formidanda.

*Sapius ventis agitur ingens
Pinus, & celsæ graviore lapsu
Decidunt turres, feriuntq; summos
Fulmina montes. (p)*

Expertus id expressit magnus Hispaniarum Monarcha Philippus; qui dum Albani morte, & multis quæ in ea rerum felicitate obvenère funeribus, indoleret, auditus est, cùm diceret: nunquam se melius expertum rerum humanarum vices; quòd videlicet, quo tempore tot regnis augebatur, tunc & Primogenito regnorum Hærede, & Regia Conjuge, & summo, fidòque militiæ duce orbaretur. Quinimò Otho Imperator dicere solebat: *Nescitis amici, quid sit Romanum gubernare Imperium: mihi credite jam experto, qui jam mori malo, quàm imperare*. Non enim semper eadem sunt incrementa honoris, & felicitatis, sæpe dum ille influit, ista effluit, & sub magni nominis umbra negatur quies. Neque aliter Regum quies, quàm maris tranquillitas, momento turbatur. Quos alia ex alijs cura fatigat, vexat animos nova tempestas, & *ubi tranquilla videntur omnia, non desunt nocitura, sed quiescunt*. Charybdim credideris, aut voraginem, quæ lentè de gyro in gyrum transmittit navigium, donec ad centrum reductum omnia absorbeat. Hinc grandis Imperij oneraria Ulysses navarchum expetit, cujus virtutis robur nec blandam induta Sirenem molli obsequio frangat felicitas, nec in furem Scyllam degenerans latratu suo terreat adversitas: Qui ibi etiam novit firmam figere votorum anchoram, ubi portentosa summorum spes non rarò naufraga de littore desperavit. Imperatoris enim quodlibet tempus virtutis est occasio. Æstus, & malacia Navarchi, prospera, & adversa fortuna Imperatoris experimentum extorquent. Ipsa nimirum humana omnia in orbem eunt, versantque lubricam Fortunæ rotam: ut par ille Superum animis, qui tot inter fatorum vices stet immotus. Humano quippe majus aliquid inter humana nil humani pati. Prodigio affine est, lubricæ sortis subiectum alex, nunquam tamen imparem

virtutis numerum referre; atquè ubi communi fato rotantur singula, rationis orbitam non excedere: & quamvis Majestas regna subijciat, & imperia, vel giganteæ molis Mars pedibus substernat cadavera; tamen gloriâ non efferri, nec innumeris Victorem prælijs à se ipso unquam vinci, ipsique Victoriæ nobilem in partem cedere triumphi.

Sanè adeò portento non absimile, magnam nôsse æquo animo ferre Fortunam; ut hæc non minima summæ felicitatis portio sit, felicitatis sensu non tangi, ac illa minùs uti, quàm possis, atquè inter tot ancillantis sortis obsequia incautam nimiùm mortalitatem à felicitate non vinci. Insolenti enim sorte impotens sui animus quò altiùs assurgit, graviori lapsu concidit, infelix Phaëtonis æmulus non semel infami busto incendit orbem. Testatur hoc propudiosum naturæ humanæ monstrum, Romani sitiens sanguinis hyenna Nero; cujus intemperans felicitatis æstus fastu, & quidlibet audendi libidine sufflammantibus, Romana incendit Pergama; dignus, qui Romani Populi inter cineres crudelitate infamem animam tumularet. Ut meritò felicem dixeris in tanta inæqualitate fortunæ æqualem semper animum, qui nequè prospero rerum statu trahitur, neque earum ventis reflantibus retrahitur, & licet à diversis, & adversis agitetur, eundem animum, mentemque eandem in diverso tempore, & statu gerit: dignus ejusmodi aureo Sigismundi Cæsaris calculo, qui ad Augusta Cæsarum subsellia sublimetur. Hos nempe Imperio censuit aptissimos, qui neque secundis rebus inolescunt, neque adversis franguntur.

Argutè proinde Argus notavit orbis: Austria Erit In Orbe Ultima: non quòd ærumnas abijciat, sed æquanimiter ferat; quinimò rosarum indole felicitatem suam à spinis auspicatur. Nam postquam res adversas suæ facit virtutis materiam, convertit in prosperas: atquè ut inter urticas solet diutiùs suam servare purpuram Regina florum: sic Austriaca trophæis inclyta nutrit patientia palmas. Multos siquidem adversitas perdidit, hanc servavit; quam subiti casus tangunt, non tamen lædunt. Ferendo adversa evadit sublimior, quàm alij agendo prospera.

Nequè opus est exempla à longinquo petere, quibus virtus domestica est. Ecce spectaculum dignum, ad quod respiciat intentus operi suo DEUS, Principem Austriacum cum mala fortuna compositum, potentissimum orbis Monarcham, Magnum Cæsarem LEOPOLDUM Primum: Hic nempe pacificus licet, vix unquam tamen pacem, aut quietem habuit; nisi dum bonæ causæ gloriosè insistens, Majorum exemplo, spei anchoram in cælo firmavit, eâ quidem felicitate; ut dum Sol unus spectando illius victorias non rarò defecisset, optârit orbis; ut Gedeon aliquis attonitum in cælo stare, Ezechias iteratò redire imperaret; ut videant hostes multum referre, cui belles, & *quo animo*. Palmæ enim & causam sequuntur, & ducem. Secura victoriæ præsumptio est pro DEO bellum suscepisse: cui enim bellorum causa est DEUS, est & comes bellorum. Expertæ hoc per orbem canunt felices Austriadum Alaudæ, quæ paucorum annorum lustro

Romanis immixtæ Aquilis in Orientem, & Occidentem Tua Magne Cæsar extulere labara, & jam propè plura in terris Tua Regna numerant, quàm Sol in cælo domos.

(a) Senec. (b) Tacit. (c) Salust. (d) Senec. (e) Idem. (f) Lamorm. in vita. (g) Horat. (h) Senec. de Tranq. (i) Idem. (k) Idem. (l) Idem. (m) Tacit. (n) Senec. (o) Idem. (p) Horat. (q) Seneca.

ÆQUANIMITAS LEOPOLDI AUGUSTI.

EAvistis Superi! Requies divina medullas
Sedit in humanas, & terras induit æther.

Da Divum, LEOPOLDE, decus, da immobilis arrha
Cæli inconcussum procul aspirâsse serenum,
Rivales potuere pati quo Numina terras,
Fata super, dentemque ævi, risumque ferocis
Antij, & aggestis liventes cædibus annos.

Jam telum, gladiosque truces attollit in altum
Livor, & armatis ligat omnem fraudibus orbem
In clades, Auguste, Tuas, cinctuque Quirino
Proditor, & tragici miscent se Fascibus enses.

O nitor immitis trabeæ! si vindice lethum
Conditur, & fidæ possunt sævire Secures!

Quis tamen illis inter, stragemque datura
Pila, quis Augustis pallentes mortibus aras,
Quàm placida Te mente vides? Non pulchrior altos
Phæbus agit currus, seu post Arctoa frementem
Classica purpureo Thaumantias excipit arcu,
Seu domita æthereas innectunt sidera lauros.
Nil Regum tumuli, nil Te placidissima tangunt
Funera, mærentesque tori, Carolique serenum
Nomen, & avulsus viduis amplexibus Hæres.
Æqua Tibi semper Pietas, tranquillaque magni
Pax animi, qualémque decet de Numine nasci.

Nec Tua jam magno gemitu, mundique superba
Fletibus in gelidos poscunt Te fata dolores.
Sed Tecum plagis jacuit communibus orbis.
Inter Tu solus fessi suspiria mundi,
Regnorumque graves planctus, Austriæque ruinam
Sceptri nil, LEOPOLDE, gemis. Trepidâsse severos
Diis geniti potuere rogos: timor ipse cadendi
Te juvat, & fesso surgit fiducia letho,
Erigis & lapsum pulchris hortatibus orbem:
Nos Cælo, non Sorte regi. Quas cessit habenas
Imperij, danti revocas; unoque Tonante
Dum minores, trabeas uni committis Olympo,
Et Tua, Regnantemque Deum Regnator adoras.

Affurgis, Tecumque salus, permistaque fletu
Gaudia, & exanimi redijt fors mitior Austro.
Mars rursùm feralè tonat, commissaque magnæ
Regum signa Aquilæ, (pro cui!) Germania discors,
Celthaque bellator frendet, quin barbarus Eos
Infremit, & dubij nutant fastigia mundi.
Quis tamen (O animos! ô Divum æquantia pacem
Pectora! & infractæ plusquàm mortalibus iræ!)
Quàm Tuus es! Lapsis magnos è vultibus ignes,

Atquè aliquid cæleste legis. Te vindice rursus
Imbelles gliscunt animi, virésque labascunt
Hostibus, & pulsi redijt nitor aureus ævi.

Jámque fuit Fortuna minor, quo sæviat, ultrò
Non habet, immensas vocat in discrimina palmas
Cæsaris, aggestisque parat vicisse triumphis.

Quis vincis, LEOPOLDE! Suos victoria nescit,
Confunditque gradus; nec tam quid vincere possit,
Quàm vicisse, videt. Bellatrix Austria quò se
Vertit, adornari trabeas, concurrere lauros
Adspicimus: jam regna ruunt; & vindice ferro
Ad freta Cæsareos cantat Bellona triumphos.
Mox leget Euxinum sceptris: jam littore nigro
Mars pugnat. Vade ô celeri Victoria gressu,
Sudantesque tua lauru deterge sarissas.

Quanta venit! quæ Regna suis, quæ vincta catenis
Oppida, adorantes galeas, & Regia fulvis
Signa júbis sacris sternit famulantia plantis.
Ille diu Victor Biston, qui præfuit orbi,
Qui trabeas, & sceptrum dabat; jam murice pronò
Accidit, & tantum potuit regnare rogando.
Vince, precor, supràque nihil, nisi sidera linque!

Sed non Te, geminis quamvis Tibi Fascibus orbis,
Nec simplex succumbat ebur, non mille triumphis
Ara satur, veterum potuit quæ temnere lauros,
Et cælo divisus Honor regalè sedentem
E recti statione movent; non serpere Divo
Vertice, victricem non ausa inscendere dextram
Laurea, sed sacras allambit supplice plantas
Fronde: verecundo circum stat fulgure Thracum
Fama triumphatrix, nec tota extollere Ponti
Mole potest. Eadem Pietas, tranquillaque laudum
Temperies, dignusque Deo nitor aureus oris,
Quæque beat fessas Divum Clementia Terras,
Atquæ sinus plenus Patris. Si prisca tulissent
Sæcula Te, Cæsar, stares jam gemmea circum
Templa coronatis Æquum sibi Numen in aris.

Non Arcus, non Templa subis, gemmantèque marmor
Sole laceffitum. Latio minor iste triumphus
Est Jove, quem ducat fractis hastilibus Orbis.
Ipse Tibi gemina Victor de Sorte trophæum
Cæsar eris: Lybici subter gemet ira Tyranni,
Celthaque, quique suâ victi stant mole triumphi,
Cum plausu Superum, & Furijs ululantibus hosti.

Hunc oculis, Hunc sculpe animis, atquæ imbibe totum
Flos Regum JOSEPHE, Patrem: sic culmine rerum
Austria, & Augusto radiabunt sidere Fasces.

MA-



RENOVAT SPLENDORIBUS OPTIMUM

MAGNIFICENTIA.

*Aspice, post Scythicos arx undiquè pulchrior ignes
Dignum Magnifico Cæsare surgit opus.*

*Nempe bonus certat Princeps cum sole, quòd orbem
Curet, & hic studijs ornet, ut ille suis.*

*AUSTRIADUM vellent homines si facta silere;
Quanti sint, poterunt saxa vel ipsa loqui.*



Agnos si magna decent, Magnificentia sic Regum cuius est propria; ut omnino omnibus sit communis: & quam toparchæ non nisi raram hospitem habere nōrunt; Monarchis esse solet familiaris, ac domestica. Quos enim regnorum copiosis proventibus, opūque maiestate locupletavit Fortuna; si pari, quo acceperunt, expendant profluvio; quod alijs aliàs fastūs, aut luxūs notam inureret, hoc ijs plurimum fulgoris affert, ac gloriæ. Equidem velut inter ignes Luna minores ab argentei luminis quaquà diffusi plenitudine se regiam in cælo ostentat: sic Regiæ dignitatis eminentia præ cæteris provinciarum toparchis magni fit; dum magna facit magnificis sumptibus ad regni splendidum decorem Monarcha. Scilicet vel ipsi lapides loquuntur, & vasta lapidum in pyramidem assurgentium moles, regalis in Ægypto Magnificentiæ historia, magnificæ cæterorum per orbem Regum virtutis symbolum, attestatur; quid regiam maiestatem deceat, quid ad regni conferat splendorem.

Certè cū Ludovicus XI. Galliarum Rex adeò neglectis uteretur vestibus; ut eum nequè pilei ornamentum aliud, præterquàm imago plumbea, ab aulica nobilitate discerneret; excitatis utrinquè ludibrijs hanc tenuitatem irrisere Hispani, & constans usquè ad illa tempora utriquè Coronæ amicitia cæpit elanguescere. Velut malè cohæreret initum cum eo fœdus, quem ab externo cultu sibi imparem existimabat Hispana magnitudo. (a) Nobilitas quippe rei ex Magnificentiâ æstimatur: & splendidam opinionem ab animo extorquet, quod cum splendore per externos sensus illabitur. Rex est, qui invisibili quodam potestatis charactere supremum in subditos obtinet imperium, atquè imperandi iure cunctos antecellit: nihilominus hanc internæ dignitatis eminentiam exterior pompa, gestatum manu sceptrum, imposita vertici corona, injectum humeris paludamentum, substrata provinciarum insignia exornant, & exornando ad geniculaturam totius regni alliciūt reverentiam in obsequium devotionis. Unde sapienter mihi visi sunt Theodosius, Arcadius, Honorius Orientis Imperatores lege latâ statuissè: ne quis alius purpuram gestaret; ut proprius supremæ Maiestati ornatus esset, quo fieret conspicua. (b) *Delectant enim, & cum delectatione spontaneum honorem conciliant Magnifici apparatus, vitæq; cultus cum elegantia.* Econtra verò, dum nimia servatur humilitas, regnandi frangitur autoritas. Scio quidem Rudolphum, Primum ex Augustissima Domo Austriaca Imperatorem, eo ipso temporis articulo in vulgari pennula, & detrita veste aggestum ex armis Solium conscendisse, cū

cùm Ottocarus Boëmorum Rex purpurâ, gemmîsque superbus ad fidelitatis juramentum aderat : (d) sed fortitudinis tunc triumphus erat, non ornatûs : & alius est, qui domi Cæsarem, alius, qui militiæ Imperatorem pompæ apparatus decet. *Aptum est nempe omne bonum locis suis, & quæ, nisi congruâ sede potirentur, sordescerent, laudabilia fiunt.* (e)

Rex gloriosus in purpura, aureoque vestimenti fulgore inclytam stipendiariam copioso numero ab obsequijs alat aulam, quod alterum est magnificæ virtutis opus. Id enim, si Alexandri Macedonis educatori credimus, *Magnificentiam dicimus; quod æquo sumptu rem administrabit splendidius.* (f) Porro sumptus (ut idem pergit) in genere probantur maximè, quos honorabiles censemus. Primus est Regum honor, ab ipsa nobilitate, eaque frequentissimâ honorari : nam quid magis ad splendorem facit, quid ad venerationem, quàm si dignus nobilissimo ministerio Princeps dignos circa corpus habeat se Principe ministros ? Deus, ut præcellam suam authoritatem commendando condignam pariter, atque æquissimam ab humano genere reverentiam obtineret; apparet igneo sublimis in throno, nivei vestimenti candore, fulminei fluminis in vultu circumerrantibus flammis tremendus, &, quod caput est, Angelicæ Dominationes, cælestesque Principatus sic suos distribuuntur in ordines; ut millia millium ministrarent, & decies millies centena millia assisterent gubernanti. (g) Quod si igitur supremi Numinis Majestas in Regibus per spiritum, quem ab ipso habent, principalem, velut Patris in filio lineamenta relucet; ut eos meritò etiam ethnicus Poëta *animatam Dei imaginem* dixerit : (h) oportebit pariter illam hierarchici ministerij pompam in magnifico aulicorum obsequio æmulari. Equidem Proceres, selectissima provinciarum portio, dum venerantur; venerationem augent, &, ut Regiæ dignitatis existimationi consulunt præsentia suâ, sic cultum promovent exemplo. Quæ causa fuit, tum ut Persæ, Indi, Ægyptique Reges, quò ijs plurima apud suos authoritas accresceret, non nisi maximo primæ nobilitatis apparatu stipati in publicum prodirent : (i) tum ut Solymanus in rebellem filium Bajazetem moturus nollet sibi Bosphorum traijcienti Regium Ferdinandi I. legatum adesse; quod, majore copiarum parte præmissâ, paucorum legionum belliducibus cingeretur, metueretque (k) ex ea comitatûs tenuitate minorem apud externos venerationem, seu, ut barbarè loquar, terrorem. Sed quæ in omni Oriente domestica est, peregrina non est apud nos, etiam in occasu ultimo confluens ad regium famulatum nobilissima multitudo. Aderat in Regia Alphonsi VIII. (m) ab obsequijs Dynastarum Principumque ille numerus, quem Ludovicus Galliarum Rex per ea tempora Toleti hospes admiratus, asseveravit : nulli in mundo Regum parem tum aulam fuisse. Addere simul potuit : nulli tum Regum parem fuisse majestatem : quippe qui ab ipso summo Pontifice Hispaniarum Imperator diceretur, coleretur à Gallis. Sit ergo sacra domi forisque Regum dignitas, & quemadmodùm Sol minimè solus, quia siderum rex, serenioribus idcirco astris Mercurio, & Lucifero constanter cingitur; quemadmodùm eruditior ætas nostra Jovi, Saturnoque regionis, religionisque rectoribus suos adesse vidit in comitatu satellites non è grege fixarum, sed planetas : sic ætatis nostræ prudentior Politica regnorum supremos Rectores dirigat; ut sumptu non munifico, sed magnifico, nempe non nobilem, sed regium alant, quo cingantur, famulatum.

Est & ille receptus apud Reges Magnificentiae locus; ut publico epularum apparatu convivas excipiant, benevolentiae in suos liberali contestatione. Sic Cajus Julius Cæsarum primus post Lybicum triumphum in viginti ac duobus tricliniorum millibus Romano populo copiosas dapes apposuit, vel ad subditorum conciliandos, vel servandos in devotione animos. (n) Sic Regia Venetorum Respublica quatuor in annos singulos

gulos convivias Nobilitati exhibet : in festo D. Isidori, die Ascensionis Dominicæ, in Viti, & Modesti, ac deniquè in Stephani Protomartyris festivâ luce, vel ob solemnioris lætitiæ significationem insolitam. (o) Sic Alphonsus X., cùm nuptiali fœdere Ferdinandus de la Cerda, & Blanca S. Ludovici Gallorum regis filia jungerentur, Granatæ Regem, Eduardum Angliæ primogenitum, Philippum Delphinum Galliæ, Petrum, & Sanctium Infantes Arragoniæ, Emmanuelem, & Philippum fratres, Sanctium Petrum, & Joannem filios, rariorem deniquè cæterorum Principum coronam in palatio convivas habuit. Ad hæc prostabant in foris, & compitis mensæ lautitijs refertissimæ, patebântque populo tantâ succedentium eduliorum constantiâ; ut deficientibus qui acciperent adhuc essent, qui apponerent : vel ad Regis, regniq̃ue commendandam exteris famam, ac magnitudinem. Sic Assuerus fecit grande (100. videlicet & 80. dierum) convivium cunctis Principibus, fortissimis Persarum, Medorum inclytis, & Præfectis provinciarum : ut ostenderet divitias gloriæ regni sui, ac magnitudinem potentiae suæ. (p) Sed & Salomonis cibus erat in dies singulos 30. cori similæ, 60. cori farinæ, 100. boves pingues, 20. boves pascuales, & 100. arietes, exceptâ venatione cervorum, caprearum, bubalorum, & altilium. (q) Tanta porrò ciborum copia non ad ingluviem erat, sed pompam. *Ipse enim (ut causam allegat sacer textus) obtinebat omnem regionem, quæ erat trans flumen à Thaphsa usq̃ ad Gozan, & habebat omnia regna à flumine terre Phylistim usq̃ ad terminum Ægypti.* (r) Ut nimirum quemadmodum Israëliti regni splendor ad summam magnitudinem pertigerat : sic Israëliti Regis gloria præter cæterorum majestatem etiam in regiæ mensæ magnificentia eluce-ret. *Nam Magnifici est, in quocunq̃ genere quid faciat, magnificè id, splendideq̃ facere.*

Cæterum cùm in omni actione modus quidam sit, & certi fines, quos ultra citraque nequit consistere virtutis rectum : etiam ipsi Magnificentiae suus erit, quo intra mediocritatis cancellos contineatur, modus ac medium. *Modus autem est optimus, decus ipsum tenere, nec progredi longius. Quod enim medium est moderationis, id bonum; quia quod majus est, quàm oporteat, id malum est.* Magnificencia igitur multa, erit nulla; quia definit esse Magnificencia, quæ definit in luxum : constatque, quàm verum sit illud paradoxum Pittaci dicentis : *dimidium plus esse toto.* (s) Cùm proinde Rex privatus degit intra palatij fines, ne immodico utatur vestium ornatu : illud Severi Imperatoris recogitans : *Majestatem virtute constare, non corporis cultu.* (t) Cùm in publicum se se committit, aut publicè admittit alios, monitum Pulcheriæ, quod fratri Theodosio dederat, sequatur : *ut magnificus sit, & splendidus.* (u) Sic fiet, ut Magnificencia servetur semper, quia per intervalla. Cùm regni publica solennitas exegerit; ut magnificè, id est, regiè instruantur convivias, ornentur potiùs mensæ eduliorum copioso delectu, quàm onerentur, & sumptuum magnitudo exponatur, non prodigatur. Etenim *licet suis cuiquè sit modus, tamen magis ostendit nimium, quàm parum;* (x) in magnificis præsertim mensis, ut accidit in prodiga, & prodigiola Caligulæ gula, qui centies H S id est 416666. florenis uno die cœnavit, (y) & triennij spatio viciès ter millies sestertiûm, seu ultra nonaginta quinque milliones, nempe 95833180. floren. Rhen. commessando abligurivit. (z) Procul ab aulis, & regnis similia monstra, & non ad Magnificentiam, sed usquè ad insaniam, non splendidi, sed infames tyranni : *Magnifici enim est, in sumptuum magnitudine servare decorum.* (aa)

Nequè verò ex hac parca magnificorum sumptuum profusione moderatione crebrâ quidquam de Regiæ Majestatis splendore decedere potest : nam si decidatur aliquid ex immenso regum luxu, nunquam deerunt pecuniæ in magnificentiam, & reliqua Majestatis ostentamenta. Tum verò plausibiliter hæc magnificentiæ virtus ex-

ercetur, cùm, quæ privatæ subtrahuntur licentiæ, publicæ utilitati impendentur: *nequè enim sui causâ sumptus facere solet magnificus, sed Reipublica.* (bb) Pontibus proinde sternantur flumina subditorum necessitati; commoditati instaurentur viæ publicæ, vallis muniantur urbes severitati; utilitati aquarum ductus ædificentur: exercitationi Nobilium palæstræ, splendori urbium palatia, festivis plausibus theatra, incolarum conditioni Athenæa, omnium religioni templa exstruantur. Trajanus certè, Cæsarum optimus jure dictus, licet privatis delicijs ædificaret parcè, publicè tamen magnificus fuit: hinc porticus, inde delubra, tot, ac tanta ubiquè ædificia, ut orbem terrarum ædificasse videretur. (cc) Et æquissima Octaviani Augusti, postquàm Romani Imperij metropolim multis modis ornâisset, ac communisset, fuit gloria dicentis: *Romam lateritiam accepi, marmoream relinquo.* (dd) *Nihil enim Principi est magnificentius, quàm si ditionem, quam accepit, reddat statu meliorem.* Sed nequè sapientius magnitudini suæ, aut sanctius Reges consulunt; quàm si eorum Magnificentia tum litterarum incremento studeat, tum cultui divino. Quam ab orbe universo Nominis sui famam meruerit Ptolomæus Ægypti rex, quòd Alexandriæ bibliothecam septingenties mille manuscriptis codicibus refertam erexit, & ut vel unica Hæbreorum historia non deesset, 72. interpretes largissimis sumptibus sibi comparârit: testantur tot posterioribus sæculis regnorum Principes, qui ejusdem ut curæ, sic laudis æmuli tantâ æris profusione scientias emere; ut æraria in bibliothecas transiisse, & aulæ omnigenæ eruditionis liber viderentur. (ee) Porro qui splendorem Israëlitici regni, qui Regis Salomonis gloriam ad rigidiorē decempedam explorare cupit; (ff) magnificam augustissimi templi fabricam metiatur: & si viderit auro, cedris, omnique lapide pretioso universa fulgere; agnoscat & Religionis ibidem habitantis majestatem, & regis extruentis Magnificentiam sic implicari: ut neutram ab altera discernat, parem utriquè admirationem decernat. Quare in *in his sumptus laudabiliter magnus est, & ad rem peraccommodatus, cùm & res ipsa sumptu digna, & sumptus re ipsâ dignus habeatur.* (gg)

Donationum magnitudine non tam meretur, quàm ex tacito contractu emit sui existimationem Rex usq; ad Magnificentiam munificus. Patuit id in Alphonso Castellæ, & Legionis rege, quando eum ut magnificentissimum Principem Europa, & Asia obstupuit: infelici conflictu cæsum Orientis Imperatorem detinebat in vinculis Sultanus Babylonis: redemptionis persolvendo lytro cum impar esset Byzantinum ærarium, Augusta conjux subsidium à summo Pontifice, à Galliarum Rege sollicitarat; sed quæ sumptuum justam magnitudinem frustra petebat à duobus, in Hispaniam profecta accepit ab uno. Dedit Alphonfus 10. dierum spatium integrum libertatis pretium, eâ tamen lege; ut quam Romæ, & Parisijs æris summam Imperatrix jam impetraverat; illicò remissam restitueret: *Nolo enim, inquiebat, alienis impensis meam liberalitatem adjuvari.* (hh) Magis quippe è Regij nominis dignitate fuerat sic esse munificum; *tunc enim regij animi præcelsa magnitudo ostenditur, cùm summa magnitudo profunditur.* (ii)

(a) Phil. Comin. l. 3. pag. 84. (b) Dio. l. 49. (c) Cic. l. 1. de offe. (d) Niecomb. virt. coron. p. 2. §. 1. (e) Calliod. 5. Var. 22. (f) Aristot. l. 4. Ethic. c. 2. (g) Daniel 7. v. 10. (h) Menand. apud Lang. (i) Suet. in vita. (k) Egnat. l. 2. c. 2. (l) Niecomb. cit. c. 25. 2. (m) Esther. c. 1. (n) 3. Reg. c. 4. (o) Ibid. v. 2. & 21. (p) Aristot. l. 4. Ethic. 2. c. 2. (q) Cic. ad Brut. (r) Arist. l. 1. Rhet. c. 6. (s) Laërt. l. 5. c. 1. (t) Ammian. 25. (u) Niceph. l. 14. c. 2. (x) Cic. de orat. (y) Senec. consol. ad Helv. (z) Dio. l. 59. (aa) Arist. l. 4. Eth. c. 2. (bb) Idem. (cc) Plin. in Paneg. (dd) Suet. in ejus. vita. (ee) Agell. l. 6. c. ult. (ff) 3. Reg. 10. (gg) Arist. 4. Ethic. c. 2. (hh) Niecomb. virtus cor. p. 2. c. 7 §. 7. (ii) D. Th. q. 129. art. 2.

SPLENDOR MAGNIFICENTIÆ AUSTRIACÆ UBIQUE DIFFUSUS.

Sol orbis inter sidera maximum,
Fulgoris hæres AUSTRIA! Quæ nites
Majestuosâ luce dives,
Magnifico radians amictu
Quid non deauras? Undiquè Cynthio
Par: imò non par, sed magè clarior
Pompôsâ fulges, & serenas
Spargere nata faces, per axem
Augusta gestis Imperij micas.
Quo glorieris, non facinus deest
Insomne sæclis, ô venusti
Sideris effigies, Evum
Æquans imago lumine Delium!
Te luce magnam, Te rutilantius
Astrum fatetur, Te Monarcham
Attonitus veneratur orbis,
Intèrque summum sidera prædicat.
Nam Tu quadriga vectus in aurea
Titan, dierum pulcher author
Regiloquo locuples nitore
Sidus, coruscis undiquè diffuis
Fulgens pyropis, quàm memorabiles
Scenas adornas? quàmque avitæ
AUSTRIA das documeta pompæ?
Phoebea lampas nescia contegi,
Nec quod peramplum Tu jubar explicas:
Nempe indoles innata prodit
Semet, & ingenitæ sub umbra
Latere dotes, nòque decus potest
Regale. Sic est: quem fugiunt Tux
Miranda Majestatis acta?
Gloria, splendor & venustans
Thronos Regentum non tenebras sciunt.
Omnes per oras panderis AUSTRIA,
Et majus orbis luminare,
Plausibili patefis sereno.
Quæ forma rerum? quâ veheris viâ,
Detergis umbras, ac faciem novam
Sumptûs loquacem fastuosi
Instituis, locuplèsque mundum
Splendore reple. Seû solij ferat
Solem Te Horizon, seû diademata
Regum capeffas, fascinatrices
Fert famulos Tibi pompa plausus.

Sed quod Theatrum jam mihi panditur?
 Hinc inde moles Dædalea manu
 Stant fabrefactæ: nunc colossis,
 Nunc adytis, superúmque Fanis
 Tellus superbit. Quo venit auspice
 Centuplicatæ non leve machinæ
 Opus? parentem Te fatentur
 Mygdonij monumenta saxi.
 Vix orta Regnis solis es æmula
 Mundi novatrix: mox ubi regiæ
 Accensa gemmis es Tiaræ,
 Tectæ Arabum, Pariique fastûs
 Patent Sabæûni: cernimus, AUSTRIO
 Notata quot stant marmora nomine
 Turrésque, moles & superbas
 Cæsareos meminisse sumptus.
 Tibi Viennæ Pergama, & inclytas
 Debemus arces, vasta palatia,
 Centúmque Te loquuntur urbes
 Aggeribus, validoque cinctæ
 Muro frementis non superabiles
 Furore Martis. Te proprium sui
 Narrant parentem dum sub ipfas
 Basilicæ, fabricæque nubes
 Invectæ. Athenas, quótque stupet docens
 Musæa Pallas, sunt Tua munera,
 O Phœbe mundi! Tu decorem
 AUSTRIA, Tu pretium profuso
 Aspergis auro. Scilicet affoles
 Solare sidus regna perambulans
 Afflare lucem, deque summo
 Imperij radiare cœlo.
 Factiva magni facta domestica
 Virtus per omnem Te tulit orbitam,
 Ferétque posthac, & perennes
 Cui solitum stabilire laudes,
 Æterno honoris provehet effedo:
 Te fama magnæ nuncia gloriæ
 Plausu celebrabit canetque:
 AUSTRIA Magnifico per orbem
 Splendore fulget. Quàm bene prodiga
 Diffundit amplis plena nitoribus
 Opes! Regentis námque virtus
 Summa per eximias mereri
 Pompas, honores. Sol oriens *Neo*
 JOSEPHE REX quid? Tu quoquè fastibus
 Ornabis, & replebis orbem
 Magnificis redimite gestis.

FIDE-



FIDELITAS.

Bistonium nuper qui formidavimus arcum;

Vi vacuum rupta vidimus esse fide.

Sic tandem offensus perjuria vindicat æther:

Perfidus exitio Mars furit ipse suo.

Pressa fuit toties, tamen eminent AUSTRIA: pactis

Firma stat: hinc casum non timet illa DOMUS.



Uæ principatûs honore supra communem mortalium sortem extulit liberrimum Principem Fortuna; nemini obnoxium fecit, nisi sibi, verborum suorum servum publica fidelitate. Legum, & pœnarum vis plebem obstringit; liberum principem vix aliud obligat, præter se ipsum. Sæpe legibus Imperans subjacet: sed & sæpe secum dispensat, quia legislator; à fidelitate nunquam validè se absolvit. Principes verborum suorum non esse mancipia, vox est læsæ Principum Majestatis rea: quia coronata capita, & divas Imperantium Majestates scurras dicit: Cùm, *qui ea dicunt, quibus fides non habenda videatur, scurræ vocantur.* (a) Fictitia è ligno, & viva Regum persona vix alio differunt, quàm loquelâ. Ornatus exterior, sceptrum manibus, corona capite utriquè par; sola voce dispares: quam qui prostituit Princeps, læsæ Majestatis suæ reus est, bis nocens, fraude in alium, in se injuriâ. Verè abjectus Imperans, qui in spreto suo verbo se abjecit, violator authoritatis publicæ, à qua præcipua ejusdem dignitas.

Non decet Principem labium mentiens. (b) Vah probrum! pudet vel meminisse mendacij, cùm de Principibus sermo est. Probrosus semper vel puero mentiri. Quid Viro? quid Principi? Mortalium miserrimis paupertas, morbi, adversa quælibet tolerabilia sunt: infamia mendacis vix unquam. Quia in ijs frequens patientia, in hac ferè nunquam non furor. Etiam lixa audire mendax impunè non patitur: pugno sæpius alienis faucibus impacto, impactam sibi maculam abstergere nititur. Et coronatum Caput ab universo orbe mendacem sibi linguam inter sibila exprobari feret sine sensu? Sic Dij me ament; indignus est dignitatis suæ celsitudine animus tam abjectè humilis. *Magnitudinem Fortune suæ Princeps, qui mentitur, ignorat.* Marcus Aurelius Imperator Commodum primogenitum hæreditate Imperij privare meditabatur; palàm professus causam: quòd in eo nunquam veritatem invenisset. Non malè: quia qui aliud dicit, aliud facit Imperans, aliud dicitur, aliud est. Plus erubescit servili infamia, quàm Regiâ Purpurâ. Non est verus Princeps, qui non verax. Prima non veracis falsitas, & summa, Principem se esse. Quomodò enim Princeps, qui famæ suæ prodigus? cùm *Principibus præcipua rerum ad famam dirigenda.* (c) Non uni homini, nec Provinciæ, sed orbi toti; non ætati uni mortalium, sed æternitati posterorum infamem se prostituit, & exhibilandum à posteris impostor Imperans. Unum viola-

tum verbum integra trahet volumina opprobriorum. Æternùm lacerabitur probris per ora hominum, qui datam ore fidem rupit, immortalis infamia loquentium, & scribentium. *Hoc enim annalium munus, ut pravis dictis, factisque ex posteritate, & infamia metus sit.* (d) Famæ & Majestatis suæ Zelator princeps perpetuò in id studium incumbat, eamque reverentiam præ se ferat; ut verbis suis major sit fides, quàm aliorum juramentis. (e)

Si veritas est, magnos Principes quandam esse divinitatis particulam: eorundem verba sint & oracula necesse est, quæ fallere nesciant. Quæ oraculis divinitatem, Principibus Majestatem conciliat veritas dictorum. *Pulcherrima in Principe mentis, linguaque concordia.* (f) Homo animal sociabile commune societatis vinculum fidem habet, hæc mutuos nexus & jungit, & servat: quàm si Princeps humanæ societatis custos positus, pessimo exemplo, prior ipse dissolvit; non conservator, sed turbator, imò everfor est universi. *Fides sanctissimum humani pectoris bonum est.* (g) Evelle è mundo fidem, radicem evulisti, ex qua omne bonum. Ah faciem miseram communitatis humanæ, ubi nulla promissorum, nulla pacti, nulla fœderum sanctitas: si fidentum nemini, credendum nulli! *Tolle ista, aut minue raptus, cædes, bella erunt, atque hæc nullo fœdere, nulla pace terminanda.* (h) Rectiùs erit belluarum contubernium, quàm hominum consortium. Harmonia humanæ conversationis ex integro confunditur vocis, & animi discordiâ.

Ingens omnibus, quæ Princeps dicet, tum Majestas insit, tum fides. Promissis standum est: pactis non modò favorabilibus, sed odiosis. *Actum est de rebus humanis, si sola servatur utilitatum fides.* (i) Princeps Politicus Reipublicæ sol humana imbecillitate inevitabilem quandoquæ maculam, nunquam integram splendoris sui eclypsim patitur, nisi perfidiâ. Quia nunquam servilius aliquid dominationi suæ obijci-tur, quàm lunatica verborum inconstantia, venenato semper similem per ecclipsim in rempublicam influxu, quæ cum Imperante fatali subjacet discrimini. Probatum est, *nisi in fide stet respublica, opibus non staturam.* (k) Non diu stabit Princeps, & cum eo ratio statûs, qui verbis suis non stat; juratis præsertim, quorum perjurio non homo tantùm, sed DEUS ipse læditur. Utrumquæ læsum perfidiâ & Deum, & hominem, utrumquæ sentiet inimicum; re duos, causâ unum, unum & perfidiæ vindictâ. Si perfidia quandoquæ clarescit victorijs; fatuus ignis est; quia momento evanescens: ejus tamen virtutis, ut ultricia accendat fulmina in manu Tonantis.

Stant nulla diu deceptis gaudia Divis. (l)

Suprema veracitas adversaria semper fuit fallaciæ, præsertim perjuræ. *Perjurij pœna divina exitium, humana dedecus.* (m) Non opus hîc coronata numerare perjuria Divina Nemese ultimo excidio castigata. Divini, & profani codices pleni sunt miserabilibus pejerantium exemplis. Nequæ longiùs abeas, si veritatem cupis palpare; sta ubi es ævo tuo, & in Orientem vultus conijce, qui cum perjuris in fide non stetit, cecidit in occasum fortunæ. Constans Luna sensit inconstantiam fidei tantâ terrarum amissione, plùs perfidiâ suâ, quàm hostilibus armis contrita. Stas, & stupes in Oriente Occidentem fortunæ; si lubet converso paulùm vultu in Occidente Orientem mirare: Quid dicis? Taces? prudenter, ut plura cogites; illud præsertim Prophetæ: *Qui dissolvit pactum, nunquid effugiet?* (n) Joachim Israël's Regnator ethnico Nabuchodonosori fœdifragus, audijt tonantem per Prophetam Dominum: *Vivo ego, quoniam juramentum, quod sprevit, & fœdus, quod prævaricatus est, ponam in caput ejus.* (o) Hoc præmium est fœdifragi: ut quæ paravit mala alteri, ipse ferat Aman sæculi sui, longa trabe infamiæ posteris execrandus. Nequæ opus Victori DEO miraculis

raculis in perfidorum capita; nimiùm connaturale vindictæ instrumentum mundus est semper perfidis infensus. Agesilaus Spartæ Rex, cùm imparato Persarum Regi, à Tissapherne supremo ejusdem satrapa perfidè requisitus inducias indulisset ad pacem componendam, cùm audiret Persas induciarum tempore copias cogere, & bellum summa vi contra fidem comparare, nil motus profici in eo sibi multùm dicebat: quia perjurio suo perfidus Persa & homines alienaret, & Deos redderet iratos: hinc sibi non dubium triumphum. Dicto respondit eventus.

A perfido Principe unus decipitur populus; offenduntur omnes. Nullus amicus, quia nemo tutus; inimici singuli, quia cauti. Melior apertus hostis, quàm simulatus amicus: ille armatus armatum impetit periculi conscium, simulator inermem obruit præfidentiâ securum. Uni foedifragus suspectus fit omnibus; quia par omnium ratio, quæ unius, fides data. In suspecto suspecta omnia: suspectum foedus, suspecta promissa, suspecta pax, atquè hinc aperta dissidia: *siquidem pace suspecta tutius bellum.* (p) Cùm plurimis amicis fortuna Principum indigeat, præcipuum est Principis munus amicos parare. (q) Vix dabit historicus Rempublicam, quæ inter magnas semper magnorum vicissitudines diu stetisset; quam non aliquando amici manus sustinuit, ne decideret ex alto fortunæ. Non suis tantùm, sed alienis viribus potens est Imperans, qui amicis abundat; quia amicorum communia sunt omnia, etiam potentia. Argue sequelam Politice, quàm grave detrimentum sibi fecit, & reipublicæ Princeps, quia perfidiâ amicos amisit. Errat quisquis fraudibus lucrum sperat. Levitate verborum levissimam facit Imperans fortunam, quia nunquam firmam. *Impossibile est injustum, perjurum, & audacem potentiam firmam retinere.* (r) Romana Majestas, ut eam assequeretur amplitudinem, quâ æternitati idea fieret Magnorum Imperantium, jam tum à prima ejusdem origine Numa Pompilius providit: *ut fides, ac jumentum propulso legum, ac pœnarum metu civitatem regerent.* (s) Quod intendit Roma, obtinuit; tenax fidei tantum tenuit Imperium, & tot sæculis retinuit. Omnibus quippe virtutum generibus exercendis, colendisque Populus Romanus è parva origine ad tantæ amplitudinis instar emicuit: sed omnium maximè, atquè præcipuam fidem coluit, sanctamque habuit, tam privatim, quàm publicè. (t) Favet pietati, fideique Deus, per quæ Populus Romanus ad tantum fastigium pervenit. (u) Tamdiu firma Imperia, quamdiu firma fides foederum, & pectorum. Diceres ab amente regi Rempublicam, ubi perfidus gubernat; quia non constat sibi. *Callidi, & impostores, quantumvis subtilibus consilijs raro, aut nunquam ad potentiam perveniunt; aut si, in ea non sunt firmi.* (x) Pactorum debilitas firmum est debilis Principis argumentum. *Qui enim fallit, & decipit; eò facit, quia potentia, & viribus minus fedit.* (y)

Victoria fraude parta non meretur triumphum, nisi inter acclamationes exprobrantium. Abgandestrio Cattorum Principi Arminij mortem offerenti, si venenum submitteretur, respondit senatus: *Non fraude, neq; occultis, palàm atq; armatum Populum Romanum vincere.* (z) Hoc gloriosum, hoc laudabile magnis. Si Turpe est dolo vicisse, quid perfidiâ? quid perjurio? Hoc sanè non viri, vix imbellis foeminæ est. Sic vincere etiam effæminati inter scorta militantes possunt, quibus nullus animus, sed ignavum, & vilissimum cor. Victor foedifragus non miles, sed latro dicendus est; utrique communis honos, quia æquale facinus. Vah pudor! *Præstat honestè vinci, quàm nefariè vincere.* (aa) *Malo me fortuna pœniteat, quàm victoria pudeat.* (bb) Illa solùm vera victoria, quæ salva fide, & integra dignitate paratur. (cc) O militem! O virum! qui urbes occupat, & munimenta amicus amico: ne si hostis esset, ab hoste fugeret imbellis: non bello vincit, sed furto subducit. Occupa-

ta perfidè munimenta, æterna sunt infamiæ monumenta. Gloriosi militis prima palma est, fidem apud omnes obtinuisse, summa clades, vel apud unum amisisse.

Optimus ille
*Militia, cui postremum est, primùmque tueri
Inter bella fidem. (dd)*

Adeò fœda est magno Duci perfidiæ nota; ut quamvis frangenti fidem, fides non servanda ex debito, etiam perfido quandoque præstanda sit; ne alienæ turpitudinis vel umbrâ infici videaris. Cæsar, etsi Ariovistum fidem fallentem adverteret; noluit tamen, ut sui milites Germanos læderent: *ne dici posset, eos à se per fidem in alloquio circumventos.* (ce) Magno illi Imperanti gravior fuit levitas fidei, quàm victoria, imò regnum. Maluit amittere plurima, quàm unam fidem. Sic magni Principes

*Non rumpite fœdera pacis,
Nec regnis postferte fidem. (ff)*

Quodcunque lucrum fraus offerat, minus est, quàm ut fides solvi possit; quia hinc fama nullo pretio æquabilis, quia par vitæ. *Non pluris apud nos divitiæ valeant, quàm fama.* (gg) Pro debito statûs sui honoris avido Principi, fides publica in honore sit: tum enim, si usquam, honor sequetur Honorantem. Romanorum exemplo, qui in honoris fastigio collocati Fidei statuam penes Jovem velut summo honoris loco positam coluère.

Ævo suo Roma, sæculo nostro Germania penes suum Imperij Jovem Magnum LEOPOLDUM I. proximo honoris loco, Romanæ videlicet Majestatis, dignitate recenter posuit TE, Auguste NEO-REX JOSEPHE, liceat dicere publicum Germanæ Fidei monumentum. Perverso hoc sæculo, in quo *nec promittendi modus est, nec frangendi pudor ullus.* (hh) TU es *venerabile hoc Fidei Numen, quæ dexteram suam certissimum humana salutis pignus ostentat.* (ii) In Romana Majestate et summum TE Principem, & Germanum probabis, cui fides invidendâ cæteris antonomasiâ manebit Germana virtus. *Nihil enim, quod Principem magis decet, quàm ut verbis suis fidem præstet.* (kk) Inconcussa fide semper hostibus inconcussus eorum perfidiam Tua Fidelitate franges, semper Augustus Regnorum Tuorum Amplificator, glorioso Augustissimorum Majorum exemplo, quorum Imperij magnitudo, quâ majorem sol non vidit, ne in palmo terræ etiam ab invidis unquam perfidiæ incusata est. Sic, quæ in teneriori ætate nupsisse TIBI videtur Fortuna, cum tot sceptrâ, & coronas in Te contulerit, propriam semper Fortunæ dotem; etiam TIBI constantem pariter, & intaminatam prosperis bello, & pace eventibus nupta felicitatis
DEA servabit Fidelitatem.

(a) Dio. l. 33. (b) Prov. 7. (c) Tacit. An. 4. (d) Tacit. An. 3. (e) Isoc. or. 2. ad Nicoclem. (f) Mamert. Paneg. (g) Sen. ep. 88. (h) Lips. monit. polit. c. 13. (i) Fab. declam. 16. (k) Liv. l. 3. (l) Sil. l. 3. (m) Cicero l. 2. de leg. (n) Ezech. 11. (o) Ezech. 17. (p) Tacit. 4. hist. (q) Plin. paneg. (r) Demosth. Rhet. c. 18. (s) Liv. l. 1. (t) Gell. l. 2. c. 1. (u) Liv. l. 44. (x) Lips. monit. polit. c. 13. (y) Lips. ibid. (z) Tacit. 2. an. (aa) Nazian. or. 21. (bb) Curt. l. 4. (cc) Flor. l. c. 12. (dd) Sil. l. 14. (ee) Cæsar l. 1. de Bello Gal. (ff) Sil. l. 2. (gg) Symach. c. 30. (hh) Petrarch. l. 1. de remed. utriusque fort. dial. 110. (ii) Valer. l. 6. c. 6. (kk) Liv. l. 26.

FIDELITAS, SEU PUBLICA FIDES AUSTRIACAS SERVAT SERVATA CORONAS.

IOrtè suburbanas ubi plenior alluit Ister
Vindobonæ sylvas, divisâque brachia stringens
Includit Dryadûmque choros, viridémque Dianam,
Sub densa nuper confederat AUSTRIA fronde.
Hic dum Diva leves oculo fugiente ruentis
Abnobidæ fluctus animo meditatur, & undas
Instabili videt ire viâ, quâque impetus urget,
Stare loco ignaras liquido decurrere lapsu,
Talibus alloquitur fugientem vocibus Istrum:
Téne, fatere Hospes, vivit prognata parente,
Quam colit *AUSTRIACIS* dudum gens invida sceptris,
Sancta olim, regeret mundum dum sanctior ætas,
Sed modò rara Fides? loquitur vaga filia patrem.
Tu nescis alvéo consistere, nescia & illa
Labitur, illudénisque docet, cûi fidere fas sit.
Heu fraudes! heu fluxa Fides! quæ vivitur ætas!
Quò fugit alma Fides? celeres huc dirige gressus,
Hic Tibi stare loco, & tutas dabo figere sedes.
Fida fui, semper (superi date) fida manebo.
Dixit, dicentis dulci modulamine reddunt
Naiades Dryadésque modos, & carmine fluxam
Stringunt, *AUSTRIACAMQUE FIDEM* super æthera tollunt.
Ecce autem, dum Diva suas Regina querelas
Accumulat, non visa priùs, stat littore cymba,
Amnis an adversus, dubium est, tuleritne secundus,
Quam pater ipse loci remex, & portitor Ister
Advectam secum tacitis huc appulit undis:
Una fuit cymbæ pondus, cui pauca locutus
Portitor: Exscende, hæc fatis tibi debita terra est.
Dixit, & in noto mergens se condidit alvéo.
Virgo erat, ora Deæ similis, sed pulsa quietas,
Quêis staret, terras (hominum gens impia, sede
Quæ nequè jam Superos stabili sinis esse!) requirens.
Hæc ubi Reginam vicini in tegmine luci
Advertit, Divæ supplex his vocibus usa est:
O multùm dilecta Deo, cûi fata coronas,
Et regna accumulans: liceat succedere terris,
Quas fido imperio moderaris, quósque benigna
Astra mihi de Te spondent, sentire favores.
Obstupuit sortem, vocémque, habitûmque loquentis
AUSTRIACI Regina soli; dehinc talia fatur:
O Dea (nam negat esse hominem vox, quæquè decoram
Mortali major vestit Tibi gratia frontem)
Si superis, quorum mea sunt hæc munere Regna,

Non ingrata fui, coluïque, colique Penates
 Si iussi, si fortè (quod audivisse videris)
 Quando beare suo voluère has Numine terras,
 Humana *AUSTRIADUM* in Superos Pietásque, Fidésque
 Cælicolis placuit, nondum tam barbara morem
 Deditici patrium; patuit, sempérque patebit
 Hospitio Divùm *DOMUS AUSTRIA*: vivito mecum
 Hospes, & Imperijs mecum dato jura paternis.
 Sed Tibi quod nomen? (liceat quæsisse) videris
 Non ignota meis hospes succedere Regnis.
 Aut vidi, aut vidisse puto. Vidisse, reponit
 Virgo, ne dubita; non TE delusit imago.
 Illa ego Teutonicæ non infima gloria gentis
 Sancta *Fides*, invisa illis, quæis cernere durum est,
AUSTRIACIS tantùm faveant quòd fata coronis.
 Hinc premor: hæc causa exilij mihi suasit ad oras
 Diva venire Tuas: hîc firmum figere Regnum,
 Virtuti datur: hæc Divos manet hospita tellus.
 Sic age, Cæsareos Mater visura Nepotes.
 Sic Pietas, sic sancta Fides, sic candida virtus
 Sit cordi. Sic *AUSTRIACAS* procul ultima Thule
 Audiet, & patrio resonabit carmine laudes.
 Novi ego (sed nondum secreta resolvere fas est)
 Quæ grato mittenda polo tibi fata parentur.
 Hoc unum, hoc moneo: monitis ne crede sinistris.
 Si Tibi qui fraudi suadent occurrere fraude,
 Párque referre pari, sta non perterrita pactis.
 Da Fidei Regina fidem. Me Regna sequuntur.
 Te, meminisse potes, quæis circum fraudibus actam
 Callidus in structos casses penè impulit hostis,
 Sed quibus hæc fatis sint lusa pericula, discce.
 Vix ea: continuò in scenas, sic iussa, recedit
 Populæ proles sylvæ, speciésque theatri
 Surgit, in *HABSPURGOS* Fidei exhibitura favores.
 Hic primùm *AUSTRIACAS* ostentat scena coronas,
 Seu quibus *ARCHIDUCEM* natalia jura dederunt
 Effulgere *DOMUM*, seu quas superaddidit æquus
AUSTRIACIS, voto spem non fallente, senatus.
 Quantus honor! quantâ se Majestate videnti
 Præsentant Dominæ Diademata! quantus in illis
 Magne orbem (jam nunc tantus) *LEOPOLDE* beares,
 Hanc Te pacifico Superi si vertice sortem
 Ferre sinant! Hinc diva favens vinclo alligat aurum,
 Cæsareámque simul, Regúmque, Ducúmque tiaras
 Fœdere conjunxit stabili: tum vincla Regenti,
 Dat Dominæ, monitúmque addens: hæc vincula serva,
 Infit, & infractæ Fidei servabere vinclis
 Hæc etenim *AUSTRIACAS* servant servata coronas.

F I N I S.

Titel, 3 Bl, 36 und 7 Bl

Mit A. Fränkel und M. Kappeler

Kollum = B. II, 1125

V: GARZAROLI von GARZAROLSHOFF, F. J.

vgl. Anhang I, 108. (eines der 10 Bl. wurde
der 106. Bl. (106. Bl.))

Stück bei St. Anselm - Wittenberg

Manusk. - B. XXIX, 317 und X, 113

6426

Manuscript

H-M3 11th paper - 21 pages

Special
Folio
H-B34396

